

萬有文庫

第二集七百種

王雲五主編

明季稗史初編

(二)

商務印書館發行

萬有文庫

第二集七百種



商務印書館發行

愛惜
公用
圖書
使用

明季稗史初編

(二)

空軍軍官學校圖書館

登錄號

674

類號

083.12

6722

書叢本基學國

民國

圖書集成



圖書集成

明季稗史初編卷六

烈皇小識

丙子清騎闖入。洪承疇、盧象昇俱率師入援。事平，卽命承疇總督薊遼，象昇總督宣大。至是，上念流賊交誑，從廷臣議以承疇專任關外，升薊撫吳阿衡總督薊保，象昇專任剿賊。起升陳新甲總督宣大，新甲亦守制家居武陵，欲援以自解，會推時卽奉有不拘在籍丁艱之旨，而後推及之。少詹事黃道周連上三疏，其一楊嗣昌不當奪情入閣，其一言寧錦巡撫方一藻撫賞事與上年俺答不同，不得援爲口實。其一言不當又奪情用陳新甲於宣大如無人肯往，臣願任之。時七月乙巳，上召廷臣于平臺問道周曰：朕聞無所爲而爲者謂之天理，有所爲而爲者謂之人欲。爾前疏適當枚卜不用之日，果無所爲乎？道周對曰：天下止有義利，臣心爲國家不爲功名，自信其無所私。上曰：前月推陳新甲時何不言？道周對曰：時科道何楷、林蘭友皆有疏，二臣臣同鄉，恐涉嫌疑耳。上曰：今遂無嫌乎？道周對曰：天下綱常邊疆大計，失今不言，後將無及。臣所惜者綱常名教，非私也。上曰：清雖美德，不可倣自是，惟伯夷爲聖之清，若小廉曲謹，是廉非清也。道周對曰：伯夷忠孝兩盡，故孔子許其仁。今楊嗣昌雖有小才，然古者惟門庭之寇，不得已而以吉禮從，金革故有奪情之事。今用嗣昌于本兵，猶可藉口于金革。近用嗣昌于政府，則禮法之所不容。天下未有不父其父而可稱爲子者，未有不能孝於親而忠於君者。嗣昌出班奏曰：臣非生于空桑，豈遂不知父母？臣嘗再辭而明旨迫切，道周學行人宗，臣實企仰之。近疏謂不如

鄭鄭臣始太息絕望。鄭鄭杖母行同梟獍。道周既不如鄭。何言綱常也。道周曰。臣言文章不如鄭。鄭非謂品行。上怒曰。此皆是矯辭飾說。顯是朋比。道周對曰。衆惡必察。臣何敢。上曰。孔子誅少正卯。當時亦稱聞人。惟行辟而堅。言僞而辯。不免孔子之誅。道周對曰。正卯欺世盜名。臣無其心。今日不盡言。則臣負陛下。今日陛下殺臣。則陛下負臣。上怒曰。爾讀書多年。祇成佞耳。道周對曰。忠佞二字。臣不敢不辨。夫臣子在君父之前。獨立敢言者爲佞。豈在君父之前。讒諂面諛者爲忠乎。忠佞不分。則邪正混淆。何以致治。上怒甚曰。祖訓辯言亂政者當斬。道周曰。臣若有當斬之罪。願就司寇。聽陛下處分。上曰。原不專指佞。但辯言亂政者。按祖訓當斬。隨諭道周且退。上復面諭諸臣。今後慎毋黨同伐異。各恪修職業。次日復頒諭申飭。時修撰劉同升。趙士春合上疏論嗣昌奪情事。與道周俱下部議處。部覆降三級。照舊御札道周。票輕處。同升。士春。票重處。嗣昌懼。上將復用道周也。急募人參之。於是張若麒應募。遂上擁戴不效。怨望紛然。疏入。同升。士春降三級。道周降六級。俱調外矣。後嗣昌借邊警調若麒于兵部。蓋酬之也。

丁丑鼎甲三人。劉趙與陳之遴也。初上奪情疏。擬三人聯名。之遴辭不預。次年。遴父祖苞以失事自盡。遴以犯屬閑住。則何如列名之爲愈也。南海辭列名而得入。綸扉之遴辭列名而終歸罷斥。同一畏首畏尾。而幸不幸有如此者。

刑部主事張若麒擁戴不效。怨望紛然。疏略曰。頃者皇上憂軫時艱。不憚勞煩。召對之後。大布王言。諄諄然以正人心息邪說爲治天下之大本原。舉黨同伐異之隱情。招權納賄之狡術。無不見其肺肝。直爲

道破。而闢邪一義。尤爲千古之聖帝名王所未嘗發。一時之端人正士所不能言。直如日月當天。妖狐莫遁。謂宜大家洗心以副明旨。何意諸臣之藐旨捏造奸言。歸過皇上。而無天無地無父無君至此極也。以臣所聞。數日以來。天諭旣頒。羣黨藉藉。或擲抄傳之邸報而怒視。或引不倫之遠事而詆議。通宵聚衆。信口譏誹未已也。至有謂召對之日。黃道周犯顏批鱗。古今未有。而皇上爲之理屈者。至有謂道周堅求一死。而皇上左顧言他。始終無如何者。至有謂聖諭注洒。何故亦作對偶者。甚至有謂聖諭中邪說。依經一段。不出聖裁者。紛紛攘攘。日改月增。要使古今未有之好語。盡出自道周之口。凡可以歸過皇上者。無所不至。蓋倡之者飾六藝以文奸言。盡在假託道理。以把持朝廷。以顯行其呼朋引類之計。于是記誦博者附之。不博者亦附之。甚至不辨菽麥。墨汁全無者亦附之。興爲怙權納賄之地。而特開皇上下頂門之針。遂大家喊叫。謂老魔之赤幟旣拔。山魃之穢態雖藏。嚇騙不靈。谿壑無幸。遂至潑口橫加。毫無顧忌。倘不亟示前日召對之語。宣錄刊傳。與新頒聖諭共爲日星之揭。則背公死黨。實繁有徒。或鼓煽以惑四方。私記以疑後世。致令朋串附勢之史臣。徇私載筆。皇上正人心息邪說一段。治天下之大經大法。且爲怨望者埋沒遮掩矣。伏乞皇上始終爲世道人心計。深思遠慮。速賜施行。雖備員末秩。亦仰荷皇上生成之恩。何忍畏其兇鋒。雷同不言也。

宋林希點制誥。凡元祐名臣貶黜之制。皆極其醜詆。一日草制罷。擲筆于地曰。壞名節矣。若麒此疏。何以異是。然使此疏出而總憲卽可以力致。尙斷斷不可。況區區一兵曹耶。小人枉做小人。千古同嘆。

若麒與沈迅既授刑部。不與諸司官齒。本司缺郎中。員外某署印。奉差辭朝。送印于迅。迅大怒罵之。擲還其印。員外懼。泣訴于堂。委別司署焉。若麒既出疏。逐道周。嗣昌已許調兵部。久不得耗。乃親詣職方郎中趙光。抃促之。次日。諸臣畢集。揖嗣昌畢。光抃出班。請曰。本司現有缺員。聞得老先生要調二人來。嗣昌佯驚曰。那有此事。光抃曰。昨日其人親到本司。向郎中言。老先生要調他。並他同部姓沈者。四司官俱在。所共目擊。可詢也。嗣昌色變曰。這等我要參他。光抃唯唯而退。

若麒沈迅既營求嗣昌。量調有日矣。適御史涂必滋疏言。刑部所司者民命。而人往往厭薄之。是以十三司官。強半皆鄉科任子。偶有一甲科。則輒調別部。豈司民命者當專用不肖乎。請自今著爲令。刑部官不許更調別部。奉旨申飭。若麒憤無所洩。乃上平賦役節驛遞一疏。謂鄉紳隱匿賦役。遺害小民。以致民窮爲盜。內有鄉紳豺虎等語。驛遞謂裁削勘合。歲可得百五十萬銀兩。有旨本內鄉紳豺虎等語。著據實回奏。若麒回奏。指莊應會、范良彥、袁宏勳、袁范皆地方所最切齒。而宏勳尤護持逆黨者。有旨俱行撫按逮問。初麒之出疏也。專爲同鄉侍郎高宏圖而發。及回奏。卽擬宏圖以入告。或語以宏圖立朝大節。忤璫去位。萬萬不可指及。麒不得已。乃指應會三人。然麒之爲此。實激于必滋之疏。必滋與楊廷麟同鄉同年。咸謂涂疏。楊實使之。後張沈與嗣昌比。而修怨廷麟者。禍亦烈矣。

武清侯李誠昭。慈聖內家也。上在信邸時。以緩急開罪。後借事繩之以法。不少貸。誠銘卒。其子不准承襲。房產俱行入官內。一女字嘉定伯周奎之孫。嘉定請命于后。后諭云。人當患難。自無絕婚之理。可具小轎。但取此女歸外。慎毋夾帶。諸戚畹合辭申請。不允。後悼靈王臨危。親見慈聖於空中。上大悔悟。卽准

其子襲爵。房產祿米仍舊頒給焉。

上初年崇奉天主教。上海教中人也。既入政府。力進天主之說。將宮內供養諸銅佛像盡行毀碎。至是悼靈王病篤。上臨視之。王指九蓮華娘娘現立空中。歷數毀壞三寶之罪。及苛求武清云云。言訖而薨。上大驚懼。極力挽回。亦無及矣。時閣臣皆從外入。素不諳文義。上既痛悔前事。特頒諭內外。有但願佛天祖宗。知不願人知也。等句。幾不成。皇言矣。宰相須用讀書人。初年上曾舉以諷諸閣臣者。可勝三數。京師天主教有二西人主之。龍華民湯若望也。凡皈依其教者。先問汝家有魔鬼否。有則取以來。魔鬼卽佛也。天主殿前有青石幢一大石池一。其黨取佛像至。卽于幢上撞碎佛頭及手足。擲棄池中。候聚集衆多。然後設齋。邀諸徒黨。架爐鼓火。將諸佛像盡行鎔化。率以爲常。某年六月初一日。復建此會。方日正中。碧空無纖雲。適當舉火。衆共聳視。忽大雷一聲。將池中佛像及諸爐炭盡行攝去。池內若掃。不留微塵。衆皆汗流浹背。咸合掌西跪念阿彌陀佛。自是遂絕此會。

史堃疏黨類陷臣已極事。內辯周汝弼營升延綏巡撫。係太常寺卿許世鼐說情。奉旨史堃方在究問。何得瀆陳。奏內說情緣由。還著許世鼐田唯嘉據實具奏。不許游移支飾。先是史堃得提問之報。隨卽赴京。潛入韓城邸中。連住三日。乃始投部。上此疏。後世鼐回奏。隱躍其辭。但引陝西巡按王倓相對之言。爲證。有旨著王倓實奏。及倓回奏。則事已結案久矣。遂奉姑不究之旨。然世鼐實未嘗說情也。史堃下獄後。又上直發朋黨奸貪之狀疏。內云。鹽課現經內臣楊顯名澈底清查之後。割沒清楚。足見臣之心跡。而楊士聰之誣捏陷臣。亦昭然矣。又云。張焜芳乃內閣中書張炳芳之兄也。向來旨意露洩。皆

炳芳爲之。卽焜芳參臣及內臣楊顯名。亦恃與援有人。布置關通。有炳芳在耳。又言炳芳弟煒芳。以長史謀陞同知。包攬知縣虞國鎮考選。騙銀一萬三千兩。託余伯和送與科臣馮元飈。八千兩。令其把持臺省。餘銀入己三千。伯和二千等云。疏上。數發改票。後擬元飈。士聰俱革任。煒芳炳芳俱革任。提問。復發再票。御筆批云。此案不欲牽累。乃止。票炳芳俱革職候訊。伯和提問。此疏實出黃應恩。應恩素與炳芳有嫌。而較書一事。又與士聰有隙。故構造此疏以相陷也。後士聰上軍興需餉正殷疏。有旨史堃事情。該部速審具奏。楊士聰不許再瀆。士聰再疏。遂奉不得更端求勝之旨。蓋史堃之布置已周。聖意亦潛移矣。

時史堃既恃內援。復有韓城主之於外。獄中連上疏催審。且請將楊士聰、張焜芳令該部提去。與伊面質。而淮鹽運使徐大儀與史堃同年相好。自奉行查之旨。已先諭吏書竭力彌縫。不待堃幹僕之來也。惟交際六萬兩。則不得而掩。內監楊顯名回奏。事事出脫。至交際一項。則云臣不能爲諱。以故堃久稽獄中。不得出。竟憤恨以死。迨堃死而事敗。則實天爲之也。

刑部上黃應恩招奉旨黃應恩哆口招搖。實有事款。何得聽其支飾。盡爲開豁。該司官殊屬縱徇。著回將話來。仍一面嚴訊確擬具奏。先是應恩下部黨與甚盛。部於招搖諸款。槩不敢入。止引洩一品語律。致奉此旨。司官再問。不得不入事款及賊。應恩突出疏參之。司官大懼。乃上疏乞勅三法司會問。夫以罪犯而參司官。與史堃請提楊士聰、張焜芳到部面質。事雖不行。而兩人之虎視獄中可知矣。後再擬上。有旨黃應恩發附近衛所充軍終身。

刑部上田敬宗招奉旨周汝弼推撫情由。竟未訊明。但憑飾抵。傅蒙麻衛招已實。又聽改口展辯。且田敬宗等違法濫受多贓。僅擬配徒。凱縱殊甚。通著研訊確擬具奏。及再上擬田敬宗附近田登第等邊衛各充軍終身。贓追充餉。有旨依擬。

十月清騎入犯。薊昌總督吳阿衡與鎮守太監鄭希詔稱壽。已報清人入口矣。猶堅留與鄭公飲百杯。取百籌之慶。飲畢醉不能師。遂死于亂軍中。北兵盡入。樞輔楊嗣昌上四事機宜疏。請于卿寺科道等官。不拘常格。推補臣部左右侍郎。其久推不至者。候其到日。于別衙填補。末云。職方一司。案冗已極。特設協理員外。分任其勞。而余爵蒞任無期。請以武選主事孫嘉績升補。而武選車駕主事漆嘉祉等。音訊杳然。請勅下吏部。遴選別部有才望者。速行調補。次日。吏部題補沈迅調武選。張若麒調車駕。而所云久推不至者。吳姓惠世楊也。

十一月初八日。召對初。無詞林。而詞林畢集。有內閣奏之。乃俱召入。給事中范淑泰奏。今清人臨城。尙無定議。不知是要款要戰。上曰。那個要款。淑泰奏。外邊皆有此議論。泰又奏。凡涉邊事。邸報一概不敢抄傳。滿城人皆以邊事爲諱。上曰。凡關係機密的。不許抄傳。若行間塘報。如何一概不許抄傳。蓋是時武陵私謀款局。實併塘報一切禁止。自是長安始敢言邊事矣。是日召對。意在憂餉。大理寺丞戈允禮倡言借貸。欲括城中富人金錢。淑泰奏。兵事要在行法。今法不行而憂餉。卽天雨粟。地湧金。何益於事。上曰。朝廷何嘗不欲行。而微窺聖意。若有所躊躇而不能決者。先是楊廷麟疏論武陵及高起潛。武陵特題改兵部。前往盧象昇軍前贊畫。是日已謝恩辭朝。故不預。而款市之議。武陵力請于上。上許之矣。武

陵特遣使入清營。竟得媿書。乃止。

時各道勤王兵至。宣大總督盧象昇至都城下。與武陵倡言朝端邪正不分。清兵何時得靖。且云權臣在內。邊臣豈能成功。武陵云。若如此說。老先生尙方劍當先從。學生用起。不樂而罷。時清兵越都城西掠。破高陽。舊樞輔孫承宗合門死難。破吳橋縣。知縣劉業嶸迎降。遂南掠至山東。象昇南下逐之。坐營副總兵李某請盧紮營於李家口。戒慎毋動。動必敗。清兵非流賊比也。而李自帥師逆清兵。已奏捷矣。盧聞捷。遽勒兵而前。遇清兵於賈村。全軍陷沒。事聞。上以督臣陣亡。坐營不行策應。逮問論斬。邊將祖寬素以戇直得罪當事。與李俱逮。問大辟。人咸冤之。武陵題楊廷麟之贊畫也。實欲假手于清兵殺盧。未出師之前。遣廷麟至真定。與陝撫孫傳庭議事。不及於難。及敗。報至。武陵首先問曰。楊翰林死未報者。止知贊畫。不知翰林爲誰。武陵乃再問曰。楊贊畫死未報者。答以已先奉差。不在營中。武陵爲不豫者久之。嗚呼。此卽曹瞞殺禰衡之故智。究竟廷麟不死于陣。而武陵竟死于兵。孰謂無天道乎。

時畿內州縣。清兵所至輒陷。兵部主事沈迅上疏條陳邊務。一云。州縣無重臣彈壓。故清兵所至不能堵禦。請與定州、蠡縣、廣平、河間各添設兵備一員。一云。以天下僧人配天下尼姑。編入里甲。三丁抽一朝夕訓練。可得精兵數十萬。其餘條陳別事甚多。武陵具覆。盛稱迅言之可用。非止一端。而畿南添設兵備。尤爲救時碩畫。且請改迅科員用。有旨。沈迅可改兵科給事中。作速到任管事。蓋迅時結大璫。卜希孔爲奧援。故武陵應之於外如桴鼓。遂取特旨如寄。

沈迅授科後。卽疏薦張縉彥等爲兵科都給事中。奉旨。張縉彥著改任。先是姚思孝旣斥。屢推未用。部議

擢復不果。至是，迅薦五人：首縉彥，次任濬、黃奇遇、涂必滋、張若麒。而所重者若麒也。其薦語有云：廉則真廉，敏則真敏。又云：其所上平賦役節驛遞二疏，皆能言人所不能言云云。而不意上竟點用縉彥也。縉彥到任，既疏參武陵。又因召對及之。武陵語人曰：沈宙泉到底還不老成。如此看來，不若從部議用徐蓼莪，或能相爲，也不見得。夫朝廷用一人，一手握定，惟意所欲，與既與而又悔之。武陵之橫至此哉。是年正月，張獻忠假官軍旗號，暗襲南陽，屯於南關。左良玉適至北關，疑之，使人召之。獻忠窘，逸去。良玉追及之，兩馬相望，一箭中其肩，一箭中其指於弓靶。獻忠倉惶，良玉舉刀劈其面，血流被甲。部下孫可望直前大鬪，獻忠乃得脫，逃至麻城。良玉進剿，獻兩日夜馳七百里至穀城，營於王家河。夜襲穀城，破之，出示安民云：本營志在匡亂，已逐闖兵遠遁。本營今釋甲歸朝，爾百姓無恐。遂拘耆老，具揭遺孫可望、重賄熊文燦，內有西碧玉二方，長尺餘，又徑寸珠二枚。文燦遂一力擔當撫之。獻忠所部不滿萬人，乞餉十萬人，又乞襄陽府屯軍。文燦遷延不能應，獻忠遂據守穀城，分屯羣盜於四郊。二月，左良玉至襄陽，與巡按林鳴琳、巡道王瑞梅欲誘獻忠來見，殺之。文燦曰：殺降不祥，力持不可。獻忠恃文燦爲援，益無忌。穀城諸生徐以顯一見如故，教以孫吳兵法，私練士卒，鑄造兵器。雖婦孺皆知其必反。二月，李自成陷蒼溪，時川中諸道兵嚴守險要，賊坐困乏食。賀人龍以弱卒誘而設伏於梓潼。自成逐弱卒，卒走伏發，殺賊數千級，幾殲之。自成率殘賊走溪南，擬入湖廣，依張獻忠，不許。至竹溪，獻忠謀殺之。自成獨乘騾馳百里，走商維。至浙川，老回回營，臥疾半年餘。老回回授以數百人，仍然入陝西剽掠。六月，逮湖廣巡撫俞應桂，以方孔炤代之，以戴東撫治鄖陽。

八月。賊曹操會羣賊過天星、托天王、整齊王、小秦王、混世王、整十萬、革里眼於陝州。遂南走內鄉、浙川。犯襄陽。九月。熊文燦遣副總兵龍在田等邀擊革里眼射場天於雙溝。大敗之。老回回等俱東走棗陽。官軍追逐數十里。斬首六千餘級。羣賊披靡四竄。獨曹操仍留內浙山中。十月。陝西巡撫孫傳庭帥師入衛。諸將先後出潼關。曹操謂爲剿己也。走均州。叩太和山提督太監李維政乞撫。維政爲言於文燦。文燦乃檄止諸軍。曹操九營皆就撫。文燦爲具疏請貸其罪。令諸將宴之於迎恩寺。授官游擊將軍。供億甚備。曹操者羅汝才也。汝才既受撫。分屯羣賊於房竹諸縣。文燦令散脅從諸衆。簡選驍壯。從征立功。汝才不聽。自言不願受署爲官。并不願食餉。願爲百姓耕種。文燦一切羈縻之。與張獻忠遙爲聲援。奪民禾而食。不奉縣官治。

十二年己卯正月。清兵陷濟州。王遇害。巡按宋學朱、布按道府張秉文、翁鴻業、苟好善、推官陸燦等。或死或逃。報至。舉朝震恐。先是沈迅條陳。有東撫不許離德州一步之語。張若麒力持職方司。爲之案呈。武陵卽據具覆。東撫顏繼祖認定汛地。僉謂清兵無越德而南之理。至是清兵由東昌而東南渡河。破丘縣、夏津。直趨濟南。濟南精兵旣盡。在德州城中無備。當事又無方略。民潰遂陷。德州聞省城陷。兵心恇擾。鼓譟挾餉。幾至大變。繼祖懼。卽以數千金塞其望。而兵遂不可用。繼祖具疏待罪。申言原派不許離德之語。武陵特出疏力排其說。清兵退。繼祖與順天巡撫陳祖苞、保定巡撫張其平、總兵祖寬、太監鄧希詔俱逮下獄。大學士劉宇亮罷。時清兵縱橫燕齊間。宇亮自請督師。與陳新甲並轡而南。各鎮勤王兵皆屬焉。時將卒皆視清兵所向以爲趨避。惟蹂踐居民以爲事。繇竹至安平。偵者報清兵大至。上下

相顧無人色。相擬卽趨晉州以避之。知州陳宏緒堅閉城門不聽入。而城中士民亦歃血而誓。不得延入一兵。綿竹大怒。傳令箭急開門以納師。否者以軍法從事。宏緒復語督師之來欲剿清兵也。今清兵且至。正督師建功之會。奈何急欲入城。若芻糧不繼。州官罪也。若欲入城。不敢聽命。縣竹遂疏劾之。有旨逮問。晉州士民詣闕訟冤。願以身代州官。死者千餘人。宏緒乃得輕降。四級調用上。始疑縣竹不能禦衆。徒擾民矣。

時行間大帥俱尾清兵之後。不敢擊。綿竹具疏言之。其末帶參劉光祚。韓城與武陵謀。欲因此事去綿竹。乃稟光祚軍前正法。旨到之日。諸大帥俱分道前去。并光祚亦不在軍前。況綿竹之參光祚者。原不至死。適會有武清之捷。綿竹乃置光祚於武清縣獄。而復請之。并上武清捷音。於是奉旨。條奏條敘。殊屬乖藐。著九卿科道看議。綿竹具疏引罪。言乖則乖矣。藐則萬萬不敢。蓋兩人明知聖旨往還之間。必致參差。必不能正法。而逐綿竹之計行矣。部覆綿竹冠帶閑住。陳啓新言看重議輕。沈迅言明旨森嚴。考功之發未盡。於是部議革職爲民。韓城稟旨仍候事。平另議。嗟乎。此案韓城與武陵主謀排擠。構陷甚巧。故明旨止言看議。而加以議處。附之者猶以爲未足也。啓新不足道。彼沈迅者。由武陵薦用。而顯然出力爲武陵排斥異己。誠不識世間廉恥爲何物矣。究之五案定而綿竹奉旨免議。上亦知其無大罪也。彼韓城者。獨何心哉。

上傳任丘。清苑。涑水。遷安。大城。定興。縣知縣白慧元等貪酷縱肆。俱著革職提問。撫按官不行糾劾。溺職殊甚。近畿如此。遠地可知。著部院申飭。慧元令任丘。璫某。任丘人也。邀慧元飲酒。半盡。陳諸寶玩。以

供鑒賞。慧元曰：我有至寶，大異于是。璫問何寶。慧元笑不應。璫固問之。慧元曰：我腰下有至寶耳。璫默然。遂羅織其事，款入告。又慮人議其修私怨也，并羅及清苑等縣。慧元罷而新知縣李仲熊卽蒞任。清兵攻任丘。慧元善騎射，協同仲熊固守，城陷俱死之。

山東巡撫缺，東省諸人公討泰州兵備鄭二陽。蓋二陽于流賊南犯時，城守著勞者也。往例本省撫道缺，本省鄉紳向部公討。此相沿舊習，間亦有爲私者。至是沈迅獨糾太僕寺少卿王萬象私討巡撫，以修舊怨。遂奉把持亂政之旨。萬象大懼，回話之辭甚遜。然實無私討情弊，乃得旨冠帶閑住。而沈勢益張。後迅與若麒共言于吏部，用永平兵備劉景曜巡撫山東。自是山東諸事皆由二人握定矣。若麒又引其兄若獬爲吏部，而以假咨離任事敗，則又謀事在人，成事在天也。

文武官品服色祖制既定，奉行已久。惟是武弁概服獅子，上至是重行申飭。武弁三四品俱照制服虎豹。至內閣從無定式，蓋直擯之洒掃服役之末。祖制良有深意。雖太監極品止于正四品，間有賜蟒玉者，亦後來之濫觴，非祖制也。至是上命取山海經以進，採取各種獸名，另定服色。以天驃爲極品。說者謂天子左右環列異獸，蓋不祥也。

上又將內庫歷朝諸銅器盡發寶源局鑄錢。內有三代年及宣德年間物，製造精巧絕倫。商人不忍舊器毀棄，每稱千觔，願納銅二千觔。監督主事某不可，謂古器雖毀棄可惜，我何敢私爲輕重。商人謂宣銅下爐，尙存其質。至三代間物，則質清輕之極。下爐後惟有青烟一縷爾。此則誰認其咎。監督謂聖性猜疑甚重，若如公言，必增聖疑。如三代物不便下爐，則有監督內官公同驗視，罪不在我。于是古器毀棄

殆盡

凡遇新天子嗣位。另造琴百張。每張價五百金。此相沿舊例。其事則御用監司之。真金徽玉軫也。然有音無文。至今上以無文爲嫌。欲更製琴曲。而莫有能應者。從父適以謁選入都。中書楊崇善係長洲籍。稱同鄉。卽邀至其家。爲製譜以進。韻義咸備。上閱之稱善。從父已就選州貳矣。奉旨文震亨著。改授中書舍人。武英殿供事。

上御極後。周皇后正位中宮。復選東宮田妃。西宮袁妃。而田最有寵。其父田宏遇亦最橫。后父周奎次之。袁父則兢兢自守。不預外事。上每戒諭外戚。必三人同召。一日復召袁語二人。學生不敏。奉陪多次矣。今後還求兩先生包容。免賜提挈。周田不能應。皆有慙色。

璫某與小囊城及秀水諸人善。璫有母稱壽。秀水拉諸同人往賀。甫登其堂。則璫母已巍然端坐。璫侍其旁曰。太太年老。不能行禮。小弟代爲答拜。卽先下拜。秀水輩相顧錯愕。不得已頓首再拜而起。嗚呼。比之匪人。不亦傷乎。守孰爲大。守身爲大。雖一舉足間。可不慎乎。特書之以爲戒。

七月。戮失事諸臣于市。保定巡撫張其平。山東巡撫顏繼祖。總兵祖寬。太監鄧希詔。臨刑肆口訕上。極其無狀。聞者咸爲髮指。而順天巡撫陳祖苞預服毒。自盡獄中。恩縣知縣王應元等亦以失守被刑。劉業嶸以迎降故。照謀叛律。決不待時。妻子入官爲奴。家產籍沒。父母兄弟流二千里安置。而祖苞子編修之遴。繼祖弟監事光祖。俱以犯屬罷斥。先是顏抵東撫任後。連疏參劾前撫李懋芳。至於逮問。衆論咸不直之。至是以失事服法。所謂還中以機者乎。

清兵既退。升陝西巡撫孫傳庭爲薊保總督。傳庭佯稱耳聾不能任事。有旨責其托病規卸。逮繫下獄。順天巡撫楊一雋以扶同欺隱。亦被逮。

時綿竹進賢相繼罷去。復當枚卜。上點用黃岡姚明恭、費縣張四知、滑縣魏照乘三人。俱入閣辦事。八月。庶吉士鄭鄮凌遲處死。先是鄭鄮下獄。衛帥吳孟明謂按律忤逆。惟父母告乃坐。今鄮父母皆亡。其事又遠在數十年之前。不可究竟。烏程乃以特授科道爲餌。如陳啓新例。于是同里中書許燦應募上疏。證其杖母。并及姦妹姦媳等事。有嚴旨切責。吳孟明不能治獄。著革任回衛。至是獄具。遂磔于市。科道各官以不行糾發。一概議處。俱降級有差。孟明奉譴後。上疏言鄭鄮世遠人亡。皇上必欲立置重典。以風示天下。近常州有錢霖父子戕殺之事。遠近駭聞。許燦旣仗義發憤。何舍目前之錢霖而追已往之鄭鄮。有旨逮錢霖同其子尙賓赴京驗審。蓋尙賓以祖尙書春蔭官。應天通判。霖係庚子舉人。相爭一侍女。遂揮刃刺其父中腋。業已輸重賄求和矣。而刀痕儼然。無計可掩。逮至中途。止德州。假宿寓草菴。夜半縱火焚其菴。預藏一尸于灰燼中。遂以尙賓失火被焚。朦朧入告。旨下地方官查明。武進知縣馬嘉植以入覲行。知府陳瑄申結。稱尙賓委係焚死。復奏。而尙賓竟逃入太湖中。馬嘉植物色得之。因尙賓家奴歸取盤費。遂執其奴爲導引。掩而取之。申解撫按。轉詳法司。尙賓決不待時。錢霖遣戍。陳瑄爲民。然馬之爲此。亦非能仗義也。向以刻薄殘忍見譏于陳。故爲此舉。以傾陳而洩私恨也。陳爲壬戌進士。筮仕合肥知縣。崔呈秀巡按淮陽時。首薦。呈秀敗。陳投誠。至戚蔡奕琛得以考察薄罰。歷升今官。與馬不相能。馬在任。惟趨事要津。視監司部郎蔑如也。曾以事處鄉紳鄒忠允過當。朱大典。鄒門人也。

適來督撫鳳陽鄒特往控訴。朱爲具疏參馬。馬知之。急挽許鼎臣求解。許曾巡撫山西。朱其屬吏也。許竭力調停。事得中寢。未幾許棄世。遺孤幼弱。馬視之如陌路。陳以此薄其爲人。每以刻薄殘忍目之。馬故恨之。刺骨云。

中書朱紳。相國國楨子也。崑山朱大受爲湖州知府。與紳相惡。紳特疏參之。衆議以鄉紳參地方官。不可爲訓。且紳又任子。咸不直之。紳又不達。連章疊上。第四疏奉旨廷杖。遂斃杖下。

上之初卽位也。編修江鼎鎮疏參順慶知府楊呈秀。有旨革職提問。鼎鎮四川南充人。爲楊部民。衆論亦不與之。己巳內計。鼎鎮例轉福建右參議。

歲底上於宮中符召天將。宮中每年或召仙。或召將。叩以來歲事。無弗應者。以前一召卽至。至是召久之不至。良久。帝下臨。批云天將皆已降生人間。無可應召者。上再拜叩問天將降生意。欲何爲。尙有未降生者否。批云。惟漢壽亭侯受明深恩。不肯下降。餘無在者。批畢寂然。再叩不應矣。

各省俱有督糧道。江南則以兵備兼理。崇禎元年冬。崇明營兵缺糧。知府王時和勒措不發。遂鼓譟。巡撫曹文衡查爲守者處死。時和劾罷。因請于朝。欲特設一道臣。專理四府錢糧。如布政事例。吏部不達其意。題准設四府督糧道。專理漕糧。旣非具疏本意。而增一官。卽增種種費。徒厲民耳。時流賊充斥。蘄黃間。應撫當移鎮安慶。以防侵軼。四府縉紳又謂江南重地。不可無大臣彈壓。於是部題添設安慶巡撫。以安慶兵備史可法爲之。復設偏沅巡撫。以河南布政陳睿謨爲之。是年二月。左良玉大敗河南賊飛山虎。劉國能于許州。國能降。老回回旣東奔。復糾革里眼。射塌天等。合于混。十萬分掠信陽。光山。

河南巡撫常道立削籍。以李仙風代之。逮總兵張任學。辛卯。左良玉擊射場天。老回回混十萬于河南之鎮城。大破之。射場天乞撫。仍連營百里。奪民二麥以自給。良玉遣人諭止之。不聽。戊申。良玉率副將陳永福、金聲桓等壓賊壘而軍。賊倉卒接戰。官兵奮擊。斬首二千七百。賊退保山陝。良玉遣降將劉國能招之。庚戌。射場天率其衆四千詣內鄉。降于良玉。射場天卽李萬慶也。良玉爲言於熊文燦。文燦署國能、萬慶皆爲游擊將軍。革里眼等走商城。

六月。張獻忠住紮穀城。知縣阮之鈿竭力調護。士民賴之。至今春叛形顯著。左良玉請乘其未備討之。文燦不可。至是果叛。之鈿瀝血書絕命詞于襟。仰藥死。良玉發兵進討。熊文燦故張露其事。且強留左良玉飲餞。稽延旬日。俾獻忠得預爲備。獻忠乃得從容運器甲資糧入房山。佈署已定。文燦始令進兵。良玉怒曰。督臺縱虎負嵎。使我撻之。不去。必以逗遛罪我。令旗至。卽冒暑進討。獻忠設伏于羅喉山。良玉兵度險入伏中。賊四合圍之。良玉全軍盡沒。并失其符印。僅收殘兵百人逃歸。遂列文燦事于朝。樞輔楊嗣昌具疏劾之。有旨。文燦逮問。良玉革職。殺賊自贖。後文燦逮至。戮尸西市。嗣昌方以議款不就。無以仰副聖眷。而文燦又嗣昌所舉也。乃請剿自効。上爲賜宴。賜坐。復賦詩以寵其行。御詩曰。鹽梅今日作干城。上將新開細柳營。一掃寇氛從此靖。還期教養遂民生。所以寵之者至矣。嗣昌謝恩畢。馳至武昌。申明軍令。見良玉部下多降將。可倚以辦賊。特疏請于朝。拜良玉爲平賊將軍。升永州推官萬元吉爲監軍僉事。

十月。老回回、革里眼、左金王等合二萬人。分屯英霍潛太諸山。犯安慶、桐城等處。遼將黃得功、川將杜先

春屢戰却之

十三年庚辰正月。大計羣吏。湖州知府朱大受屢爲朱紳所劾。特行賄于吏科都給事中阮震亨以祈免。爲廠役所獲。并緝臨江知府胡永清等營賄事款。于是震亨等俱下鎮撫司究問。

二月。會試天下士。命大學士薛國觀、蔡國用爲考試官。取中教諭楊瓊芳等三百名。韓城、金谿皆以外僚入閣。從無文采。楊瓊芳係揭陽教諭。而以壓榜。此三百年所無者。楊卷在某房中。同考編修韓四維見之。曰。會元在是矣。徐簡討汧。取文閱之。曰。此必首宿先生也。不然。必是老貢生。及拆號填榜。果係教諭。合堂愕然。韓城俯首無言。吏停筆候命。韓城躊躇良久。仍舊用楊。

三月。廷試策士。賜魏藻德、葛世振、高爾儼等進士。及第出身有差。又廷授顏渾等吏部給事中。御史等官。是日上召對策。進呈者四十八人。於文華殿。上問邊隅多警。何以報仇雪恥。魏藻德對曰。以臣所見。使大小諸臣皆知所恥。則功業自建。孔子論政。則曰。知恥近乎勇。論士則曰。行己有恥。孟子亦曰。一人橫行于天下。武王恥之。故勾踐、象、馬、以沼吳。燕昭式蛙而滅齊。皆知恥之明效也。因自列戊寅通州城守功狀。上心識之。拔爲第一。而周正儒、宣國柱五人。特授給事中。吳邦臣、魏景琦等五人。特授御史。顏渾特授吏部主事。田有年、盧若騰、錢志騶、陳纁等。特授兵部主事。時韓城擬無錫鄒式金者爲第一。上抑置二甲。楊瓊芳抑置三甲。韓城始失聖眷矣。

六月。大學士薛國觀免。韓城剛愎性成。敢作敢爲。旣與武陵比。而擠去綿竹。遂正首揆。益無忌憚。凡閣中有所稟擬。中書每于外庭傳示消息。已成定例矣。至是韓城信任私人王陸彥。而怒考中書周國興、楊

餘洪不爲用。特捏洩旨事參之。兩人皆廷杖斃杖下。兩中書家皆察緝韓城納賄事件以報東廠。又上召對時。曾語及朝臣貪婪。韓城曰。使廠衛得人。朝臣何敢至是。東廠太監王化民在側。汗流浹背。于是專偵其陰事。而史壘所輦多金爲布置地者。皆入韓城之寓。適史壘死。周楊二家力慾壘家人詣廠出首。東廠卽以上聞。有旨下錦衣衛嚴究。於是錦衣衛提韓城楊馬二長班鞠問。供吐過付之贓甚詳。而韓城一疏再疏。則云楊士聰之參史壘。別有緣故。又云史壘曾參黨人袁崇煥等。爲黨人所忌。故乘其丁艱而參之云。夫身在事中。又恐聖怒方赫。不辨己之受賄。而亟辨史壘受參之故。則真悍真愚矣。有旨著五府九卿議處。已而議處本上有旨。薛國觀著冠帶閑住。中書王陸彥著革了職。刑部提問。韓城等旣去。復當枚卜。上點用德州謝陞。并研陳演。先是田惟嘉罷斥。陞南京右都御史莊欽鄰爲吏部尙書。欽鄰遷延半年不至。奉旨詰責。欽鄰調用。而特召謝陞爲吏部尙書。至是陞以原官。演以禮部侍郎俱入閣辦事。滑縣曾出德州之門。具疏讓位。於是德州位列滑縣之前。

十月行刑。御勾決囚十二人。原任徐淮中河郎中胡璉預焉。胡璉雲南人。戊辰進士。前年以黃河衝犯泗陵。與河道總督劉榮嗣同逮。運河者專以運漕艘。而黃河則兼護陵寢。設有通惠。張湫。徐淮。儀真。四河道。復南旺。夏鎮。二泉。閘。皆以工部郎主之。三年一小挑。五年一大挑。費有編額。慮最悉也。而徐淮尤稱險要。時設打洪之役。神廟中葉。改濬落馬湖。漕艘盡由宿遷收口。不復走洪。而徐淮始專護陵寢矣。承平日久。惟俟春夏水湧漲發。足以際漕事。凡大挑小挑之費。俱入上下私橐。至是黃河連年衝決。直犯泗陵。總督朱光祚。周鼎。與榮嗣皆被逮。朱劉皆斃於獄。周後以宜興力庇。免死遣戍。逮薛國觀至京。

賜死。先是韓城出都。資重纍纍。用車數至百輛。東廠隨具事件密奏。聖心益怒。而史堃寄頓之賊。衛招甚明。給事中袁愷復疏劾其納賄諸事。與通賄刑部右侍郎蔡奕琛。左副都御史葉有聲。并及吏部尙書傅永淳。侍郎林棟隆。有旨。奕琛有聲革職提問。永淳棟隆閒住。而私人王陸彥雖已下獄。尙未成招。至是特旨。王陸彥著卽會官斬決。凡招具。或斬或絞。招內已定。奉旨止云。卽會官處決。今陸彥招未具。裁自聖斷。故云斬決。此旨從來所未有也。陸彥決而韓城復逮。逮至候命私寓。而勅令自盡之命下時。韓城已臥。家人報錦衣賚詔至。韓城蹶然曰。我死必矣。倉卒覓小帽不得。取蒼頭帽覆之。宣詔畢。頓首不能出聲。自盡後。衛帥驗視回奏。次日始奉旨。准取殮。蓋懸梁者兩晝夜。真從來未有之慘矣。東閣五間。夾爲前後十間。前中一間。供先聖位。爲諸輔分本公敍之所。閣輔第五員以下。則俱居後房。雖白晝亦秉燭。票擬韓城當國。特鑿一牖。復開門構數椽。以通日色。說者謂破壞風水。故首膺此禍。雖然。韓城卽不破壞風水。能免此禍哉。

是年二月。左良玉進剿張獻忠。獻忠出戰墮馬。幾被擒。復逸去。逃入瑪瑙山中。良玉令降將劉國能圍之。獻忠食盡。分賊四出抄掠。不得者歸盡殺之。其未歸者懼殺。詣軍門降。良玉因令國能將之前行。僞稱糧至。獻忠開營延入。國能乘不意縱火大戰。盡埽其營壘。斬首萬餘級。擒其妻孥。及賊黨徐以顯。潘應鰲等。獻忠批籐從巖澗逃去。捷聞。賜楊嗣昌斗牛服。是役也。獻忠精銳俱盡。止存千餘騎。走入興安平利山中。良玉進圍之。連營百里。憚險圍而不攻。獻忠因得以收散亡。養痍傷羣盜。往往歸之。勢復振。而羅汝才。過天星等賊復盡入川。嗣昌駐襄陽會師合剿。以興安一路失期。斬其監軍副使殷太白。復疏

參四川巡撫邵捷春不行堵禦捷春逮問。

五月賊羅汝才等陷四川大昌犯夔州石柱女帥秦良玉統兵來援監軍萬元吉率舟師由巫山上三峽賊十三哨過夔門魚貫而進羅汝才爲殿官兵遙望不敢擊賊循河南而行欲渡川西元吉左良玉賀人龍等皆會於夔州羅過諸賊自夔州山後抄掠官兵分扼諸隘賊掠無所得副將羅于萃擊過天星於鄭山寨敗之過天星以百騎走羣賊旣困謀奪尖山西奔賀人龍會四川總兵鄭嘉棟湖廣副總兵張應元汪雲鳳陝西副總兵李國奇之師赴之賊以奇兵攻尖山寨人龍等率諸軍奮呼直入賊陣斷賊爲二賊騎陷泥淖不得馳而川兵奔跳澗谷如猿猱城潰自相騰踐斬首千七百餘生擒自來虎等七十一人賊退屯羊橋四出抄掠石柱土司邀之於馬家寨斬首六百又追敗之於留馬埡斬賊首東山虎庚子賊屯譚家坪南北兩山山頭張幕魚鱗相掩疊官兵分道並進南山賊拔寨先走北山賊馳下直擊官軍官軍力戰賊退守山巔官軍分兵繞山後而上前後齊登賊披靡竄走澗谷諸將皆下馬緣山逐賊追奔四十里斬首千二百級賊奔迎仙寺嶺癸卯三省官兵合擊賊于嶺上賊營大亂斬首千餘級秦良玉奪羅汝才大纛擒其老營隊副場天賊突圍遁走七箐坎入于乾溪丙午羅過諸賊犯夔州下關城謀歸湖廣以瞿塘水漲不得渡總兵嘉棟副總兵應元雲鳳自雲陽出邀其前監軍元吉副將人龍等間道疾走尖山以截之夔城山溪險隘炎暑毒人賊人馬俱病汝才小秦王上天王混世王一連鷹五營走雲陽尖山壩過天星關索二營走雲陽水碓口期同會于開寧戊申人龍等追賊至七箐坎賊簡其銳爲殿以挑官軍潛以老營先走人龍擊殿後賊破之長驅擣其中堅賊大敗追至馬

溺溪。壓賊壘而軍。

六月辛亥。昧爽。人龍等前薄賊營。三路並進。大呼騰躍而上。賊驚潰。官軍逐之。斬首千二百人。俘六百人。赦其俘一桿槍。自來虎。伍林三人。隸爲前鋒。壬子。官兵臨賊而前。度賊必設伏。以相邀。參軍李仲興。高光榮。勒輕騎先往。人龍。國奇潛以大兵繼之。二將入隘。賊伏起。兩山間圍之。數重。二將戰方酣。人龍。國奇麾兵並進。聲動山谷。圍中亦奮呼以應之。賊圍開四潰。斬首五百餘級。生擒賊渠掠山虎等十六人。汝才東走。大寧之小嶺。官兵控之于夔東。己卯。過天星。關索走開縣。屯南壩。知汝才東竄。而官兵漸迫。因北走。丁巳。鄭嘉棟率諸將追擊賊于觀音山。逐北二十里。至於臨江。斬首二百餘級。張應元窮追至寶山。遇賊百餘騎。擊賊二十餘騎。餘皆大呼釋甲。賊首托天王請降。托天王卽常國安也。應元止兵。裂帛作書。令國安所部抓地虎往諭過天星。過天星曰。必托天王身至爲信。乃降。庚申。賊首高守達率麾下二百騎來奔。過天星逐之。邀去百餘騎。來歸者七十五騎。皆關西健兒。辛酉。過天星西走。官兵拔營逐之。至新寧西關外。賊騎三千。不戰而走。高守達率其健兒當先陷陣。賊大亂。馬竄禾黍中。驚蹠相騰踐。官兵蹙而射之。斬首千七百餘級。擒賊首流金錘。金狗兒。過關二賊。東奔達州。張應元等追逼之。丁卯。常國安前驅遇賊。官兵並進。斬首三百餘級。奪其營。賊奔袁壩驛。設伏溝澗中。戊辰。應元等前驅搏戰。令高世達。常國安繞谷中出擣其脅。賊伏發。方接戰。國安世達突出。大呼擊賊。賊驚墮山澗中者無算。斬首九百餘級。生擒滾地狼等十七人。降其管隊可天虎等四十人。庚午。賊自袁壩東走開縣。諸將分營出戰。鄭嘉棟將中軍。羅于萃將左軍。降將楊旭將右軍。戰於城下。賊大敗。走大昌。

張獻忠自興房走白羊出入巫山間。川兵躡之。益西入深谷中。掩旗息鼓若無人。參將曹進功率兵入山偵賊。不見一人而歸。初楊嗣昌以左良玉跋涉難制。而賀人龍所將關兵驍勇善戰。屢殺賊有功。請以人龍代良玉佩將軍印。既而良玉奏瑪瑙山之捷。度未可動。復奏留左良玉佩印如故。別加人龍總兵銜。須俟後命。人龍驟聞大將之信。踴躍動三軍。既而報寢。殊怏怏。良玉知其故意。亦懷恨。當獻忠之竄伏興房山中。也。所存千餘騎耳。剿之可立盡。乃良玉以奪懷慚。人龍復以歸印缺望。遂互相推諉。不復深入。以致獻忠復熾。皆嗣昌失二帥之心所致也。

過天星素與張獻忠有郟。聞羅張既合。遂詣嗣昌乞降。嗣昌令良玉撫其衆七千人。簡其精銳隸良玉軍中。安其老弱於郟西。以降將掃地王李靖隸監軍萬元吉標下。過天星卽惠登相也。七月。羅汝才、小秦王、上天王、混世王、一連鷹距、大寧、元吉、遣遊擊劉正國降將伍林招之。先是汝才與金翅鵬不相能。金翅鵬嘗懼爲所併。至是小秦王、金翅鵬相率降于嗣昌。汝才遂殺劉正國。伍林東走巫山。良玉分兵屯房竹間。汝才屢敗。黨羽多降。勢益孤。獻忠時在巫山。汝才往會之。謀渡川西走。諸將賀人龍、李國奇、張應元、汪雲鳳、張奏凱等合兵擊之。應元、雲鳳屯於夔之土地嶺。待人龍兵。三檄不至。癸亥。人龍兵譟而西歸。獻忠知官兵無後繼。悉銳來攻。而應元、雲鳳所將湖廣兵三千。皆新募未經行陣。賊驟至。二將簡銳卒千人搏戰。晨至日中未決。賊分兵繞後山而下。突衝營中。守營新兵皆譁。賊乘之前後皆圍。二將殊死鬪。應元中流矢。奮擊突圍出。賊方渡也。霧河。應元赴河上。然礮擊殺一賊。帥衣緋者。賊不得渡。雲鳳苦戰久得脫。渴甚。飲水斗餘。臥。血凝臆而卒。時張羅新合。嗣昌命金翅鵬部下飛上。

天入羅汝才營招之。汝才逡巡不決。獻忠懼汝才之再降也。日說汝才曰。楊閣部已俘過天星。獻闕下矣。爾慎自爲謀。元吉請檄左良玉攜惠登相至陣前招汝才必來。嗣昌不聽。汝才遂不果降。己丑。嗣昌屯巫山。遣人至關索營中招之。先是關索屢敗。伏深山中。過天星降。益懼。遂與其黨王光恩號小秦王、楊光甫號一連鷹等詣嗣昌軍前。頓首涕泣請死罪。嗣昌撫慰之。給以金幣。所部三千人。嗣昌簡其精銳。赴軍前殺賊。羅汝才之入川也。凡九股。整十萬。掃地王、小秦王、金翅鵬、托天王、過天星、關索、惟羅、張相抗。其七相繼俱降矣。嗣昌飛章上聞。敍賚文武將吏有差。

九月。官兵大敗李自成于函谷。自成奔漢南。李國奇等蹙之于北。左良玉扼武關以南。初諸將圍自成。峭函山中。分守要害。合圍甚密。將坐斃之。嗣昌曰。圍師必缺。不若空武關一路。待其走而擊之。可立盡也。自成令軍中盡殺所掠婦女。同養子李雙喜乘隙率五百騎突圍而出。諸將不能禦。遂自武關逃入鄖陽。時河南大饑。饑民所在爲盜。自成乃至鄖陽。走伊維。饑民從者數萬。圍永寧。陷之。殺萬安采。鏗再陷宜陽。勢復大振。是日張羅二賊陷大昌。進屯夔州山北。時賊行營輜重婦女甚重。衆官兵多觀望不前。但尾賊後。所至關隘守將多遠遁。遂長驅趨達州。

十月壬戌。賊渡河入巴西。陷劍州。甲子。過劍閣。由廣元走陽平關。從間道出百丈山。將入漢中。總兵趙光遠守陽平甚嚴。賀人龍、李國奇復整旆而東。賊乃踰昭化。走西川。丙寅。川兵迎賊于劍州。敗績。賊縛四將去。降將掃地王張一川擊賊于梓潼。被擒。賊副之。元吉請卹其妻子於夷陵。

十一月庚辰。嗣昌、元吉大饗將士於保寧。以諸軍進止不一。立大帥以統之。以總兵猛如虎爲正。張應元

爲副。癸未發保寧。趨綿州。癸卯。賊知大兵至。走江內。乙巳。猛如虎。選驍騎逐賊。元吉、應元屯兵安岳城下。以遏賊歸路。

十二月辛亥。賊南陷瀘州。瀘州三面皆陡絕。臨江。止石立站。一路可北走。賊旣走絕地。元吉謀以大兵自南搗其老營。伏兵旁塞險要。蹙賊北走。永州逆而擊之。可盡殲也。乙卯。元吉等至石立站。賊先移渡南溪。官兵隔水追之。不及。癸亥。賊抵成都。副將某統千餘騎夜搗賊營。賊預取土像數百置帳中。四面懸燈。而潛伏暗處。千騎望燈而趨。大呼直入。則所刦者諸土像也。急退。而賊衆四合。殲僂無子遺。自是成都專意固守。不復言搗營矣。賊趨新都。知縣黃岡固守。賊復至綿州。

是年山陝河南大旱蝗起。冬大饑。人相食。草木俱盡。土寇並起。開州人袁時中聚衆數萬破開州。時壽州有老袁一營。時中自號小袁營。以別之。後官兵復開州。時中走河南。

江北賊革里眼、左金王復犯霍英。上命太監劉斌率營兵六千馳赴江北。擊賊于霍山。敗之。賊走湖廣。陷麻城、黃梅。

河南郟縣盜李際遇、申靖邦、張鼎聚衆至五萬。總兵王紹禹遣游擊高謙擊之。一日三捷。斬首二千餘級。追擊菜園。斬首千級。

明季稗史初編卷七

烈皇小識

十四年辛巳。逮江西巡撫解學龍。布政司都事黃道周。下鎮撫司究問。學龍陞兵部侍郎。循例有薦舉。疏內薦道周。有學問直貫天人。品行無忝孔孟之語。滑縣票旨。以羣臣結黨標榜。欺侮君父。屢旨訓誡。毫不省改。學龍、道周俱遣緹騎逮下詔獄。鞠訊同黨姓名。道周供出編修黃文煥。吏部主事陳天定。工部司務董養河及從父共四人。俱下刑部獄。

清兵陷寧錦。總督洪承疇、總兵祖大壽降。自袁應泰喪遼陽。退守廣寧。王化貞棄廣寧。退守寧錦。至是清兵復犯寧錦。總兵祖大壽固守。告急於朝。先是有祖大弼者。其勇爲祖氏冠。歷官副總兵。前是清兵來攻。相顧莫敢先進。城中大恐。大弼戒無動。自率銳卒五百。直衝清營。往來馳擊。清兵披靡不能禦。遂拔營去。及是病不能師。報至上。命總督洪承疇帥大同總兵王樸等六總兵。援兵十餘萬人往救。祖寄語于洪。謂清兵強甚。難與爭鋒。可用車營法。步步進兵。卽步步列營。使彼不得逞志。逼之出塞。乃可。洪從其言。上以師久無功。令職方郎中方若麒往探機宜。若麒至。不度彼此。妄謂清兵一鼓可平。嚴促進勦。承疇不能制。清兵偵知之。臨夕設伏以待。前軍甫發。王樸率本部先遁。諸總兵至半途聞之。皆倉皇西奔。清兵以鐵騎乘之。士卒死者大半。方若麒及總兵楊國柱等。僅以身免。所喪器械資重。不可勝計。承疇、大壽皆降。事聞。舉朝震動。若麒逮問下獄。王樸處斬。國柱等革職充爲軍。立功自贖。而承疇謬以殉

難聞。卹贈太子太保。蔭錦衣千戶世襲。與祭十六壇。

召予告大學士周延儒于家。先是閣臣雖內外兼周。鮮有當聖意者。衆推宜興頗有機巧。或能仰副。而聖意亦及之。于是庶吉士張溥、禮部員外郎吳昌時爲之經營。涿州馮銓、河南侯恂、桐城阮大鍼等分任一股。每股銀萬金。共費六萬兩。始得再召。庚辰孟冬。上祭太廟。諸臣先至殿門外候駕。時殿門未啓。忽聞內有異響。衆共驚聳。俄見殿門大開。有冕旒者十餘位從內走出。頃之不見。而殿門閉如故。衆祕之。不敢言。駕至行禮之時。怪風暴起。燈燭皆滅。助祭諸臣仆地者久之。始能起。上亦以驚悸成疾。下體軟麻。不能行立。百餘日始瘳。及是孟冬祭廟之日。天氣晴和。上喜謂近侍曰。周閣老畢竟有福人。故眷注最深。

黃道周之案。久不得結。一番招上。一番嚴駁。戶部主事葉廷秀疏救。併與廷杖。淹留獄中者幾一年。宜興再入政府。竭力周旋。先是部擬學龍。道周烟瘴充軍。不允。至是刑部尙書劉澤清上疏。略曰。黃道周之罪。至瘴戍盡矣。進此惟有論死。死生之際。臣不敢不慎也。從來論死諸臣。非封疆卽貪酷。未有以建言誅者。今以此加道周。道周無封疆貪酷之罪。而有建言蒙僇之名。于道周得矣。非我皇上覆載之量也。且皇上所疑者黨耳。黨者觀諸行事。道周具疏。不過空言一二臣工。其相與者。皆從罷斥。烏有所謂黨。而煩朝廷之大法耶。去年行刑時。忽奉旨停免。今皇上豈有積恨于道周。萬一轉圜動念。而臣已論定。噬臍無及。敢仍以原擬請旨。依議。旣而黃文煥等各疏辯。有旨該部查議。部覆上有旨。准各復原官。是歲江南大旱。自春及夏無雨。高區竟未及插蒔。貧民嗷嗷望賑。蠲之詔。宜興首先輸米三百石。爲諸臣

急功者倡。于是撫按不敢言旱。各縣苛徵漕糧如額。斗米至三錢。民不堪命。

爾時當國者不必請蠲請賑。取厭帝聽。但就內外積弊。力爲清查。便可寬民命于萬一。如光祿寺歲派無錫縣上供白米一千三百三十石零。歲用七百餘石。則每年多存六百餘石。浙直各府歲派分給部堂翰林尙寶科道等衙門白米一萬二千一百餘石。歲用共八千餘石。則每年多存四千餘石。每年衛所運解漕糧入祿米倉者五百餘萬石。除文武各官支過俸米外。其蠶食其中者。則有營兵衛軍衛役三蠹。營兵則有冒名之弊。如司苑局四驥軍勇神木黑_闕等廠。以中涓爲三窟。歲糜餉三十萬石矣。衛軍則有造冊之弊。今溢額者將及二萬人。一軍應支餉十二石。是歲耗米二十四萬石矣。衛役則有賣票之弊。凡官錦衣者。虛領十餘票。皆托名吏役。每票支米六七石不等。是歲耗米三十萬石矣。漕撫標兵五千。皆食江南糧。衛軍領解。止行給八百里行糧。不應與解京者同給三千七百里行糧。此項釐剔。亦可省米三萬石。更由此而推之。內府收貯香蠟燈草絲綿等項。額徵銀五萬餘兩。年年委積無用。此項不可裁乎。薊遼犒賞公費。重複支用。多至二十三萬兩。舉一邊而各邊可知。此項不可節省乎。又如上供磁器。又料價藥料。一切不急之需。暫停一二年。可省金錢數十萬。若能逐項清查。以佐國用。將朝廷不苦于虧額。蒼黎咸樂于更生。相臣造福。豈不普哉。不此之圖。而沾沾首輸。爲天下倡。將以是盡臣職乎。甚矣其不講於大道也。諸令中長洲知縣葉承光尤酷。拔取富室充兌。賄入則免。有過客問訊其宦況者。曰。賴有此荒耳。衆心憤恨。幾激民變。巡撫黃希憲曲庇之。僅以調簡行。復以標兵護之出境。

是年正月。李自成圍河南府。福王募死士逆戰。斬獲頗多。賊引退。賊復以大礮攻城。守嚴不動。及昏而退。總兵王紹禹標兵有馳呼于城上者。城外亦呼以應之。北兵既執守道王允昌于城上。紹禹辭解之。諸軍曰。賊已在城下。卽總鎮其如我何。揮刃殺守陴者數人。守陴者皆驚散。賊緣堞而上。叛兵迎之。賊遂入城。焚福王府。福王母子俱縋城走。王允昌等各官俱被執。俱不死。惟一典吏不屈見殺。後自成跡福王所在。執之。并執原任兵部尙書呂維祺。遇王于西關。謂王名義甚重。毋自辱。王見自成。泥首乞命。自成歷數其罪。遂遇害。維祺罵賊不屈死。世子奔懷慶。自成僞稱闖王。雄冠諸賊。事聞。上震怒。逮總兵王紹禹。磔之。籍其家。

山東土賊李廷實、李鼎鉉陷高唐州。時山東盜起。兗屬州縣。一時嘯聚響應。東平令胥迎賊入城。据之。巡撫王國賓發六道官兵防兗州。檄總兵劉澤清擊破東平賊。復其城。

河南土賊艾一侯、二等嘯聚數千人。武邱知縣蘇茂柏擊破之。

獻忠潛至巴州。乘其迎春襲破之。恣掠三日。趨達州。新寧開縣焚毀驛道。人烟絕斷者七百餘里。初賊之南竄也。元吉欲從間道出梓潼。扼歸路以待賊。嗣昌檄諸軍躡賊追逐。不得距賊遠。令他逸。諸將皆盡向瀘州。賊折而東返。遂莫爲堵遏。賀人龍頓兵廣元不進。己丑。猛如虎率諸將追及賊于開縣。日暮雨作。諸將咸以人馬困乏。詰朝請戰。參將劉士傑曰。自瀘州逐賊。馳驅四旬。僅而及之。今遇賊不戰。縱敵失賊。誰執其咎乎。請爲諸軍先。揮戈獨進。賊屢却。如虎亦率親兵從之。獻忠憑高而望。見後軍無繼。左軍皆遲回不前。因簡精銳繞官軍後馳而下。左軍先潰。士傑及游擊郭關如虎子猛先捷。皆戰死。前軍

已覆。如虎突戰潰圍出。馬仗軍符盡失。賊東走巫山。大昌監軍元吉赴開縣。收集殘兵。祭陣亡將士。哀慟三軍。嗣昌在雲陽。聞開州失利。始悔不用扼歸路之謀矣。初賊由達州而西也。嗣昌策其必入陝。檄左良玉自興山趨漢中。及賊東走。復檄良玉自夔門進勦。使者憚行。中途返命曰。賊已入漢中矣。既又使人諭良玉曰。賊向漢中。可急援。良玉不應。嗣昌之使十九返。良玉怒曰。向從都督命。瑪瑙山安得給乎。遂撤兵去。賊下夔門。竟無一人相拒者。賊既渡險。出巫山。晝夜疾走入歸興山中。羅汝才亦入湖廣。惟搖天動留川中。元吉屯兵八百于白帝以備之。

二月。李自成以邵時昌爲河南僞知府。而席捲子女玉帛入山。巡撫李仙風偵賊已去。引兵入城。收時昌斬之時。土賊蠶起。一斗穀。瓦灌子等諸盜皆合于李自成。同攻開封。巡撫高名衡率司道官嬰城固守。賊攻七晝夜不克。周王恭樛出庫金五十萬助餉。復懸金募死士能殺一賊者。立與五十金。兵民踴躍爭先。賊死者甚衆。賊懼退數舍。巡撫李仙風率諸將高謙等馳至開封。與總兵陳永福內外夾擊。大破之。永福射自成中其左目。賊乃退。既而仙風名衡互相訐奏。詔逮仙風。以名衡巡撫河南。

獻忠、汝才復從山中出。趨當陽。鄖撫王永祚扼之于房竹。遂走宜城。偵知嗣昌有檄至襄陽。要之于途。取檄遣賊僞充公差。夜扣襄陽城門。巡道張克儉見有符驗。延之入。時二月初八日也。先是官兵獲獻忠妻孥。及賊黨徐以顯、潘應鰲等。俱禁襄陽獄。知府王承曾素縱飲漁色。見獻忠易視之。疎其防。賊乃入獄。與徐、潘等相約。漏四下。徐、潘等破獄出。殺守門卒。開城門迎賊。賊盡入。先攻襄王府。焚端禮門及諸樓臺。合城鼎沸。初九日獻忠入城。僭坐襄王殿。坐王堂下。勸之以卮酒曰。吾欲斬楊嗣昌頭。而嗣昌遠

在川。今當借王頭使嗣昌以陷伏法。王其努力盡此一盃。遂遇害。宮眷無一存者。并殺桂楊王常法。時城內守兵數千。軍資器械山集。盡爲賊有。推官鄺曰廣被執。大罵不屈死。署襄陽知縣李天覺北面叩頭。置印于案。自縊死。左良玉在唐縣。聞襄陽陷。股栗不能起。久之。與鄖撫王永祚統兵赴援。癸丑。賊棄襄陽。渡江破樊城。己未。陷當陽。乙丑。陷新野。光州。

江北革。左諸賊因官軍四集。急而議款。監軍楊卓然議安插于潛。太間。然二賊實無降意。公行劫掠。卓然每左右之。及襄福二藩相繼遇難。二賊乘機復熾。命朱大典督諸軍討之。

河南賊孟三陷河陰。據之。游擊高謙攻拔河南。斬孟三。

三月丙子。楊嗣昌自盡。嗣昌以連失二郡。喪二親藩。度不能免。遂自縊死。監軍萬元吉部署行營。令猛如虎駐蘄州。防獻賊東軼。事聞。左良玉削職戴罪討賊。鄖撫王永祚。知府王承曾。襄府長史唐時。俱著撫按解京提問。

山東巡撫王國賓革職。以王永吉代之。時東省大饑。民間父子相食。徐德數千里。白骨蔽野。行人斷絕。饑民相聚爲寇。曹濮上賊尤熾。上命總兵楊御蕃。劉澤清合兵勦之。

四月。以丁啓睿代楊嗣昌總督軍務。左良玉自襄陽進擊李自成。屯南陽。自成屯盧氏。盧氏舉人牛金星迎降。又薦卜者宋獻策。獻策長不滿三尺。見自成。首陳圖讖云。十八孩兒兌上坐。當從陝西起兵。以得天下。自成大喜。奉爲軍師。

張獻忠犯應山。知縣章自輝擊却之。遂陷隨州。知州徐世淳合家死難。吏民屠僇無遺。隨州爲四冲之地。

其初陷也。知州王燾死之。至是三陷矣。

五月。以東寇孔棘。特設津、徐、臨、濟四鎮總兵。專護漕運。又以河道張國維係工部侍郎銜。不便節制四鎮。乃改銜兵部侍郎。

河南土賊袁時中犯蒙城。朱大典擊敗之。總兵劉良佐簡驍騎自義門追擊。賊大敗奔潰。時中以數百騎宵遁入河。

泰安土賊掠寧陽、曲阜。聞青州兵至。遂走邳州。焚其南郭。至沙溝。屠僇甚慘。遂犯徐州北關。轉至南河店。燬漕船十六隻。

賀人龍破李自成于靈郊山中。時保定總督楊文岳屯禹州。左良玉屯南陽。猛如虎屯德安。適疽發于背。退屯承天。

癸巳。出傅宗龍于獄。總督陝西兵討賊。丁丑。宗龍至新蔡。會楊文岳、賀人龍、李國奇、大威等。共結浮橋渡河。合兵趨項城。戊寅。諸軍畢渡。走龍口。是日李羅二賊將趨汝寧。覘官軍至。盡伏精銳松林中。楊驅諸賊西渡。人龍先走。賊追及之于項城。執宗龍至城下。令呼開城門。宗龍大呼曰。我已爲賊所執。爾等當死守。毋墮賊計。賊斲其耳目。死城下。人龍、國奇俱西歸。賊陷項城。屠之。詔復宗龍兵部尙書。贈太子太保。李羅二賊合兵擊葉縣。守將劉國能卽飛來虎也。誓師力戰。賊悉衆來攻。國能身被數十槍。氣愈厲。部下勸暫逸。圖復舉。國能曰。朝廷旣赦我死。又加爵命之榮。萬死何辭。自成羽毛已成。不可復制。何再舉之可圖。盡殺其軍中馬騾饗士。黎明。分兵爲十隊。偏裨各率其屬。馳逐大戰。至辰復聚。則死者過

半矣。又分爲五隊。賊亦分兵圍之。更番迭戰。以逸待勞。國能率殘丁短兵相搏。至夜。度不能脫。仰天呼曰。我力盡矣。遂自刎死。部下無一降者。事聞。詔贈國能左都督。

六月。左良玉擊張獻忠于南陽之西山。敗之。獻忠西走。攻南陽。知府顏日愉堅守不下。遂襲泌陽。陷之。七月。獻忠圍鄖陽。守將王光恩禦之。多殺傷。遂退。總兵黃得功標下兵叛去。投獻忠。令之破鄖西。辛卯。鄖兵與獻忠戰。敗績。獻忠將被擒者。人斷一手。縱歸。以辱官軍。

八月。獻忠乘勝掠信陽。時總督丁啓睿與左良玉俱屯南陽。頓兵不進。至是。良玉始至南陽。引兵逆擊。獻忠于信陽。大破之。斬其渠魁五人。獻忠負重傷。易服夜遁。良玉軍聲大振。戊午。獻忠收餘衆走鄖陽。驟遇官軍。不戰而潰。還走南陽。越十餘日。良玉始至。則獻忠越南陽而東久矣。時羅李方合。獻忠因汝才以奔李自成。自成方強。欲屈之。獻忠不爲下。自成怒。欲殺之。汝才陰選五百騎。資獻忠。令他往。獻忠乃晝夜東馳。與革回諸賊同入霍。

十月。太監劉元斌、盧九德率京營京兵追賊至壽州。及之。元斌留四十日不進。城門晝閉。縱兵大掠。殺樵汲者。以冒功。旣而欲攻城。州民斂數萬金賂之。乃免。

十一月。總督汪喬年率總兵鄭嘉棟、牛成虎、賀人龍趨河南。先是。喬年于陝西發李自成先塚。得小蛇。卽斬蛇以徇。誓師東下。抵浹縣。襄城舉人張永祺率邑人迎官軍。屯于城中。自成聞之。盡衆來迎戰。時喬年安營未定。有二將先逃。官軍大潰。賊乘之一軍盡沒。喬年以數百騎入城拒守。五日。襄城陷。喬年自刎未死。被執見殺。并殺守將李萬慶。卽射塌天也。自成深恨諸生。劓刖百九十人。又購永祺。永祺遠遁。

屠其族人九家。乘勝圍南陽。破之。唐王遇害。總兵猛如虎死焉。鄧州等處皆降。知州鄧振世死之。太監劉元斌統兵救襄城。聞南陽陷。乃擁婦女北去。

十二月。自成連陷許州。鄢陵等縣。知縣劉振之。衣冠北向再拜自刎死。復陷禹州。徽王遇害。再圍開封。高名衡、陳永福等竭力守禦。周王貯庫金于城頭。擒一賊者百金。殺一賊者五十金。戰歿者卹其家五十金。被傷者以輕重爲差。殺賊者甚衆。永福射自成中其左目。乃屯朱仙鎮。

上以朱大典受命督師。縱賊流毒。著革職聽勘。以高斗光代之。

十五年壬午正月元旦。上御殿朝賀畢。下寶座南面正立。顧內侍曰。召閣臣來。閣臣由殿東門入。再奉旨趨至殿簷。行叩頭禮畢。跪以俟命。上曰。閣西班來。蓋以師席待諸輔也。閣臣起立。不知聖意。擬取東西兩班。上又曰。閣臣西邊班來。隨有一闕下引而前。上宣閣臣來。諸輔趨進。上曰。古來聖帝明王。皆崇師道。今日講官稱先生。猶存遺意。卿等卽朕師也。敬于正月端冕而求。聖躬轉而西面。向閣臣一揖曰。經言修身也。尊賢也。敬大臣也。體羣臣也。朕之此禮。原不爲過。又曰。自古君臣志同道合。天下未有不平治者。上諭至此。辭意甚嚴重。又曰。職掌在部院。主持在朕躬。調和在卿等。諸閣臣跪伏謝罪。才不敢當。上曰。先生正是朕該敬的。言之再三。隨諭先生起來。諸輔臣始起。轉下叩頭。上還宮後。復補賜聖諭一道。時諸助臣不知所以。亦相率疾趨。上曰。東班去。

時行取各官待命闕下。皆仰祈宜興手援。適漕運愆期。宜興因言漕艘至今尙未開封。南回皆以巡漕未補。無人催趲。請速下諸科道缺。上從之。於是馬嘉植等咸授科道。無授部曹者。滑縣接韓城衣鉢。每票

旨輒深文詆譎。黃道周之獄。皆出滑縣手。宜興再召。并研鞫事事。請教惟謹。而滑縣專行自如。宜興大不以爲然。御史楊學愿具疏將糾之。或謂滑縣曾巡撫江西。于楊有部民之誼。不便。乃授馬嘉植上之。滑縣一疏引疾。宜興卽票旨准回籍調理。

大學士謝陞罷。德州由外廷入。聖眷頗隆。去冬上用十一般茶飯禮。祭光廟御容。諸閣臣陪祭。德州最後至。糾儀臺省糾之。德州疏辯。言臣將出門而衣帶忽斷。再續再斷。以是後朝。乞將臣與縫衣者同下法。司嚴加訊鞫。雖奉旨免議。而聖意已移矣。時邊塞議款。上頗祕其事。德州與新咨臺省訟言其不可。給事中朱徽首先糾劾。謂事關宗社。謝陞身係大臣。旣知不可。卽當極諫。乃諫諍不聞。而昌言于衆。以暴揚皇上之過。大不敬無人臣禮。上震怒。奉旨有朕心甚痛之語。將大有所處分。而羣臣隨聲附和。不下百餘疏。聖意遂從輕。止削籍爲民。

御史楊學愿疏略曰。臣伏讀聖諭申飭交結內侍之律。因稽太祖高皇帝時。初無所謂緝事之令。臣工不法。止有明糾無陰訐也。臣待罪南城。所見詞訟多假番役。妄稱東廠。甚者誣人作奸。挾仇首告。夫餌人以陷禍。擇人而肆喙。惟恐其不爲惡。又惟恐其不卽罹於法。揆之皇上泣罪解網之仁。豈不傷哉。伏乞皇上先寬東廠條例。夫東廠寬而刑罰可以漸省。抑臣又有請焉。外臣獲罪。但敕撫按檻車送詣闕下。未爲不可。若緹騎一遣。有資者家產破散。無資者地方斂餽。爲害滋甚。有旨東廠所緝。止于謀逆亂倫。其作奸犯科。自有司存。錦衣校衛尉毋得奉差需索。

五月。逮鳳慶總督高光斗。安廬巡撫鄭二陽。起馬士英總督鳳慶軍務。士英先爲王坤所糾遣戍。至是會

推鳳慶總督。士英列名其中。上怒甚。曰。會推大典。輒以廢棄竄名其間。冢臣欺蔽殊甚。刑部右侍郎徐石麒奏曰。冢臣豈敢欺蔽。實以馬士英會歷邊疆。頗有才略。禁錮可惜。今止開列候。皇上裁奪。惟是冢臣不先奏明。誠爲有罪。上怒始霽。曰。馬士英既說他有邊才。卽著他去。遂起陞兵部右侍郎。總督鳳廬安慶等處軍務。

六月。吏部尙書李日宣罷。時當枚卜。外僚房可壯。張三謨。宋玫預焉。先是御史廖惟一。并研姻戚也。時當考核。并研託可壯爲道地。不應。并研因涉蜚語。謂此番枚卜。皆可壯三人主持。上入其說。召廷臣于中左門。上青袍。皇太子定王永王侍。上詰吏部尙書李日宣曰。朕屢諭諸臣毋寧背君父。不背私交。寧墮職業。不破情面。今日枚卜大典。會聚推舉。自當矢公矢慎。乃稱託徇情。如房可壯。張三謨。宋玫。並濫與會推。此豈大臣之道。並責吏科都給事中章正宸。河南掌道御史張暄。幾欲重典。閣臣力救。乃下日宣等于獄。時吏部左侍郎現缺。右侍郎雷躍龍久不到任。上呼禮部左侍郎王錫袞出班曰。吏部印著你署掌。王遂改吏部左侍郎。署部事。卽閣臣以枚卜請。上點用晉江蔣德璟。黃景昉。興化吳甡。俱以禮部尙書入閣辦事。而起陞鄭三俊爲吏部尙書。蔣黃同邑。同時。極稱盛事。

四月中。順天三河縣地方。半空中忽墮下一龍。牛頭而蛇身。有角有鱗。宛轉叫號于沙土中。以水沃之。則稍止。撫按不敢奏聞。如是者三晝夜。乃死。東宮田妃最有寵。是夏田妃病篤。徧走羣望。上咸躬致禱焉。臨終。上適往他殿行香。不及。永訣。回宮大慟。喪禮備極隆厚。田妃有妹。曾入宮。上授以花一朵。卽令插髻。上曰。此是我家人也。妃薨後。上留心其妹。甲申春。已有旨採擇淑女。以備六宮。候冬間舉行。未幾。

遇變。金壇盛順者，宜興幕客也。欲題內閣中書，而又欲得科目爲重。壬午北闈，大理評事李森先已有成約，外議頗著。給事中楊枝起疏糾之，森先降調，不及預同考。及榜發，盛仍列名。監場御史徐殿臣力持不可，乃抽出。鄉試大典，雖曰矢公，然夤緣未能盡絕。至關防潰裂，顯行無忌，則莫若壬午時宜與弟肖儒子奕封，以及親入子弟，無不入彀。衆官效尤成風，不復問文藝矣。說者謂隱匿災荒，濫黷大典，上負聖眷，下負輿望，賜死之禍，實自取之。後有坐以縱敵之罪者，夫力能殲敵，方能縱敵，不坐以不可逃之律，而加以莫須有之案，恐反授宜興以口實也。

十月，吏部題臣父生死蒙恩等事，奉旨文某准贈禮部尙書。蔭一子入監讀書。先文肅以九年六月棄世。十一年二月，南京給事中張焜芳疏末有云：故輔文某，骨鯁性成，勁介絕俗，以天下爲己任，數月揆席，正色危言，觸忤去輔，禍機遽發，以致忠憤填膺，費志以沒。今歷二年餘矣，子孫不敢陳乞，撫按不敢代題，竟與草木同其朽腐。皇上恩禮舊臣，隆賜講幄，而使文某幽光弗耀，典禮缺如，優卹易名，豈可一日緩乎？六月，淄川請告，給事中吳麟徵疏言：張至發之歸，皇上優禮有加，臣知皇上始終優禮大臣也。因全故輔文某，與至發同蒙特簡，兩月政地，一語招尤，省過責躬，溢焉朝露，其進也由聖明，特達殊恩，非藉旁門倖竇，其去也由同官意見相左，非係納賄徇私。今棄世已二年餘矣，撫按不敢代題，子孫不敢陳乞，惟皇上哀而矜之。韓城票卹典出自朝廷，何得徇私市恩，御筆抹去，止批該部知道。十二年四月，吏部驗封司署司事主事胡璇案呈，前署部左侍郎董羽宸具題，奉旨文某准復原官致仕。九月，不肖乘上疏請卹臣父生死蒙恩，微臣感戴申悃等事，奉旨該部知道。十三年三月，禮部祠祭司郎中劉大

垣案呈前事。尚書林欲楫具題奉旨。卹典必須實蹟。這本如何竟請。還著再行核奏。亦韓城所稟也。後韓城獲譴。宜興再入政府。十五年四月。祠祭司署司事員外吳泰來案呈前事。尚書林欲楫具題奉旨。文某准予祭一壇。減半造葬。仍加祭一壇。以示優禮。至是吏部驗封司署司事主事張文燧案呈前事。署部事左侍郎王錫袞具題奉有令旨。兵部尚書陳新甲處決。新甲四川人。由舉人歷任本兵。蓋楊嗣昌薦以自代。爲款局地上。亦知邊防不足恃。姑藉款以暫紓目前。後以傅宗龍言。召新甲切責。謝陞獨進曰。清果許款。款亦可恃。于是遣馬紹愉往建州。清不表謝。而復得大嫚書。上大悔恨。然自張若麒僨事後。舉朝之人無不願款者。新甲復申其說。上親發璽書。加紹愉太僕少卿銜。而鄭重遣之。乘傳至塞外。邊臣張筵宴清使。清使一語不答。云待國主命。及國主至義州。責諸人私通中國。將殺我使。譯事者再四叩頭祈請。乃免。馬紹愉匍匐歸。科道諸臣惡其辱國。連疏糾之。并盡列新甲奸罪。上雖怒甚。隱忍未卽發。適新甲有疏。細陳款事顛末。內多援引聖諭。此疏誤爲書役發科抄傳。兵科某據疏抄糾參。上意新甲見賣。下嚴旨切責。且令回話。新甲具疏回話。絕不引罪。反自詡其功。有某事人以爲大功。而實臣之大罪等語。不一而足。上愈怒。著革了職。刑部提問。部引失陷城寨律斬。宜興并研合詞求免。以北兵未薄城爲言。上曰。陳新甲職任中書。一籌莫展。致令流賊狡獪。戮辱我七親藩。不更甚薄城乎。遂奉旨陳新甲著卽會官斬決。新甲去任。以馮元飈爲兵部尚書。元飈素習占風望氣。揣知寇敵交訐。翦滅無術。乃佯稱病。一日在朝班。僞稱疾命。曠眩仆地。扶曳而出。長安班役婦孺皆嗤其爲細人伎倆。辱朝廷而羞當世之士也。元飈去。以張國維代。

十一月。清兵入犯。蓋於今四犯矣。越畿甸而南掠山東。破兗州。魯王南走。守道陳之伸逃。知府鄧藩錫死之。破莒州。知州景淑汴大罵不屈死。復闌入南直界。烽火及于徐邳沭陽。時江浙九省入覲官。既陞任。差回各官。俱鱗集于淮安度歲。

是年正月。山東賊李青山攻兗州。給事中范淑泰、魯府長史俞起蛟擊敗之。擒青山獻闕下。曹濮諸賊亦次第勦散。李自成攻開封益急。穴城而置礮于中。選銳賊披甲以然。礮發城崩。卽乘勢衝入。乃礮反外向。銳賊皆死。而城屹然不動。賊駭解圍去。至五月復來。用宋賊計。圍而不攻。以坐困之。

三月。李羅二賊圍陳州。兵備關永傑率士民固守。賊周圍四十里。更番進攻。力竭城陷。永傑戰死。城下鄉紳崔泌之舉人王受爵等。咸手刃數賊被擒。大罵被殺。賊屠陳州。張獻忠攻舒城。四月。舒城陷。時舒城無令。參將孔廷訓領兵千人。與鄉紳胡守恆率士民固守。廷訓降于賊。開門納之。賊執守恆。大罵不屈。以刃刺其腹心死。隨令廷訓攻霍山。李自成陷太康睢州。進圍歸德。歸德無兵。民自爲守。賊鱗次穴城。城陷。推官王世琰死之。

五月。復孫傳庭原官。總督陝西兵討賊。傳庭檄召諸將于西安聽令。固原總兵鄭嘉棟、臨洮總兵牛成虎、援剿總兵賀人龍。坐旗下數之曰。爾奉命入山討賊。開縣噪歸。猛帥以孤軍失利。獻賊出柙。職爾之由。爾爲大將。遇賊先潰。致秦督師委命賊手。一死不足塞責也。因命斬之。諸將莫不動色。以人龍軍分隸諸將。刻期進討。襄城之役。朝議疑人龍與賊通。故傳庭殺之。諸賊聞人龍死。咸酌酒相慶。張獻忠襲陷廬州。時督學御史以較士至郡。賊數百僞爲諸生。應試者。潛寓城中。甲戌夜三鼓。獻忠捲甲趨至城。

下舉火。城中賊亦舉火以應之。守城者驚潰，遂陷。督學某，兵備蔡如蘅逃。知府鄭履祥死之。廬州城池高深，賊屢攻不能克。至是一夕陷。革左諸賊趨壽州。潁川參將李詡偵知之，伏兵城東南隅，而統銳師迎戰于城南樊家店，伏兵統其後夾擊，大敗之，斬首千餘級。

六月起，侯恂兵部侍郎，總督官兵剿賊，與孫傳庭協力援開封。

七月，各鎮援兵潰于朱仙鎮。時山西總兵許定國援開封，先潰于懷慶。總督丁啓睿、保督楊文岳、總兵左良玉、虎大威、楊德政、方國安等，各統兵會于朱仙鎮，與賊壘相望。啓睿諸軍進戰，良玉曰：「賊鋒方銳，未可擊也。」啓睿曰：「汴圍已急，豈能久待，必擊之。」諸將咸懼，請詰朝戰。良玉歸營，即率軍走襄陽。諸軍相繼而走，二督營亂。啓睿、文岳聯騎走汝寧，賊逐之，追奔四百里，喪馬騾七千，軍杖糧草無算。官兵數萬降于賊。啓睿勅書印劍俱失。事聞，啓睿逮下獄。文岳革職候勘。張獻忠陷廬江，焚戮一空，還陷六安州。將州民盡斷一臂。男左女右。總兵黃得功、劉良佐來援，再戰敗績，獻賊遂謀渡江入南京。

八月，河決開封。時開封被圍久，周王先後捐庫金，金盡再捐歲祿。歲祿亦盡。城北十里枕黃河，巡撫高名衡、推官黃澍等欲引河水環濠以自固，更決堤灌賊。賊可魚也。及決河，賊已先營高處，其移營不及者亦死萬人。河流直衝汴城，勢如山岳，自北門入，穿東南門出，出渦水，水驟長二丈。士民溺死者數十萬。高名衡、陳永福咸乘小舟至城上。周王率宮眷及諸王從後山逸出，露棲城上。雨中者七日。總督侯恂以舟迎王，總兵卜從善水師亦至。推官黃澍從王舟乘夜渡達堤口。城中遺民尚餘數萬。賊乘舟入城，盡虜以去。邳亳以下皆被其災。上聞之痛憤，下詔優慰周藩，授黃澍爲御史。孫傳庭兵至南陽，李羅

二賊西行逆之。傳庭設三伏以待。牛成虎將前軍。左勦將左。嘉棟將右。高傑將中軍。成虎佯奔以誘賊。賊逐之。入伏中。成虎還兵力戰。高傑、董學禮突出翼之左。勦、嘉棟左右橫擊。大敗之。斬首三千級。賊潰東走。追擊又敗之。賊盡棄甲仗軍資於地。官軍爭取無復隊伍。賊兵即乘之。左軍先潰。諸軍皆走。喪材官將領百七十人。事聞。詔傳庭立功自贖。

九月。黃得功、劉良佐復統兵逐獻賊。賊走潛山。賊將一堵牆爲殿。營于山上。二將捲甲急趨。夜半。緣山後噪而登。賊驚起失措。官軍奮擊。賊大奔。追逐六十里。斬首千餘級。獻賊潰圍走安慶。執一堵牆焚殺之。十月。良佐再擊獻賊于安慶。敗之。獻賊走蘄水。

閏十一月。李羅二賊圍汝寧。將軍孔貞會以川兵屯城東。楊文岳以保定兵屯城西。與賊相拒。一晝夜。川兵潰。次日。賊四面環攻。雲梯如牆而立。一鼓百道並登城。遂陷。執文岳及兵備王世琮于城上。皆厲聲大罵。賊怒。縛二人。以礮擊之。糜爛死。世琮初爲河南府推官。禦賊矢貫耳不動。號王鐵耳。賊屠士民數萬。留八日。拔營走確山。向襄陽掠崇王。由棧及世子諸王妃嬪以行。

十二月。李羅二賊以數萬騎至樊城。左良玉營於樊城高阜。乘高飛礮。擊殺賊千餘。賊從間道至白馬渡。良玉移營拒之。賊分兵陷荆門夷陵。逼荊州。良玉全師出漢口。下武昌。次於金沙洲。偏沅巡撫陳睿謨棄荊州。奉惠王走湘潭。李賊遣老回回據夷陵。革里眼趨德安。荊州士民開門迎賊。李賊遂入荊州。十六年癸未。大學士周延儒請督師剿北兵。又以軍機事密。章奏無以爲信。用文淵閣印以行。說者以閣印不宜移動。動必有咎。後果罹韓城之禍。大學士吳甡奉命督師剿賊。欽給銀五萬兩。軍前支賞。加

萬元吉兵部職方司郎中督輔軍前贊畫

四月北兵盡行出口。京師解嚴。大學士周延儒仍入閣辦事。大學士吳甡罷。興化向巡歷山陝。以能折衝名。今春督師剿賊。與宜興同時受命。興化留寓京師。料理各項。復上疏邀請諸事件。迨宜興事竣。已復命矣。猶未成行。奉聖諭。輔臣姓受命督師討賊。自當星馳受事。乃三月以來。遷延不進。未出都門。籌畫莫展。若在行間。何以制勝。還宜在閣佐理。不必督師。興化具疏引罪乞休。有旨准回籍。廷杖行人司副熊開元。給事中姜埰。仍下之獄。開元由給事中調外。既轉司副。滿望即陞京卿。而稽遲不遷。頗生觖望。時楚事方盛。正媒孽宜興。上以邊警廣求直言。開元疏請對。上召入德政。開元訟言羣臣徇私結黨。皇上孤立無助。且奏且目宜興。宜興惶悚無地。上諭速補疏進覽。宜興一面令人邀結開元。阻其補疏。一面進揭言臣孤子寡援。蒙皇上寵眷。每事不敢避忌。羣小非一日矣。即今開元所陳。皆無實指。因言楚中若某若某。皆朋謀樹黨。其剗刃于臣者。皆爲擁戴邱瑜。代爲掃除耳。上覽揭心動。急促開元補牘。開元已吞宜興之餌。遲回不即具疏。嚴旨頻下。始具疏言延儒以釋纍囚。蠲宿逋。起廢籍。自謂有裨于聖德。孰敢起而攻之。願皇上徧召羣臣。問延儒賢否。即以所論賢否定。其人之賢否。皇上若不加體察。一時將吏狃于賄賂。雖失地喪師。皆得無罪。誰復爲皇上捐軀報國者。疏入。上怒甚。下錦衣獄。適是時密雲巡撫王繼謨奉旨議處。寧武兵備錢天錫欲得其缺。求緩于給事中楊枝起。廖國遴二人。期以事成。萬金爲壽。楊、廖爲懇于宜興。宜興許之。然未言及爲壽事。楊、廖出。再爲請益。復益萬金。嗣天錫會推兪旨已下。時又有匿名書二十四氣之說。隱詆朝紳。上特爲頒諭一道。戒飭言官。內有爲人出闕之

語。此蓋皇上破羣臣之積習而告誡之。非爲天錫發給事中姜垞探之未真。疏言皇上修省罪己。又致誠言官。惟視言官獨重。故望之獨切。若云代人規卸。安敢謂盡無其事。臣獨展轉而不得其故。皇上何所聞而云然乎。如誹語騰謗。必大奸巨慝。惡言官而思中之。謂不重言官之罪。不能激皇上之怒。箝言官之口。後將爭效寒蟬。壅閉聖聽。誰爲皇上言之哉。疏入。宜興激上怒。下詔獄。根究主使。招上俱與廷杖。宜興必欲致開元于死。緹帥駱養性曲爲護持。得免。開元下獄後。始知前之詔諭非爲密撫。而密撫之更替。宜興實無私。乃自悔其多事。有南京御史孫鳳髦從獄中視之。開元吐其情。願一白而無由。孫山東產。直質人也。願爲代白。先具疏引其端。有旨著明白具奏。孫正擬暢言其事。楊廖危甚。急乘間酖之。其子具揭申究。楊廖百計潛消之。然其事傳布長安。宜興之心跡已明。於是王繼謨仍照舊巡撫。錢天錫革職逮問。與楊枝起。廖國遴俱革職同下獄。上傳諭黃道周著以原官起用。宜興承上深眷。其應對實敏捷。凡聖怒。人莫能挽回。惟宜興談言微中。道周之獄。人皆以爲不可救。宜興業已周旋得釋矣。上偶言岳忠武事。歎曰。今安得如岳飛者而用之。宜興進曰。飛自是名將。然如破女真事。史氏亦多虛張。卽如黃道周之爲人。傳之史冊。不免曰其不用也。天下惜之。上默然。次日卽有此諭。左都御史劉宗周。刑部尙書徐石麒。左僉御史金光宸同罷。時上召廷臣于中左門。問禦敵剿寇及用督撫事。宗周奏曰。使貪使詐。此最誤事。爲督撫者。須先極廉。上曰。亦須論才。時西人湯若望等精于火器。御史楊若喬奏。火器爲中國長技。當從西人演習。宗周奏。唐宋以前。用兵未聞火器。自有火器。輒依爲長城。誤實在。此上色不懌。宗周又請釋熊開元。姜垞云。廠衛不可輕信。是朝廷有私刑也。上怒。仰視屋梁曰。廠

衛俱爲朝廷。何公何私。光宸奏。宗周無他意。上益怒。宗周免冠謝。旣退。各具疏引罪。有旨。宗周爲民。光宸調用。時開元等已下刑部擬罪。尙書徐石麒擬姜琛遣戍。開元贖徒。宜興大忤。遂票嚴旨以進。石麒再疏乞休。有旨著冠帶閑住。下順天府丞戴澳於錦衣獄。澳浙江奉化人。奉化小邑也。澳起家進士。及官吏部。威行郡邑。其子尤恃勢縱惡。奉化錢糧共二萬餘。戴氏居其半。歷任知縣。皆以錢糧拖欠罷官。至是吏部特授進士胡昱泰爲奉化令。胡下車。卽延耆老諭之曰。吾知奉化錢糧所以不起者。專由戴氏。吾今先徵戴氏。而後徵民戶。乃籤提戴氏家人追比。而恃頑如故。卽提戴子親身赴比。戴子怒。急走京師。愬之澳。勒澳立刻出疏參胡。澳曰。胡令初到無款單。且以部民參父母官。亦覺不便。而刦于其子。姑出一疏。天下治亂。係於守令。守令得人則治。不得人則亂。有旨。奏內所陳。必有實據。著指名回奏。澳窘極。乃以嘉興推官文德翼入告。事下撫按。旣而撫按皆爲文訟。冤給事中沈迅。遂疏參澳。謂澳之疏專爲胡昱泰。而所以欲參昱泰者。專爲錢糧拖欠。昱泰法追比耳。於是有旨。戴澳革職爲民。下錦衣衛究問。

明季稗史初編卷八

烈皇小識

十四年八月十九日。聖駕視學。釋奠禮成。步至東西廡。徧閱諸先儒神位。因召禮部左侍郎王錫袞、右侍郎蔣德璟、祭酒南居仁、三臣諭曰。宋儒周程張朱邵六子。有功聖門。最大。今稱以先儒。位在漢唐諸儒下。禮殊未稱。爾部會同詹翰等官。議所以尊崇之。至於六子格言。卽督令儒臣編纂成書。以弘聖教。三臣承旨。卽于九月題請開館編纂六子諸書。而尊崇位號。時廷議不一。不果行。

大學士周延儒罷。延儒林居時。長興周仲璉特往通譜。敘叔姪禮。事之惟謹。延儒之再召也。秀水吳昌時爲之效奔走。延儒入都。仲璉官兵部員外。昌時官禮部郎中。共入其幕下。每朝夕輒便衣直達臥室。與侍者交通。探聽閣中消息。隨在外招搖市權。昌時醉心吏部。誠得一日稱吏部郎。卽死無恨。宜興亦擬借此塞其望而遠之。遂以郎中調文選司。破格極矣。往時科道年例在二八兩月。科一人。道二人。間或吏部一人。此舊例也。昌時爲政。例推給事中范士髦等四人。御史陳蘆等六人。科道羣起大譁。吏科都給事吳麟徵、掌池南道御史祁彪佳。率兩衙門集于公所。與昌時面議。及是日。科道齊集。援舊例相責。昌時怙過。絕無引咎意。御史某不勝其憤。提所坐杌搏之。昌時倉皇而出。且曰。若奚爲待我如此。我當盡例出諸御史。諸御史聞之。咸怒髮上指。與昌時有不兩立之勢矣。又宜興自恃聖眷。視同官蔑如也。井研輩皆有愠心。緹帥駱養性有陰事。宜興刺得之。以挾制駱。使爲己用。往來傳遞者。昌時也。養時有

厚餽。宜興不受。昌時竟隱匿焉。養性以此。飲恨刺骨。內奄王之心。頗不樂。宜興曾向宜興云。我們才力有限。還求老先生包容。聞者危之。而宜興不以介意。清兵入犯。宜興督師逐之。總督范志完。宜興辛未所取士。其人大言不慙。無纖毫實用。宜興以一切軍情委之。宜興之出督師也。上注望甚殷。刻刻遣人偵伺。而宜興駐通州。每日幕客攢集。午後始開門收文書。應故事。所謂躬歷戎行。鼓舞將士者。未之能也。清兵出口。各路援師尾之而行。不敢邀擊。厚賄宜興。以求敍功。宜興諾之。襄城伯李國禎與王奄俱有私人。欲入敍功疏中。宜興不從。乃比而揭其短入告。謂清兵已驕。邀而擊之。可隻輪不返。宜興私通清兵。禁諸將不得一矢相加遺。坐是安然出口。上信以爲然。適給事中吳甘來。御史王章。疏參本兵張國維。而德州兵備雷演祚亦疏參范志完。皆與宜興有連。奉旨周延儒著府部九卿科道議處。閣臣各詞申救。得旨內外多艱。用人罔效。悞國害民。皆朕不德所致。周延儒著致仕去。

特旨修撰魏藻德。陞禮部左侍郎兼東閣大學士。藻德辭。陳演請改少詹事辦事。仍照三品用轎。上從之。此與劉之綸同一破格。然之綸以戎事超授。雖未成功。猶歿於陣。與藻德天淵矣。

八月。會試天下士。上命大學士陳演、魏藻德爲試官。取中陳名夏等三百五十人。時以邊警。大計改五月。會試改八月。閣臣循序應以蔣德璟爲副。時上究心天象。凡日月見食及星宿躔犯。取中國歷驗之。不甚應。以西歷驗之。輒應。遂加西人湯若望尙寶司卿。專理歷法。先是召對。德璟奏及之。曰。湯若望有何好處。皇上如此優禮。上曰。古帝皇招徠遠人。湯若望遠夷慕化。朕故優待之。有如卿言。建星屢次內犯。震驚宗廟。卿何不攢之使去。及是遂抑德璟而用藻德。而棘闈之役。亦止于此。藻德離孝廉未三年。驟

典文場說者謂文脈亦促甚矣。

兵部尙書張國維罷。逮總督范志完。順天巡撫潘永圖下獄。時給事中吳甘來疏論國維昔巡撫江南。惟以巧言令色爲務。有浪子中丞之稱。及任本兵。寸籌莫展。惟首輔意旨是徇。打恭作揖。便成職業云云。上頗知國維罪狀。擬加重譴。國維捐厚資。乞援于內奄。乃得旨閑住。德州兵備雷演祚疏論志完在山東縱兵標掠。及金銀鞍數千兩。馬百匹。行賄京師等事。有旨志完革職。逮問。永圖以失機。亦奉旨革職。逮問。

范志完伏誅。上特召雷演祚入朝。與志完面質于中左。問疏內所奏事款。歷歷有據。上又問演祚曰。爾所言稱公頌德徧于班聯者。誰也。演祚對。周延儒招權納賄。如起廢清獄租。皆自居爲功。考選科道。盡取門下。凡求總兵巡撫者。必先通賄幕客董廷獻。然後得之。上卽命逮廷獻。上問志完金鞍馬匹。招稱送右諭德方拱乾。上併召拱乾。拱乾力辯云。臣以詞林冷局。無票擬招駁之責。且甫入都。安有此事。上卽叱拱乾去。志完旣被逮。知上方注意封疆。決無生理。滿載輜重。望門投送。而不得要領。卒置于法。永圖亦坐封疆失事律。決不待時。

逮大學士周延儒于家。吏部尙書鄭三俊罷。先是御史郝彪佳。賀登選各疏。參吳昌時紊制弄權。給事中郝綱疏劾吳昌時。周仲璉竊權附勢。納賄行私。內閣票擬機密。每事先知。總之延儒天下之罪人。昌時。仲璉又延儒之罪人。至是御史蔣拱宸疏論昌時入延儒之幕。與董廷獻表裏爲奸。無所不至。賊證纍纍。萬目共見。卽如南場一榜。非其親戚。卽以賄賂。皆昌時爲之過付。伊弟肖儒。伊子奕封。公然中式。毫

無顧忌。以至白丁銅臭汪庶、陳咨稷等。皆貪緣登榜。其貪橫如此。尙知有朝廷法紀哉。末又指通內一事。時緹帥駱養性細刺昌時與延儒通賄諸款。具事件上聞。諸奄亦盡發延儒蒙蔽狀。復遣緹騎逮延儒對勘。而三俊以舉用昌時引罪回籍。延儒就逮。將所居樓閣三楹盡行焚燬。蓋生平寶藏咸集於此。紫貂帳以十計。清河參有一隻重十兩者。金珠非最上乘。不能登此樓。焚時火燄皆作五色云。

蔣拱宸疏參宜興及吳昌時內有通內一事。爲上所最忌。七月二十五日。召府部九卿科道廷鞫。上角素。率太子與定王同訊。呼昌時前。詰其通內。上聲色俱厲。昌時辨祖宗之制。交結內侍者斬。法極森嚴。臣雖不才。安能犯此。上呼蔣拱宸面質。拱宸戰栗匍伏。不能措一語。上愈怒。叱退拱宸。然上意已有成局。不待拱宸之對質也。昌時始終不爲屈。曰。皇上必欲以是坐臣。臣何敢抗違聖意。自應承受。若欲屈招。則實不能。上卽命內侍用刑。閣臣蔣德璟、魏藻德出班奏曰。殿陛之間。無犯刑之例。伏乞將昌時付法。司究問。上曰。此輩奸黨。神通徹天。若離此三尺地。誰敢據法從公。勘問者。二閣臣奏。殿陛用刑。實三百年未有之事。上曰。吳昌時這厮。亦三百年未有之人。二閣臣口塞。叩頭而退。內侍遂進用夾。兩脛皆絕。昏迷不省人事。乃命下錦衣衛獄。昌時已不能行。衛役負之以出。進見衛帥駱養性曰。請受刑。養性曰。汝甫受刑。尙不省人事。且俟後審。越數日。衛審一如廷鞫。語不稍屈。乃刑其兩家人。亦終無所招。後有旨送法司。咸謂有生機矣。不數月而斬決之旨下。先是韓城之逮也。昌時本無所置力。而掠之居以爲功。王陞彥臨刑恚恨曰。吳昌時殺我也。旁人皆爲咋舌。而昌時更揚揚自得也。及是奉旨。吳昌時著卽會官斬決。與王陞彥之旨同。人以爲有天道焉。其實不盡然也。

逮張國維下獄。時追論其中樞誤國之罪。故部擬贖徒。有旨張國維中樞溺職一徒。豈足蔽辜。還著再擬具奏。

九月。廷對策士。賜楊廷鑑、陳名夏、宋之繩進士及第。有差。

上點禮部尙書李建泰、左副都御史方岳貢。俱以原官兼東閣大學士。入閣辦事。岳貢守松江十五年。以錢糧拖欠。停俸督徵。故久稽不遷。今春入覲。有以岳貢操守廉潔薦者。上特授左副都御史。適吏部某以某事奉旨詰責。尙書李遇知曰。臣正行糾駁。岳貢云。何不卽行題參。一語深當聖意。遂同建泰入閣。從來閣臣無帶都御史銜者。亦變例也。

給事中時敏例推金華太守。敏求援于岳貢。岳貢令急進一條陳疏。遂具一套疏。忽奉嚴旨。下部議處。衆相訝不解。所謂及例推本上。岳貢票旨。時敏方在議處。何得遽行陞擢。員缺另推。議本上奉旨。時敏著降三級。照舊官。仍然郎矣。

周延儒賜死。宜興逮至旅邸。候命所挽回者。不遺餘力。欣欣向榮之念。及是夜半。而勒令自盡之旨下。宜興從僕被扶起聽旨。旨內先歷數其罪。至姑念旬內奄止。不卽讀。宜興意有非望。稽首稱聖恩者再四。奄候其稽首畢。始宣著勒令自盡。宜興恚魄喪魂。左右不能自持。繞屋而走。妄思竄逸。緹帥令二緹騎執持之。延至四鼓。緹帥乃勉強從事。又宜興素服參附。氣斷矣。四肢猶煖潤如生。緹帥懼有他虞。急以釘釘入腦門。始敢復命。較之韓城爲尤慘云。先是上與閣臣語。及宜興曰。朕恨其太使乖。晉江以告。宜興曰。事如此。英主不使乖不得也。周仲璉費四萬金。乃免於難。

上特起沈自彰爲文選郎中。改四川布政張法孔爲職方郎中。加太僕卿銜。皆以其有廉名也。

上禁諸臣服飾袖長不得過一尺。宮中盡撤金銀等器。俱用陶器。並諭誡諸臣不得擅用金銀。說者謂黃鍾大呂。清廟明堂之器。文質彬彬。斯爲美矣。僊極則鬼。君子病之。今以玉食萬方之主。而降爲汙尊。杯飲之事。是貉道也。何以能久。北兵退後。京城瘟疫甚行。朝病夕逝。有全家數十口。一夕併命。人咸惴惴。謀其不免。上時令張真人建醮祈安。而終無驗。日中鬼出爲市。店家至有收紙錢者。乃各置水一盃。於門市者。令投銀錢于水。以驗真僞。民間終夜擊銅鐵器聲。以驅厲祟。聲達九重。上不能禁。景色蕭條。早知有黍離之歎矣。宮中有封庫。累朝不開。上至是忽欲開閱。璫以從來未開爲言。而上意甚堅。璫不敢逆。開進空所無有。止後架貯小紅箱一隻。捧至。預書崇禎某年某月某日開。上以其預定也。益異之。及啓視。止盛畫三軸。其一則無數軍民相背而立。上曰。此殆言軍民背反耶。其二則無數官吏士民。俱若倉皇逃竄之狀。上曰。嘻。亂離不遠矣。其三則止有一人被髮赤體。其貌則儼然御容也。羣璫相顧。動容。上憮然不樂而出。是年正月。李賊圍承天。知府某開門迎賊。巡撫宋一鶴。鍾祥知縣蕭漢。皆死之。巡按李振聲迎降。與賊通譜。欽天監博士楊永裕亦降。請發顯陵。忽大聲起山谷。若雷震。賊懼而止。賊至黃陂。知縣某挈印走。賊設僞官。士民殺僞官。賊怒。反兵屠之。逐陷德安。黃州守將王允成棄城東下。方國安諸將退屯漢口。左良玉亦東下。江陵舉人陳萬策。李開先爲賊侍郎。喻上猷所開薦。賊檄下。萬策自縊。開先觸牆死。獻賊襲陷蘄州。屠之。兵備許文岐殉難。復蘄水。亦屠之。二月。湖廣土賊陷澧州。又陷武岡州。岷王遇害。隨合于闐。闐賊令老回回守承天。羅汝才守襄陽。而自攻郟縣。知縣李

貞率士民堅守。殺賊甚衆。力竭乃陷。李貞罵賊不已。賊怒。褫其衣冠。倒懸于地。貞大呼曰。高皇帝有靈。我必愬之。願爲厲鬼以殺賊。賊愈怒。斷其舌。副之母喬氏及妻俱死。賊還屯荊州。

五月。李賊攻常德。巡撫陳睿謨逃。城遂陷。嗣是辰。岳相繼俱陷。獻賊自蘄水一夕馳至黃州。乘大霧攻城。城遂陷。原任副使樊爲城罵賊。賊刺之。洞胸死。麻城周文江降賊。署爲僞知府。闖賊襲殺革里眼左金王。并其衆。時羣賊俱奉闖賊約束。惟革里眼不相下。闖賊置酒宴左革。殺之。席上。革里眼卽賀一龍也。四月。闖賊突入羅汝才營。卽其帳中斬之。并殺其謀主袁珪。

五月。闖賊攻袁時中。殺之。時中初合于闖。闖許配以女。至是時中通款于河南巡按蘇京。又擒闖賊零騎請功。故而殺之。

五月。獻賊逼武昌。時議募兵守城。而庫藏空虛。三司長詣楚王請貸數十萬。王不應。募兵皆謂宜募土著。適承德潰兵東下。楚王盡招之。號爲楚府兵。及獻賊陷漢陽。臨江欲渡。武昌大震。議撤江上兵嬰城而守。都指揮崔文榮曰。磨盤煤炭諸洲。淺不過馬腹。縱之飛渡。而嬰城坐困。非策也。議者不從。賊果從煤炭洲南渡。直逼城下。攻武勝門。文榮率軍禦之。多殺傷。而楚府新募兵開門迎賊。文榮躍持矛大呼。殺賊三人。賊攢刺之死。舊輔賀逢聖合家投墩子河死。長史徐學顏與賊格鬪。左臂斷。右臂持刀撲之。賊斃之。游擊朱士鼎爲賊所執。戟手大罵。賊去其左右手。自沉于江死。賊執楚王。盡取宮中藏金。輦數百車不盡。楚人于是憾王之愚也。賊沉王于江。屠戮士民數十萬。沿江積尸千里。其幸存民。或刖手足。或鑿目鼻。無一全形者。闖賊陷保康。知縣石維壇死之。別賊至禹州。守將楊芬。張朗降。

七月。總督孫傳庭發兵潼關。以總兵牛成虎、盧光祖爲先鋒。會河南總兵卜從善、陳永福。合兵雒陽之下池寨。檄左良玉赴汝寧夾擊。令副總兵高傑將降丁爲中軍。總兵王定官撫民率榆寧二鎮兵爲後勁。總兵方國安副將徐懋德、馬士秀等由蘄州進發。夜擊賊於大冶。斬首千級。前鋒旣勝。左鎮諸軍並進。獻賊令賊將守武昌。爲浮橋於金口。悉衆西渡向岳州。

八月。孫傳庭師次閩鄉。闖賊亦進。盡發荆襄諸賊。會于河南。牛成虎前驅。遇賊于雒陽。擊敗之。再擊于河岸。又敗之。追走至汝州。成虎以孤軍無繼。退屯澠池。丙寅。方國安等復黃州。斬僞官癸酉。諸將進次楊邏堡。距武昌三舍。監紀推官吳敏師聯絡蘄、黃、義、勇萬人。與師會。總兵常國安以舟師先進。轉戰金沙洲。奪賊百艘。丙子。諸將齊至武昌。獻賊出戰。大敗。遂西走。陷咸寧、蒲圻。距岳州百里。湖南巡撫李乾德、總兵孔希貴。盡移居民遠徙。而伏兵於內。開門迎賊。賊入。伏兵盡發。盡殲之。留四賊。各割一耳。貫箭縱回。獻賊怒。益來攻。乾德虛立營壘。下伏大礮。而積薪其上。賊以火攻之。大礮發。殺賊數千。賊愈怒。悉衆圍岳州。百道並攻。遂陷。乾德、希貴走長沙。戊寅。賊至湘陰。城已一空。獻賊登舟南渡。忽大風起。覆舟溺死賊數千。復還岳州。盡殺所掠婦女。焚其舟。陸行抵長沙。士民空城走。乾德奉吉王、惠王走衡州。守將尹先民迎降。推官蔡道憲不屈。殺之。健卒林國俊等解衣裹尸。葬道憲於南郊。俱自縊。

九月。孫傳庭次汝州。僞都尉四天王李養純率所部來降。知賊在寶豐。傳庭進圍寶豐。賊堅守不下。闖賊以輕兵來援。白廣恩、高傑、盧光祖逆戰於城東。敗之。次日。復以精騎數千直攻官軍。復擊走之。傳庭曰。寶豐不急下。而賊救大至。則腹背受敵矣。親督諸軍悉力攻城。拔之。斬僞官陳可新等千餘人。遂以大

兵搗唐縣。時賊家口盡在唐縣。官兵入城，盡殺之。甲辰，傳庭復郟縣。縣甚窮，官軍乏食，闖將將精騎萬餘逆戰。官軍擊斷闖賊坐纛，三戰三勝。闖將奔襄城。官軍進逼之。時河南所在饑荒，官軍深憂糧不繼。壬子，兵噪于汝州，降盜李際遇、陰通賊。癸丑，賊率精騎大至。傳庭問計于諸將，高傑請戰。白廣恩曰：「師老矣，宜分據要害，步步爲營，以圖萬全。」傳庭恐賊遁，曰：「將軍何怯也！獨不如高將軍耶？」廣恩不懌，引所部八千人南走。賊設伏以待官軍。官軍接戰，陷賊伏中，大敗。高傑乘嶺上望之，曰：「不可支矣。」麾衆急退。官軍大奔，賊驅大隊來追。至孟津，是役也。士卒死者四萬餘人，盡喪其軍資甲仗。傳庭與傑走河北。戊午，闖賊向潼關，白廣恩擊走之。傳庭亦回軍潼關，衆尙有四萬人。獻賊襲陷衡州，桂王及吉惠二王走永州。獻賊復追之。湖南巡按劉熙祚遣兵護三王入廣西，而自入永州拒守。奸人內應，熙祚不屈遇害。戊戌，官軍復岳州，盡誅僞官。獻賊東犯江西萍鄉。

十月辛酉朔，副總兵沈萬登復汝寧。是日，賊將軍司尙志蒞任。萬登擁衆突入，誅尙志，并殺諸僞官。時襄雒豪傑並起，萬登與毛顯文、劉洪起皆起布衣，聚衆數萬，各保寨以逐賊。闖賊僞授萬登威武大將軍，不受。鳳督馬士英承制授爲副總兵。闖賊遣姪一隻虎陷閩鄉，遂攻潼關。闖賊間道緣山崖出潼關後，官軍大驚，遂潰。賊盡入關掠，傳庭、白廣恩退屯渭南。賊合衆十餘萬陷渭南，傳庭陣亡。知縣楊暄死之。隨陷商州。商雒道黃世清死之。直抵西安，巡撫馮師孔督兵出戰，被執不屈死。西安陷，按察使黃綱自盡。長安知縣吳從義、指揮崔爾達、秦府長史章世炯俱投井死。鄉紳右都御史焦源溥、御史王道純、禮部主事南居益、都司邱從周俱罵賊死。宣府巡撫焦源清、山西參政田時震俱不受僞職死。磁州兵

備祝萬齡。自經學宮。山東僉事王徵七日不食死。舉人席增光、朱誼泉俱投井死。而左布政陸之祺、總兵白廣恩俱降。闖賊據秦王府。授秦王僞將軍。世子妃劉氏曰：國破家亡，願一死。闖賊遣歸母家。秦藩富甲天下，盡爲賊有。賊分兵徇諸縣。蒲城知縣朱一統抱印投井死。中部知縣華堞與一妻一妾俱自縊。賊改西安爲長安府。榜掠巨室助餉。按令爲朱新驥乃晉宗不知諸本何以皆作華堞華堞爲楚宗時爲宣諭楚豫江北一帶義勇使非令也人習知其名而概書之耳

獻賊陷袁州。令賊將邱仰寰居守。左良玉遣兵攻袁州。參將高山奮身先登，斬賊數百級，擒斬邱仰寰。遂復袁州。獻賊至長沙，突至吉安。官軍驚潰。兵備岳虞蠻逃。城復陷。賊復入袁州。

十一月，闖賊命賊將田斌守西安，而自往延安。大會羣賊，分五百騎按行鳳翔。守將誘而殺之。闖賊怒，親攻鳳翔，陷之，屠其城。遂逼榆林。兵備都任及原任總兵尤世威、王世顯、侯世祿、惠顯、侯拱極等，斂各堡精銳入鎮城，歃盟誓神，推世威爲主，協力拒守。賊誘說三日不聽。賊四面環攻，城上強弩疊射，賊死尸山積。賊攻益力，逾旬日不克。賊以衝車環城穴之，城崩數十丈。賊乘勢擁入城，遂陷。都任各家自縊死。尤世威縱火焚其家百口，揮刀突戰死。諸將各率所部巷戰，殺數千賊，至死無一降者。合城婦女俱自盡，無一受辱者。賊攻寧夏，總兵官撫民迎降。賊攻慶陽，堅守四日，力屈城陷。守巡二道段復興、董琬鄉、鄉紳太常少卿麻禧俱死之。賊屠慶陽，執韓王。獻賊知官兵陷岳州，沿江設伏，而令賊千人以巨艦載輜重順流下。副將王世泰、楊文富邀擊之。賊佯走以誘官軍。官軍溯流爭上，盡奪輜重。賊伏發，四面夾攻。官軍大潰。賊復入岳州。左良玉令馬士英趨長沙，馬進忠等趨袁州。士秀等復臨湘，進逼岳州。賊將混天龍統萬人乘輕舟迎戰。士秀三分其軍，繞賊舟後反擊之。賊大敗，趨入城。士秀麾諸軍登岸急

攻之。賊突門出。走長沙。遂復岳州。馬進忠等進薄袁州。賊西走。遂復袁州。盡誅諸僞官。總督呂大器亦統兵復吉安。殺太監劉元斌。元斌監軍討賊。賊在陝。維元斌留歸德。不敢進。縱兵大掠。殺樵汲者。冒功。及論辟。未得旨。卽奏辯。上怒。誅之。

十二月。闖賊徇西北。莊浪涼州二衛俱降。遂圍甘州。乘夜雪登城。巡撫林日瑞。總兵郭天吉。同知藍臺等皆死之。殺軍民四萬七千餘人。餘者俱投降。惟西軍衛固守不下。

十七年甲申正月庚寅朔。大風震屋揚沙。咫尺不見。占曰。風從乾起。主暴兵至。城破。癸丑夜。星入月中。占曰。星入月中。中國破。君亡。時闖賊僭僞位于西安。僞號大順。僞元永昌。宋獻策僞軍師。牛金星僞丞相。設僞六政府。僞吏政宋企郊。僞戶政楊建烈。僞禮政鞏煇。僞兵政喻上猷。僞刑政陸之祺。僞工政李振聲。皆明臣降賊者。上因寇氛孔棘。臨朝向閣臣歎曰。賊勢如此。闔外無人承認。府庫殫竭。將如之何。李建泰奏。主憂如此。臣敢不竭駑力。臣家曲沃。願以家財佐軍。臣請提兵。上大喜。慰勞再四曰。卿若行。朕當訪古推轂禮。親餞卿郊外。不敢輕也。建泰退。卽具揭題用衛貞固凌駟。又題郭中傑加副總兵銜。管中軍事。又請馬兵五百及旗牌等項。遂于二十六日啓行。上預傳至期。行遣將禮。朕御正陽樓。宴餞督輔。并召內閣五府部院掌印官侍坐。鴻臚贊禮。御史糾儀。大臣侍衛。應用法駕宴桌。該衙門預備。上又命查大明集禮中。遣將授鉞告廟禮。看議酌行。是日乙卯。上御正陽門樓。親餞之曰。先生此行。如朕親征。建泰受餞。叩首謝恩。旣去。上目送久之。返駕復。大風沙。占曰。不利行師。

二月。闖賊統衆四十萬。從禹門渡黃河。陷絳州。曲沃。臨晉。河津。破蒲州。舊輔韓爌死之。破平陽。知府張潏

然迎降。巡道李士焜逃。總兵高傑退至澤州。沿途大掠。賊遂薄太原。時初六日也。巡撫蔡懋德遣標下驍將牛勇、朱孔訓出戰。孔訓傷斃。牛勇陣亡。一軍皆沒。城中奪氣。懋德知事不可支。寫遺表令賈士章走京師。上聞。中軍盛應時先殺其妻子。誓將死敵。初八日。風沙蔽天。賊夜乘風登城。懋德應時赴鬪死。布政趙某、副使毛某及府縣鄉紳等官共四十六員皆死之。晉王遇害。上傳工部尚書范景文、禮部侍郎丘瑜俱以原官兼銜入閣辦事。上御書親勅督輔。朕仰承天命。繼祖宏圖。自戊辰至今甲申。十有七年矣。兵荒連歲。民罹干戈。流毒直省。今卿代朕親征。鼓厲忠勇。選拔雄傑。其驕怯逗玩之將。貪酷倡逃之吏。當以上方劍從事。行間一切調度賞罰。俱不中制。卿宜臨事而懼。好謀而成。真剿真撫。早蕩妖氛。旋師奏凱。勒名鐘鼎。須代朕至意徧行示諭。建泰甫出都。師次涿州。營兵逃歸者三千人。過東光。兵不戢。士民閉城拒守。建泰怒。留攻三日。破之。至廣平。紳衿城守不納。亦留攻三日。破之。殺紳王佐等及知縣張宏基。闖賊至忻州。官民迎降。進攻代州。總兵周遇吉固守。連戰十餘日。殺賊萬餘。賊悉衆來攻。遇吉退守寧武關。賊復攻寧武。遇吉連發大礮。殺賊近萬人。會火藥盡。有請款者。遇吉曰。三日內殺賊且萬。若輩何怯耶。能勝之一軍。盡爲忠義。若不支。縛我以獻。于是開門奮擊。殺賊數千人。賊懼欲退。或爲賊謀。請分爲十隊。更番迭戰。且去帽爲識。有帽者輒殺之。賊乃引兵復進。去帽以自別。官軍不能支。城陷。遇吉縱火焚其家。而自揮短刀力鬪。身中流矢。牙兵俱盡。遂見執。罵賊甚厲。賊怒。縛于市。磔之。屠寧武。太常寺少卿吳麟徵請棄關外寧遠前屯二衛地。徙總兵吳三桂入關。屯兵近郊。以衛京師。廷臣皆以失地非策。莫敢主其議。上諭吳昌時著卽會官斬決。其財產并罪輔周延儒貯產籍。

沒充餉。上又諭周延儒見賄忘法。本當全沒家產。今量追十二萬。著周肖儒、周奕封完納。吳昌時量追五萬。俱免籍沒。上命太監閻國輔等齎餉往薊寧等處給軍。時始聞山西全陷。上分遣太監監制各鎮。盧維寧往通津臨德。方正化往真保。杜勛往宣府。王夢弼往大名廣平。閻思印往順德彰德。牛文炳往衛輝懷慶。楊茂林往大同。李宗化、張澤民往蘇鎮中西二協。上特陞兵部都給事張晉彥爲兵部尙書。又令兼翰林學士。闖賊至大同。軍民皆降。總兵朱三樂自刎。巡撫衛景瑗、兵備朱家仕、糧儲徐有聲皆死之。庠生李若葵合家九人俱自縊。先題曰一門完節。代王遇害。賊殺代府宗室殆盡。上召忻城伯趙之龍、撫寧侯朱國弼、中左門面對。乃命國弼總漕淮安之龍掌南京中軍都督府印。管守備事。闖賊陷真定。先是知府丘茂華聞賊警。預定令家眷出城。巡撫徐標下茂華于獄。標中軍某伺標登城指畫守禦時。乘不意掖而投之城外。殺之。從獄中擁茂華出。茂華遂檄所屬州縣預備迎賊。數日後。賊始以百騎來受降。時二十二日也。二十三日。上召諸臣面對。先是左都御史李邦華密疏請擇大臣奉太子南行。臣等輔皇上固守。聖意頗以爲然。大學士陳演微洩之。是日召對。庶子項煜面具小疏。極言當南巡者八。上曰。國君死社稷。正也。朕死決矣。大學士范景文同邦華擬申前請。給事光時亨大聲曰。奉太子往江南。諸臣意欲何爲。將欲爲唐肅宗靈武故事乎。二臣乃不敢言。已而上命魏藻德陞兵部尙書。督師津德。方岳貢陞戶部尙書。督漕臨濟。意擬從范李二臣之請矣。旣而復撤前命。或云時傳闖賊已南下。故止之。

三月。大學士陳演、蔣德璟罷。演以多貲不敢出京。遂及於禍。

上召張國維于獄。同庶吉士史可程、舉人

朱長治、中左門面對。昌平兵噪，焚劫城中。巡撫何謙以聞，有旨何謙帶罪供職。初四日壬辰，欽天監奏帝星下移。詔封各總兵吳三桂、平西伯左良玉、寧南伯唐通、定西伯黃得功、靖南伯俱給勅印。劉澤清實陞一級，劉良佐、高傑、馬科、姜瓖、孔希貴、葛汝芝、許定國、王承允、劉芳名、李棲鳳、曹友義、杜允登、趙光遠、卜從善、楊御蕃、馬岱、黃蜚、高第、各陞一級。督撫馬士英、王永吉、黎玉田、李希沆，各加陞二級。詔總兵吳三桂、劉澤清、唐通帥師入援。三桂、澤清不奉詔，惟通以二千人至。陛見，上慰勞再三，命同太監杜之秩守居庸。太康伯張國紀進助餉銀萬兩，晉封爲侯。上召文武大臣及科道於中極殿，問禦賊之策。有言守門乏人，請考選科道，餘皆練兵加餉套語。駙馬鞏永固面奏賊勢猖獗，官兵畏賊如虎，祈簡才望大臣重守都城。聖駕南巡，徵兵親討。臣號召京畿義勇，可得十萬衆，扈從起行。上意不決。諸臣皆言其誕妄。既退，議分守九門，稽察出入，召見庶吉士於中左門，特命陳名、夏陸修撰兼戶兵二科給事中。闖賊陷宣府，叛將白廣恩先移書約總兵姜瓖降。太監杜勛出城三十里迎賊入城，執巡撫朱一馮殺之。巡按霍達逃。命給事中韓如愈、馬嘉植催解浙直京邊正項，并改折贖贖及周延儒、朱大典、吳昌時等贓銀，督解時賊信已急。諸臣咸思南竄，故二人營謀此差。如愈曾疏論劉澤清過東昌，澤清遣人殺之。晉封嘉定伯周奎爲侯。上遣太監徐高宣詔求助，謂休戚相關，無如戚臣務宜倡自十萬至五萬，協力設處，以備緩急。奎謝曰：老臣安得多金。高泣諭再見，其堅辭拂衣起曰：老皇親如此鄙吝，大事去矣。廣蓄多貲，何爲奎自具疏，勉助一萬金。太監王永祚、曹化淳等有助三萬五萬者。王之心富第一，上面諭之，對以家計消乏，僅獻一萬。後之心爲賊拷掠，輦現銀十五萬兩，金銀什物稱是。

周奎抄出現銀五十三萬兩。什器段疋無算。上命張國維仍復原官。總督浙直兵餉。初國維就逮。揣知庫藏空虛。朝廷首急軍餉。乃倡開事例一法。殺人行劫者。皆得輸金贖罪。謂國維一至江南。數百萬可立致。上惑其說。先諭刑部張國維附和罪輔。蒙蔽君上。本當重治。念方士亮等輕擬。著免罪候用。至是有總督浙直之命。時賊警已逼。遂連夜疾趨。中途已聞變矣。過蘇州時。江南尙無所聞。應撫已移鎮鎮江。紳衿共留國維。卽于蘇州抵任。以資彈壓。國維自揣皇上已殉難。大位未定。事不可知。決意南歸。俟弘光卽位。諸事就緒。始抵蘇州蒞任。臨清總兵劉澤清虛報大捷。賞銀五十兩。又詭言隨馬被傷。再賞藥資四十兩。命速赴保定剿賊。澤清不從。卽于是日大掠臨清。統兵南下。所至焚劫一空。闖賊陷保定。賊至城下。李建泰迎降。中軍郭中傑縋城降。兵潰。遂陷。同知邵宗元佩府印。被執不屈。死之。鄉紳御史金毓峒分守西府。賊執之。謁僞將毓峒。奮拳毆賊。投井死。妻王氏自縊。姪振孫係武舉人。登城射賊。應弦立斃。賊攢殺之。毓峒媳陳氏年十八。尙未嫁。與其祖母張氏。母楊氏。嫂氏同時投井。張氏抱其孫于懷。同下。侍婢亦從而下。知府方文耀見城破。卽自殺。

十三日。各城門分設紅夷大礮。給守城軍每名黃錢百文。連日日色無光。是夜風色陰慘。沙塵刮天。上命襄城伯李國禎團練京營兵。又命太監曹化淳督理城守。

十五日癸卯。日色益晦。正陽門外伏魔廟杆忽自中劈。又南京孝陵夜哭。闖賊叩居庸關。總兵唐通。太監杜之秩迎降。總督王永吉兵敗陷賊。賊縱之歸。本兵張縉彥爲請。召對閣臣。疑之。叩縉彥以永吉來意。縉彥初不言。固問之。乃云。李自成有二策。請上擇之。一如漢楚故事。劃地爲界。一解兵歸誠。以大

將軍輔政。閣臣大駭。遂稟旨王永吉喪師辱國。不准召對。闖賊至昌平。軍民爭降。總兵李守鏐力格殺數賊。賊攢刺之。乃拔刀自刎。鄉紳張羅彥自殺。巡撫何謙南奔。

十六日。上御殿。召考選各官。問以治餉安民。滋陽知縣黃國琦對曰。裕餉不在搜括。在節慎。安民繫于聖心。聖心安則民心安矣。上首肯。卽面授給事中。餘遞奏本半。忽祕封呈進。覽之色變。卽起入內。久之。諭各官退。始知爲昌平失守也。闖賊破昌平。將十二陵享殿悉行焚燬。隨分兵掠通州糧儲。

十七日。上召文武各官。上泣下。諸臣亦相向泣。束手無計。上書御案。有文臣個個可殺語。密示近侍。隨卽抹去。是日。襄城伯李國禎領京營兵出城。立營城下。數萬人一時潰散。夜漏半。曹化淳開廣寧門迎賊入。守城勛衛皆逃。御史王章賊呼之降。不應。遂殺于城上。給事中光時亨卽長跪迎降。賊軍師宋獻策占十八無雨。則京城不可破。有雨則一攻卽下。至是日。黃沙障天。忽而淒風苦雨。良久。冰雹雷電交至。時賊已屯西城下。火礮飛入城中。西城竟日無人敢行。近暮定武橋南火起。始知外城已陷。閣走告上。上曰。京營兵何在。李國禎練兵何在。閣曰。皇爺安得有兵。京營兵皆散。今惟有勸皇爺走耳。先是十五夜。上復召鞏永固。問以前策。永固對曰。賊前尙遠。人皆畏賊。六龍南幸。從者必多。今賊已逼近。人心瓦解。從行者臣不敢誤陛下也。上頷之。及是夜。叛閣杜勛至城下。呼王相堯縋城入。講或欲留之。勛曰。我家萬歲爺爺威勢盛強。不反命者。立屠京師矣。遂縱去。一鼓上召新樂侯劉文炳及鞏永固。令速帶家丁護駕。二臣曰。臣等何敢私蓄家丁。所有家人。豈能當賊。上亟退。召太監王承恩入。密語移時。急令出部署。丁爲巡南計。又別傳硃諭至內閣。命成國公朱純臣提內外諸軍夾輔東宮。留守京師。已而呼

酒與周后袁妃同坐痛飲。慷慨訣絕。妃先起行。上拔劍砍之斃。后急返坤寧宮自縊。上視之曰。好好。坤儀公主在旁哭不已。上叱之曰。汝奈何生我家。亦刃之。公主以手仰格。臂斷。悶絕于地。上又令太子定王出避民間。盡去本等冠帶。戒諭今後慎毋露帝皇家形跡。時承恩復命。上卽微服雜內閣。出東華門。至朝陽門。託言王太監奉旨出城。守者請以天明請驗。扈從者奪門。守者反礮擊之。不得出。朝陽係朱純臣所守。急詣純臣第。闢人辭以赴宴未回。上歎息而起。復走安定門。門闌堅不可舉。天將曉矣。乃返厚載門。散遣內丁。隨以永王定王分送外戚周田二家。手攜王承恩入內苑。是夜閣臣方岳貢直宿精微房科。四鼓中。涓口傳聖諭。內閣諸先生速赴行在。亟叩之云。聖駕已回。鞏駙馬王太監出宮矣。太子叩嘉定門。周奎高臥不起。門役不納。乃走匿內閣某外邸。

十九日丁未。陰雲四合。城外煙焰障天。宣武門守門太監王相堯領內丁千人開門迎賊。僞將劉宗敏整軍入。軍容甚肅。張縉彥守正陽門。朱純臣守朝陽門。一時俱開。二臣迎門拜賊。賊登城。殺兵部侍郎王家彥于城樓。刑部侍郎孟兆祥死于城門下。兆祥子進士孟章明同母何氏妻王氏自殺于寓。尙衣太監何親見公主仆地未起。曰。賊已將入。恐公主遭其辱。且至周府中避之。乃負之出。宮人魏氏大呼曰。賊入大內。我輩必遭所污。有志者早爲自計。遂躍入御河死。頃者從死二百餘人。羣賊入城。取道演象所。羣象皆淚下如雨。殉者難。大學士范景文投井死。戶部尙書倪元璐從容自縊。左都御史李邦華自縊于先文信國祠中。左副都御史施邦耀。大理寺卿凌義渠。太常寺少卿吳麟徵。太僕寺丞申佳允。給事中吳甘來。御史陳良謨。妾時氏。陳純德。趙譔。吏部郎中劉廷諫。主事許直。順天推官劉有瀾。兵馬

姚成、錦衣衛指揮李若珪、王國興、中書宋天顯、俱自縊。庶子周鳳翔于二十一日自縊。中允馬世奇與妾朱氏、李氏同縊。修撰劉理順同妻萬氏、妾李氏、子舉人某、婢僕十八人俱自縊。檢討汪偉同妻耿氏、左右縊於堂中。武庫司郎中成德、金鉉、同母章氏、妾王氏、弟生員金鏞、俱投井死。光祿署丞于騰蛟服冠服呼妻亦服禮服同縊。生員曹文耀妻張氏、生四子一女。城破、張氏率子女哭於家祠。同文耀庶母姜氏、二媳李氏、鄧氏、及乳母孟氏、八人同縊。居民田某合家自焚。李小槐同妻杜氏二子一女一婢俱自縊。內官白某亦自縊。新樂侯劉文炳集男婦共十六人登樓自焚。其弟劉文耀同祖母瀛國太夫人投井死。時年九十餘。彰武侯楊崇善自縊。惠安伯張慶臻合門自焚。宣城伯衛時春率妻孥同投大井中。無一存者。都督周鏡自盡。駙馬鞏永固公主柩尙在堂。同子女四人坐堂中。縱火自焚。逆闖入宮。問帝所在。大索宮中不得。僞尙璽卿黎志陞進曰：此必匿民間。非重賞嚴誅不可得。今日大事不可忽也。乃下令獻帝者賞萬金。封伯爵。匿者夷其族。至二十二日庚戌。得先帝遺魄于後苑山亭中。與王承恩對面縊焉。先帝以髮覆面。白紵袍。白紬褲。一足跣。一足有綾襪。紅方鳥袖中書一行云：因失江山。無面目見祖宗于天上。不敢終於正寢。又一行云：百官俱赴東宮行在。一十三日辛亥。殮先帝先后於東華門梓宮二。先帝用丹漆。先后用黝漆。加先帝翼善冠。滾玉滲金靴。先后袍帶亦如之。同移庵內。主事劉養貞以頭觸地大慟。諸臣哭拜者三十人。拜而不哭者六十人。餘皆睥睨過之。叛閣某獻太子。逆闖留居西宮。封爲宋王。太子不之屈。宮人費氏年十六。投智井。賊鈎出之。賞賊將羅某。費氏給曰：我帝家人也。義難苟合。惟將軍擇吉成禮。死生惟命。賊喜。卜日置酒極歡。費

氏懷利刃。候賊醉斷其喉。立死。費氏卽自刎。從賊者。大學士李建泰。兵部尙書張縉彥。戶部侍郎党崇雅。禮部侍郎楊汝成。工部侍郎葉初春。少詹事楊觀光。項煜。諭德何瑞徵。楊士聰。修撰楊廷鑑。陳名夏。編修梁兆陽。高爾儼。李士淳。薛所蘊。趙玉森。庶吉士呂崇烈。成克鞏。張之奇。楊明朗。張端。黃燦。張元琳。劉餘謨。魚梁。魏天賞。劉廷琮。何九雲。劉肇國。張元錫。李化麟。姚文然。高珩。胡統虞。傅學禹。羅獻文。白允謙。何允光。龔鼎孳。趙頻。李呈祥。傅鼎銓。劉世芳。周鍾。魏學濂。朱積。吳爾壘。楊棲鸚。王自超。史可程。梁清標。右通政趙京仕。通政參議宋學顯。尙寶卿吳家周。太僕寺丞李元鼎。給事中劉昌。戴明說。孫承傅。振鐸。申芝芳。時敏。米徽。翁元益。郭充。高翔漢。金汝礪。介松年。楊枝起。御史柳寅東。朱朗榮。衛貞固。傅景星。蔡鵬霄。裴希度。涂必泓。韓文銓。陳羽白。熊世懿。吏部沈自彰。左懋泰。熊文舉。王顯。侯佐。楊元錫。吳孳昌。郭萬象。戶部王鳳林。金震出。衛周祚。程之璿。劉顯績。禮部黃熙允。湯有慶。吳之琦。張琦。劉大鞏。朱芾煌。工部潘同春。繆元。鄒魁明。方允昌。黃徽允。李登雲。呂兆龍。秦汧。馮秉清。司務孫節。大理寺正錢位坤。行人胡顯。李不著。張元輔。吳允謙。李之奇。許作梅。王子曜。沈元龍。國子博士李森先。學正王臯。光祿監事林銘球。順天照磨龔彝。侯以頭。考推官施鳳儀。知縣彭三益。黃國琦。孫以敬。王孫蕙。進士武愨。徐家麟。吳剛思。逆闖入都。首先勸進者。陳演。朱純臣也。向賊叩頭求用。指斥先帝爲無道者。魏藻德也。從獄中出而爲賊策下江南者。張若麒也。其頌賊爲救民水火神武不殺者。梁兆陽也。代賊焚燬太廟神主者。楊觀光也。大負先帝委任。終以拷掠死者。李國禎也。先帝求金不應。東宮出亡不納。終贖盜糧。盡爲賊有。負君辱國。貽恨千古者。周奎也。至叛閣曹化淳。王相堯輩。不足誅矣。

二十七日。平西伯吳三桂如清乞師。三桂以清兵至山海關。先是三桂聞京師失守。先帝殉難。統衆入關投降。而三桂父吳襄。故遼東總兵也。逆闖李自成執襄。誅求金寶。索詐甚酷。三桂知之。卽時返師出關。適清攝政王統兵將入大同。中途相遇。三桂卽剃髮詣營。叩首懇冤。願假大兵復仇。敵血立誓。攝政王爲撤兵西行。逆成聞三桂之來而復去也。急統馬步兵四十萬追之。劉宗敏、李過等皆從。并挾太子二王東行。追及三桂于關外。三桂見賊甚盛。不敢迎戰。入啓攝政王。攝政王令三桂先與交鋒。而自登高望之。待三桂將敗。卽揮英王豫王分左右翼以進。時逆成亦挾太子登高岡督戰。賊衆三面圍三桂。勢危甚。忽有白標兵二隊繞出其後。如發風湧潮。所到之處。無不披靡。逆成頓足歎曰。此必北兵也。三桂真挾北兵來耶。急策馬走。賊衆大潰。次日。令降兵部郎張若麒奉太子如三桂營。請罷兵。三桂留太子而益治兵。破逆成于關內。逆成驅賊連營進發。三桂悉銳出戰。清兵助之。賊衆大奔。自蹂踐死者十餘萬人。殺其渠帥五人。逆成走永平。三桂又追敗之。逆成奔還克師。時四月二十四日也。三桂同清兵壓城而軍。逆成遂殺吳襄。並殺其家口三十八人。二十九日。逆成出阜城門西走。縱火燒諸宮殿。又燒九門雉樓。火光燭天。三桂遙望城中火起。知賊已走。追至保定。奮擊敗之。再敗之于定州北。逆成憤極。復勒勁卒返擊三桂。三桂以清鐵騎衝堅突入。斬其渠帥數人。首萬餘級。逆成中流矢墮馬。掖而騎。疾馳還營。卽拔營歸陝西。三桂復以清兵掠陝西。逆成盡出銳卒迎戰。大敗。劉宗敏、田見秀等皆死。逆成乃棄西安。由商雒入鄖襄。渡江趨武昌。逆成屢敗之後。每行軍。大隊在前。已率數十騎在後。一夕大風飛沙。對面不相覩。逆成同二十八騎趨通山。登九宮山。鄉兵遇之。亂刃交加。遂剝逆成于馬下。逆成旣

斃賊衆無主。乃謀向何總督投降。時何騰蛟總督五省軍務。駐長沙。賊黨大隊投誠。皆虞其詐。不敢應。相持兩日。長沙知府某挺身而往。甫至。爲賊所殺。賊閔曰。我等降何總督耳。知府卑官。來何爲。不得已。乃自往。賊衆望見。知爲總督也。列隊羅拜。歡聲動地。何諭之曰。若等來降。自當題請受爵。爲國家建立大功。但苦無糧餉。奈何。賊衆曰。我等所儲甚裕。毋貽軍門憂。何又虞賊衆甚夥。狼心未測。于是下令願歸農者聽。又分蒞其衆。賊黨散者大半。說者謂何爾時撫有其衆。激以忠義。鼓行而前。當必能下江南。畫淮而守。而逡巡顧忌。坐失機會。良可惜也。

皇后諡曰孝烈皇后。時擬諡號者。大學士高宏圖也。後卽有借此以攻宏圖者。復改爲毅宗。按諡法。思與毅于先帝俱無取也。孟子曰。世守也。非身之所能爲也。效死勿去。傳所謂國滅君死。正也。今先帝俟兩宮畢命後。始自爲計。義也。初擬從權。徐圖後舉。旣慨然知天命之不可爭。不難身殉以謝天下。智也。業已身殉矣。猶曰。因失江山。不敢終于正寢。禮也。從容殉難。合乎大道。仁也。夫當變起蕭牆。禍介俄頃。而仁義禮智俱全。而無失焉。可不謂正乎。按諡法。殺身成仁曰烈。臨難不屈曰正。愚意修史者當具疏特請。更上先帝諡號曰烈宗。正皇帝。先后諡號曰孝烈正皇后。

附逆闖伏誅疏

總督湖廣川貴廣東廣西五省軍務兵部尙書何騰蛟奏。闖死確有實據。闖級未敢扶同。謹據實回奏事。痛自闖逆肆亂。逼我先帝。陷我神京。罪通于天。一旦被戮九宮山。差紓神人之憤。奉旨何騰蛟著吏部先行議妥速敍。仍著將殲賊情形。闖賊首級真否。該撫察奏解。若果的真。照格敍賞。以昭大信。欽此。竊惟人

臣之訓。義在勿欺。如闖死非真而臣謬以爲死。且居之以爲功。是欺也。欺則臣罪也。當闖死果真而闖之。首級已化爲異物。如首級物化而假託以明闖死之爲真。亦欺也。欺則臣罪當死。然闖勢實強。闖夥實衆。何以死于九宮山團練之手。誠有其故。闖逆旣死。則宜留首級示信。何以首級竟不可得。亦有其故。請爲皇上陳之。臣自遭左變。投身江濤。遇救得生。臣揣闖逆知左兵南逞。勢必窺楚。卽飛檄道臣傅上瑞、章曠、推官趙廷璧、姚繼舜、咸寧知縣陳鶴齡等。聯絡鄉勇以待。闖果爲清所逼。自豫秦奔楚。霖雨連旬。闖逆困於馬上者踰月。此固天亡之也。闖逆居鄂兩日。忽狂風驟起。對面不見。闖心驚疑。懼清之躡其後也。卽拔賊營而上。然其意尙欲迫臣。盤踞湖南耳。天意亡闖。以二十八騎登九宮山。爲窺伺計。不意伏兵四起。截殺於亂刃之下。相隨僞參將張雙喜。係闖逆義男。僅得馳馬先逸。而闖逆之劉伴當飛騎追呼曰。李萬歲爺被鄉兵殺死馬下。二十八騎無一存者。一時賊黨聞之。滿營聚哭。及臣撫劉體仁、郝搖旗於湘陰。撫袁宗第、蘭養臣於長沙。撫王進才、牛有勇於新牆。無不衆口同辭。營內有臣。晉豫舊治之子。衿氓隸。亦無不衆口同辭也。張參將久住湘陰。郝搖旗現在臣標。時時道臣逆闖之死狀。嗣後大行剿撫。道阻音絕。無復得其首級報驗。今日逆首已誤死於鄉兵。而鄉兵初不知也。使鄉兵知其爲闖。氣反不壯。未必遂能翦滅。而致弩刃之交加。爲千古大快也。今而後逼君破都之氣燄。遂成烏喙獸齧之肉餅。亦可以謝先帝矣。自逆闖死而闖二十餘萬之衆。初爲逆闖悲號。旣而自悔自艾。亦自失。遂就戎索於臣。逆闖若不死。此二十餘萬之衆。僞侯僞伯。不相上下。臣亦安能以空拳徒手操縱自如乎。伏乞皇上祭告九廟。祭告先帝。使天下後世知數十年之劇寇首逆。乃一旦天亡於九宮山。以慰二祖列宗之靈。以快普天率土之願。臣志足

矣。至如明旨所云察實照格議賞。是徒滋舉朝之議而重微臣之罪。臣惟有灑血於先帝而已。回奏委無一毫欺飾。不勝惶悚待命之至。隆武元年月日奏。





明季稗史初編卷九

顧炎武譏

聖安本紀

聖安皇帝神宗顯皇帝第二子。福恭王之長子。諱由崧。母曰某氏。初封德昌王。進封世子。崇禎十四年正月。李自成陷河南府。恭王薨。世子出走懷慶。十六年七月。嗣封福王。十七年三月。京師守失。四月己巳。烈皇帝凶問至南京。其時南京參贊機務兵部尙書史可法督師勤王在浦口。南京諸大臣聞變。倉卒議立君。未有所屬。而王與潞王以避賊至淮上。大臣意多在潞王。總督鳳陽兵部右侍郎兼都察院某都御史馬士英遺書南京。言福王神宗之孫。序當立。甲申。守備南京魏國公徐弘基提督操江誠意伯劉孔昭等。南京戶部尙書高弘圖。工部尙書程註。都察院右都御史張愼言。掌翰林院事詹事府詹事兼侍讀學士姜曰廣等。南京守備掌南司禮監務太監韓贊周等集朝內。兵部右侍郎呂大器署禮兵二部印。不肯下筆。吏科給事中李沾厲聲言。今日有異議者死之。時士英握兵于外。與大將靖南伯黃得功。總兵官劉澤清。劉良佐。高傑等相結。諸大將連兵駐江北。勢甚張。大臣畏之。不敢違。於是以福王告廟。乙酉。弘基等逆王于江浦。丙戌。王舟次燕子磯。丁亥。百官迎見于龍江關。王素衣角帶哭。五月戊子朔。王乘馬自三山門外至孝陵。從臣請自東門御路入。王遜避。自西門入。至饗殿拜謁畢。次謁懿文太子陵。自朝陽門入東華門。步行謁奉先殿。出西華門。駐蹕于內守備府。己丑。羣臣勸進。王辭讓。遵景帝故事。以福王監國。是日清

墨勒根入北京。庚寅。王行告天禮。升殿。百官行四拜禮。魏國公徐弘基跪進監國之寶。王受訖。再行四拜禮。乃退。大赦天下。其新加練餉。及十二年以後一切雜派。並各項錢糧。十四年以前實欠在民者。悉免之。以張慎言爲吏部尙書。壬辰。以史可法爲東閣大學士。兼兵部尙書。高弘圖爲東閣大學士。兼禮部尙書。並入閣辦事。馬士英爲東閣大學士。兼兵部尙書。都察院右都御史。仍總督鳳陽等處地方軍務。時朝廷草創。大僚無通曉故事者。以學士兼尙書。非制也。發銀一萬兩。遣職方司郎中萬元吉往犒得功等軍。以張應元充總兵官。鎮守承天等處地方。癸巳。爲大行皇帝舉哀哭臨。甲午。以姜曰廣爲東閣大學士。兼禮部尙書。前禮部尙書王鐸爲東閣大學士。並入閣辦事。曰廣辭。改禮部左侍郎入直。以工部某侍郎周堪廣爲戶部尙書。乙未。召前都察院左都御史劉宗周復官。遣御史祁彪佳等安撫江南北等處地方。可法請分江北爲四鎮。以黃得功劉澤清劉良佐高傑四人分統之。傑駐徐州。轄徐州及鳳陽之懷遠五河虹泗州盱眙宿州靈璧蒙城亳州十四州縣。經理河北河南開歸等處招討事。良佐駐壽州。轄鳳陽之鳳陽臨淮定遠壽州霍邱潁州潁上太和廬州之六安州九州縣。經理河南陳許等處招討事。澤清駐淮安。轄十一州縣。經理山東等處招討事。得功駐廬州。轄廬州之含淝巢無爲州滁和二州。應天之江浦六合十州縣。經理各路援剿事。一切軍民。皆聽統轄。州縣有司。皆聽節制。營衛原本舊兵。皆聽歸併整理。荒蕪田土。皆聽開墾。山澤有利。皆聽開採。仍許各于境內招商收稅。以供軍前買馬置器之用。每鎮額定三萬人。歲供本色米二十萬。折色銀四十萬。其體統照山海經理鎮各處提督鎮行事。所收中原城池。卽歸統轄。寰宇恢復。爵爲上公。與開國元勳同准世襲。其鳳陽舊有總兵官應罷。改副將一員。又言操江舊兵單弱。

請添設九江京口兩鎮以操江。總督文臣協理並從之。而得功等方各擁兵爭江北諸郡。傑圍揚州。縱兵大掠。且欲渡江而南。可法乃奏設督師于揚州。節制諸將。馬士英以麾下兵至江干。上疏勸進。丙申。召士英入京。戊戌。羣臣勸進。至再三箋。王乃許之。己亥。可法自請督師江北。詔以便宜行事。各鎮並聽節制。撫寧侯朱國弼請裁漕鎮。從之。召兵部尚書張國維以原官回部。佐理戎政。召前刑部尚書徐石麒爲都察院右都御史。以原闕鄭鴻逵爲後軍都督府署都督僉事。充總兵官。鎮守九江等處地方。原闕黃蜚以原官鎮守京口等處地方。以韓贊周爲司理監。乘筆太監。壬寅。王卽皇帝位。大赦天下。以明年爲弘光元年。在京文武各官。普加一級。無級可加者。進勳階一級。并給新銜。誥命在外督撫。監司守令。並依見任官銜。給與誥命。在籍閣臣及六部堂上官。年六十以上者。存問。其遣配及閒住者。並復原官。三品以下。先行釋罪。分別酌用。其北直隸山東河南山西陝西遼東等處文武官生。義不從賊。在南者。文官察明起用。生員赴禮部報名取印結。寄應天府學考試。武官指揮千百戶等。赴兵部察驗。附在京各衛寄俸。弘光元年。糧免十分之一。北直隸山西陝西全免五年。山東河南全免三年。江北湖廣免十分之五。四川免十分之三。以盧九德爲司禮監乘筆太監。提督京營。癸卯。以馬士英掌兵部事。仍入閣辦事。以禮部右侍郎顧錫疇爲禮部尚書。兼翰林院侍讀學士。分應天蘇松爲二巡撫。以太常寺少卿左懋第爲都察院右僉都御史。巡撫應安徽寧池太廣德等處地方。提督軍務。兼理糧儲。甲辰。以忻城伯趙之龍總督京營戎政。以前都察院右僉都御史田仰巡撫淮揚等處地方。提督軍務。兼理海防。進封黃得功爲靖南侯。左良玉爲寧南侯。仍各廕一子。錦衣衛千戶世襲。封高傑爲興平伯。劉澤清爲東平伯。劉良佐爲廣昌伯。加馬士英太子

太保。廕一子。錦衣衛指揮僉事世襲。乙巳。以大理寺左寺丞祁彪佳爲都察院右僉都御史。巡撫蘇松等處地方。總督糧儲提督軍務。禁北來逃官。不許入京。丁未。可法出京督師。給銀二十萬兩。密諭參將王之綱等迎母妃于江北郭家寨。李自成遣僞制將軍董學禮等率兵南下。至宿遷。己酉。總督漕運巡撫鳳陽等處地方都察院右僉都御史路振飛遣兵擊敗之。擒其僞防禦使武愨。張慎言薦前東閣大學士遣戍吳姓。命召之。庚戌朝。劉孔昭廷訐慎言薦誤國罪臣。且定策時有二心。聲色俱厲。御史王孫蕃等亦劾孔昭。交爭于上前。上諭之。乃退。明日。孔昭具疏論劾。慎言乞罷。上兩解之。弘圖曰。廣各上疏乞罷。不許。以萬元吉爲太僕寺少卿。監江北軍。命御史周一敬護送潞王于杭州居住。設勇衛營。以御馬監太監李國輔監督。壬子。進魏國公徐弘基。南和伯方一元。誠意伯劉孔昭。撫寧侯朱國弼。安遠侯柳祚昌。靈璧侯湯國祚。東寧伯焦夢熊。成安伯郭祚永。各官銜二級。歲加祿米五十石。弘基仍進左柱國。賜韓贊周廕弟姪二人。盧九德一人。錦衣衛指揮僉事世襲。仍賜蟒衣及銀。癸丑。可法奏先帝已封劉澤清伯爵。命加廕一子。錦衣衛正千戶世襲。甲寅。遣督師大學士史可法祭告祖陵皇陵。寧南侯左良玉祭告顯陵。先是賊陷京師。定遠總兵官平西伯吳三桂降于清。引之入關。大敗自成于一片石。自成走西安。清乃僞稱太子。與三桂合軍入京。及至。則清九王也。遂據京師。爲先帝發喪。傳檄河北山東。皆下之。而道路相傳。以爲三桂借兵克復。又言巡撫遼東都察院右副都御史黎玉田與三桂合謀。德州生員謝陞殺賊所署僞防禦使吳徵文。奉香河知縣宗室帥鋤爲濟王。率士民城守。而傳以爲前東閣大學士謝陞。及前御史盧世澹。於是可法以聞。己卯。封三桂薊國公世襲。命發銀五萬兩。漕米十萬石饋之。太常寺少卿李沾劾吏部左侍郎

呂大器定策時懷二心。上曰：朕遭時不造，痛深君父，何心大寶！直以宗社攸關，勉承重任，當日效忠定策。諸臣朕已鑒知，餘不必深求。大器乞罷，不許。六月庚申，以福府千戶常應儁爲某軍都督府左都督。壬戌，上大行皇帝諡曰紹天繹道剛明恪儉揆文奮武敦仁懋孝烈皇帝，廟號思宗。大行皇后諡曰孝節貞肅淵恭莊毅奉天靖聖烈皇后。思字大學士弘圖所擬也。以都督同知楊振宗充總兵官，鎮守安慶。癸亥，以右軍都督府都督僉事趙光遠爲都督同知，充總兵官，提督四川陝西軍務。光遠時鎮守漢中，命未至，已降于賊。甲子，工部尙書程註致仕。丙寅，吏部尙書張慎言致仕。士英薦前光祿寺卿阮大鍼可任樞貳，予冠帶召見。戶科左給事中羅萬象、御史詹兆恆、王孫蕃、陳良弼、應天府丞郭維經等交章言：大鍼以逆案發配，不宜召。弘圖請下九卿議。與士英不合，各疏求去，不許。呂大器遂劾士英以入朝爲名，橫據國中，縱兵劫掠，賣官鬻爵，諸罪。御史黃澍入對，廷劾士英。司禮監太監何志孔助澍言之。上怒，士英更爲志孔請，得不死。先是張獻忠自楚入蜀，己巳陷涪州。壬申，士英劾從逆諸臣。光時亨、龔鼎孳、陳名、夏項煜、周鐘等，先是周王薨于淮安舟中，命于安吉孝豐擇地卜葬。丙子，劉澤清劾呂大器前巡撫甘肅，以私忿殺總兵官柴時華，及受賄事。大器連疏引疾致仕。朝議遣大臣北行使清，訪先帝梓宮，併贖敕與吳三桂。而士英言有職方司員外馬紹愉者，曾爲陳新甲使清，昔之下策也。澤清傑並舉前總兵官、太子少師。左都督陳洪範召見，以陳洪範提督下江定海水師，駐瓜洲，會左懋第以母喪在山東，請北行，遂定使清之議。丁丑，張獻忠陷重慶府。瑞王遇害。戊寅，封常應儁襄衛伯，食祿米一千石。世襲劉宗周在籍，自稱草莽孤臣。上疏請上親征，又言四鎮不宜封，有旨宣付史館。而宗周復連疏言中外諸臣皆可誅，於是四鎮

皆怒。己卯，忻城伯趙之龍論先帝廟號，思宗爲下諡，弘圖疏辨，上是之。辛巳，以徐石麒爲吏部尙書，工部左侍郎何應瑞爲工部尙書，以巡按淮揚御史王燮爲都察院右僉都御史，贊理軍務，巡撫山東。壬午，以江西按察司副使程世昌爲都察院右僉都御史，巡撫應天等處地方，加謝陞上柱國少師，兼太子太師。禮部尙書黎玉田、兵部尙書盧世淮、工部右侍郎俱充山陵使，王燮奏皇太子定王永王俱遇害，是日督師標下總兵官于永綬等兵及浙兵，闕于鎮江西門，焚居民數百家。癸未，顧錫疇奏奪故少師兼中極殿大學士溫體仁諡，甲申，以原闕邱磊充總兵官，鎮守山東。大學士高弘圖等奏北使事宜，一於天壽山特立園陵，厝先帝梓宮，并太子二王神櫬，一割山海關外地與清，一歲幣以十萬爲率，一清已僭號，勢成敵國，或稱可汗，或稱金國主，前代多有之，乞下廷臣集議。一洪範給銀三萬兩爲山陵及道里諸費。秋七月丙戌朔，命魯王于台州府居住，添設兵部侍郎二員，加張慎言程註太子太保。戊子，追尊皇考福恭王曰貞純，肅哲聖敬仁毅恭皇帝，皇妣某氏曰孝誠端惠慈順貞穆皇太后，皇祖妣貴妃鄭氏曰孝寧溫穆莊惠慈懿憲天裕聖太皇太后，皇太后太皇太后，生稱也，沒而加之，非名也。遙上母太妃鄒氏尊號曰恪貞仁壽皇太后，諡先妃黃氏曰孝哲懿莊溫貞仁靖皇后，繼妃李氏曰孝義端仁肅明貞潔皇后，追復懿文皇太子廟諡曰興宗孝康皇帝，懿敬皇太子妃常氏曰孝康皇后，上建文帝諡曰嗣天章道誠懿淵恭覲文揚武克純一作仁篤孝讓皇帝，廟號惠宗。建文帝后馬氏曰孝愍溫貞哲睿肅烈襄天弼聖讓皇后，追尊恭仁康定景皇帝諡曰符天建道恭仁康定隆文布武顯德崇孝景皇帝，廟號代宗。貞惠安和景皇后汪氏曰孝淵肅懿貞惠安和輔天恭聖景皇后，庚寅，以左懋第爲兵部右侍郎，兼都察院右僉都御史，經理

河北聯絡關東軍務。馬紹愉爲太僕寺少卿。兼兵部職方司郎中。加陳洪範太子太傅。往北京。癸巳。以巡按四川御史劉之勃爲都察院右僉都御史。巡撫四川。罷貴州總督。以前屯田道參議范鏞爲都察院右僉都御史。巡撫貴州。命田仰仍總漕務。專管江北漕額。并催江北各標應給漕米。甲午。以前兵部尙書丁啓睿安撫河南。賜原闕四字李際遇劉洪起各總兵官敕。乙未。依北京更定營制爲五軍。神機三大營。各一營。至十營。以團練總兵官六人分統之。庚子。萬壽節。癸卯。命禮部尙書顧錫疇祀海。甲辰。追賜故潁國公傅友德。宋國公馮勝諡。乙巳。李自成遣兵至保寧府。降之。庚戌。中旨以吏部右侍郎張有譽爲戶部尙書。弘圖封還爭之。不聽。辛亥。釋高牆罪宗。故唐王聿鍵等三百餘人。壬子。諭曰。朕遭九六之運。車書問阻。方資羣策。旋軫故都。乃文武之交爭。致異同之日甚。先皇帝神資獨斷。彙納衆流。天不降康。咎豈在上。爾諸臣尙鑒於前車。精白乃心。匡復王室。若水火不化。戈矛轉興。天下事不堪再壞。且視朕爲何如主。祖宗成憲。弗尙姑息。各宜欽承。朕言不再。改正閣銜。以尙書兼大學士。萬元吉奏有清平西王吳三桂牌。至濟寧州。稱奉大清攝政王旨。兵將南侵。執政謂款使已行。不以爲意。八月丙辰朔。日食。戊午。罷偏沅巡撫。以前都察院右僉都御史楊鶚爲兵部右侍郎。兼都察院右僉都御史。總督四川湖廣雲南貴州廣西軍務。兼理糧餉。辛酉。加可法少保。兼太子太保。進武英殿大學士。廕一子。錦衣衛指揮僉事世襲弘圖。太子少保。進文淵閣大學士。曰廣。太子少保。進文淵閣大學士。士英。太子太師。進武英殿大學士。鐸。太子少保。進文淵閣大學士。改戶部尙書各廕一子。中書舍人。以刑部左侍郎賀世壽爲戶部尙書。兼都察院右副都御史。總督倉場。以前薊遼總督丁魁楚爲兵部右侍郎。兼都察院右僉都御史。總督河南湖廣軍務。巡撫承德。

襄陽等處地方兼理糧餉。癸亥。贈傅友德特進光祿大夫左柱國麗江王馮勝特進光祿大夫左柱國寧陵王祀功臣廟。敕左良玉充提督官。開藩武昌。甲子。張獻忠陷成都府。蜀王遇害。戊辰。皇太后自儀鳳門入宮。遣靈璧侯湯國祚告於南郊。命惠王於廣信府居住。壬申。以前寧夏巡撫樊一蘅爲兵部右侍郎兼都察院右僉都御史。總督川陝等處。恢剿軍務。兼理糧餉。前原按察司僉事充爲事官。越其杰爲都察院右僉都督史。巡撫河南。兼轄潁亳二州。提督軍務。傑澤清良佐各疏劾劉宗周激變軍情。動搖聖駕。又與得功合疏言羣臣謀危社稷。指大學士姜曰廣。會有建安王府鎮國中尉米統。鎮候考吏部。因奏曰廣定策時有異謀。并劾前山東按察司僉事雷縝祚。儀制司員外周鏞。結黨亂政。下縝祚等獄。于是吏科右給事中熊汝霖劾統。鎮誣詆大臣。通政使劉士禎。禮科給事中袁彭年。劾統。鎮違制越奏。請究問。不聽。曰廣求去益力。癸酉。命修西宮之西花園第一所爲皇太后宮。丁丑。贈吳三桂父故原總兵官吳襄。遼國公。母祖氏。遼國夫人。戊寅。以前總督薊遼軍務爲事官王永吉。戴重罪。總督山東河北等處軍務。庚辰。命選淑女。辛巳。賜北京死節諸臣工部尙書兼東閣大學士范景文等二十二人。贈諡祭葬。有差。建祠鷄鳴山。賜額旌忠。癸未。封原鄭芝龍爲南安伯。以前福建布政使司左布政使申紹芳爲戶部右侍郎。兼都察院右僉都御史。督餉江北。以前太子太保禮部尙書兼文淵閣大學士王應熊。改兵部尙書。總督川湖雲貴等處。專辦蜀寇。賜尙方劍一口。便宜行事。仍給銀三萬兩。乙酉。以皇太后至京。加可法少傅。兼太子太傅。弘圖曰廣各太子太保。士英少保。兼太子太師。鐸太子少保。誠意伯劉孔昭等。太監韓贊周等。各廕陞有差。阮大鍼入對稱旨。疏陳江防甚悉。安遠侯柳祚昌復薦之。以爲兵部右侍郎。巡閱江務。都察院左都御

史劉宗周劾奏不聽。自李自成敗走山東諸州縣，並殺其僞防禦使，牧令復爲明，而朝廷無一官一兵出河北。清遂安置官屬，至濟甯以南，皆降于清。惟濟甯州不下，是月清將楊方興以兵數千趨濟甯，下之。九月戊子，封皇太后弟千戶鄒存義爲大興伯。庚寅，以都督僉事張福成充總兵官，前往河北山東。辛卯，上御經筵。壬辰，裁各布政使。司右布政使甲午曰廣致仕。乙未，宗周致仕。命黃斌卿移屯九江，黃蜚屯蕪湖采石，鄭鴻逵屯鎮江。丁酉，以中軍都督府都督同知王之綱充總兵官，挂盪寇將軍印，鎮守河南。己亥，三法司奏定從逆六等條例。大逆凌遲死處，凡五條。凡從賊攻陷京師，及爲賊毀宗社，易門榜者，凡倡率勸進，及爲賊草僞詔者，凡部院詹事翰林三品以上，大臣從賊受僞官，爲之親信用事者，凡文武封疆大吏，如督撫總兵降賊者，凡京堂翰林科道部等官，爲賊畫策規取地方者，以上如本犯不歸，歸而又逃者，收繫其妻子，籍沒其資產，斬決不待時。凡三條。凡四五品京堂及翰林科道官，受賊僞命居要地，比原職加崇者，凡方面分巡分守知府等官降賊者，凡文武封疆大吏聞變先逃者，統凡六條。凡獻銀獻女獻婢以媚賊求免者，凡內外衙門官但受僞命者，凡職在巡方，遇變而逃者，及布按三司分巡分守知府等官遇變逃者，凡被賊夾打不能自回，仍受僞官者，凡受僞官爲賊疏遠者，凡各衙門奉差，如管屯管河權關司餉等官，雖無封疆之責而逃者，流凡二條。凡內閣重臣及部院寺三品以上，詹事翰林五品以上，卽不從賊，偷生潛逃者，凡旣受僞職後自疏遠，先賊未敗脫身南還者，以上斬絞流及遠戍，共十一則。如各犯認非自投，議減本罪一等。如遁歸匿形，蓄謀叵測，議于本罪加一等。仍收繫其親屬，徒凡二條。凡候考候選，卽無官守，卽未受僞官，乃浮沉賊中，賊奔乃還者，凡遇賊變偶不逃，爲賊脅留未受僞官者，杖凡一條。凡

初爲賊所拘。未受僞官。乘間先歸者。上曰。北都淪喪。帝后升遐。巷戰死綏者。遂無一人。且反面事仇。甘心降賊。爲之指斥先帝。規並海宇。人心已喪。法紀何存。所奏旣已會議允當。並先奪職。其絞罪以上。三法司行撫按官逮至京訊之。流罪以下。撫按官依律卽訊具奏。其有身雖陷賊。而能改圖歸正。擒殺賊首。及以兵馬城池來歸。或爲我內應。克建大功。或爲我內間。効忠本朝者。仍從優陞賞。不用此例。辛丑。以通政司右參議王濬爲都察院右僉都御史。巡撫登萊東江等處。備兵援遼。恢復金復海蓋。贊理軍務。兼管糧餉。以原闕牟文綬充總兵官。鎮守荊州。總理漢土官兵。時荊州未復。命文綬自施州衛收集士兵。出夔州以圖之。癸卯。以後軍都督府都督王允成充署總兵官。鎮守岳州。士英請定童生納銀經送學道收考。免府縣二試。其銀以充兵部招練軍器之用。從之。乙巳。給越其杰銀十五萬兩。令募兵屯田。追賜國初諸臣陶安等先朝諫死諸臣蔣欽等諡。丙午。召萬元吉還。以右軍都督府左都督杜弘域提督池太等處軍務。丁未。上皇考陵名曰熙陵。己酉。進封朱國弼爲保國公。爵一等。辛亥。加李沾都察院左都御史。命法司逮問呂大器。以中軍都督府右都督盧鼎充總兵官。武漢團練正紀。寧南營務。開納助工事例。癸丑。命刑部逮問黃澍。是月。高傑率兵赴鎮。戶科給事中陸朗例出爲福建原闕特旨留之。御史黃耳鼎例出爲江西按察司副使。與朗并疏攻吏部尙書徐石麒。冬十月乙卯朔。石麒致仕。耳鼎復爲御史。以中軍都督府左都督李成棟充總兵官。挂鎮徐將軍印。鎮守徐州。原闕李世春充總兵官。鎮守泗州。原闕賀允昌爲中軍都督府都督僉事。充總兵官。鎮守揚州。併巡上下江。御史爲一差。故周延儒子奕封乞免追賊。時有舉人汪庶者。與延儒弟舉人正儀媼連。中旨欲移坐之。而不詳其名。以爲曙也。遂坐曙賊六萬。而免奕封所坐六

萬之半丙辰以鄭芝龍充總兵官鎮守福建以黔省援楚副將羅聯芳爲前軍都督府都督僉事充總兵官鎮守貴州己未以逃官前兵部尙書張縉彥戴罪總督北直隸山西河南北軍務便宜行事庚申大學士高弘圖致仕遣司禮監太監孫元德察催直隸浙江福建金花歲改段價九庫一應錢糧仍督兩浙漕糧鹽課洋稅并一切修練儲備事宜甲子加何騰蛟兵部右侍郎兼都察院右僉都御史仍巡撫湖廣全屬地方賜北京死節太監王承恩等九人贈諡祭葬廕有差丙寅命于杭州選淑女旨下有校尉人役突入民家搜索女子有投水自盡者巡視京城御史朱國昌等以聞及選入又不稱旨上怒命各城推戶舉首隱匿者罪及地方隣右各官重處而或言天下美女及妝飾精妙無過蘇杭於是訪求之使四出矣壬申中旨以吏部右侍郎張捷爲吏部尙書癸酉改丁魁楚以原官總督兩廣軍務兼理糧餉巡撫廣東等處地方追復代宗生母賢妃吳氏上諡曰孝翼溫惠淑慎慈仁匡天錫聖皇太后惠宗長子文奎曰恭愍皇太子弟允燾爲吳悼王允燾爲衡愍王允燾爲徐哀王追封惠宗子文圭爲原懷王並附祀孝康陵復江都宜春南平等四郡主爲公主耿璿子禮爲駙馬都尉甲戌以逃官前左春坊左中允衛允文兼兵科給事中監興平伯軍命鄭鴻逵挂鎮海將軍印乙亥以江西按察司副使張秉貞爲都察院右僉都御史巡撫浙江提督軍務丙子命以來年正月上辛合祀天地於南郊士英請發欽單于各撫按分給所屬司道府州縣官凡贖鍰自杖以上俱注單貯庫解部充餉其不注單者以贓論從之丁丑以兵部左侍郎解學龍爲刑部尙書前太僕寺少卿楊維垣爲通政使司通政使命王永吉且駐河上擇險要地方暫料理山東河北戰守事宜俟陳洪範等還日奏請進止戊辰加左良玉太子太傅壬午命停今年決囚以

原監

太監孫呈琇爲山東總監。同王濬行事。濬至安東不能前。有旨令駐淮上。賜故巡撫大同都察院右僉都御史衛景瑗等五人贈諡。癸未。以前吏科都給事中劉安行爲都察院右僉都御史。提督直隸浙江沿海開墾屯田市舶魚鹽等稅。兼理海防軍務。通政使司右參議劉若金爲都察院右僉都御史。提督福建廣東沿海開墾屯田市舶魚鹽橋稅珠池。兼理海防軍務。授朱統纘行人司行人。鑄弘光通寶錢。是月漳州賊破雲霄城。據之。官兵討之。賊走大埔。十一月戊子。西宮成。賜名慈禧殿。續封鄧文克爲定遠侯。辛卯。令生員納銀充貢。邱磊在安東與劉澤清不協。可法奏其有異謀。遣右鎮總兵官柏永馥執之。下淮安獄。自盡。癸巳。命遼王於台州寧海縣居住。乙未夜。端門外火。時山東及豐沛並入于清。清分兩道。一入宿遷。一破海州。澤清等以聞。請沿河築牆。與王燮等畫地分守。從之。丁酉。郝彪佳予告。庚子。以兵科右給事中李永茂爲都察院右僉都御史。巡撫南贛等處地方。提督軍務。丁未。以兵部右侍郎張鳳翔爲兵部尙書。兼都察院右副都御史。總督直隸浙江水陸軍務。兼理糧餉。巡撫蘇松等處地方。以浙江按察司副使盧若騰爲都察院右僉都御史。督理江北屯田。巡撫鳳陽等處地方。以江西按察司副使耿廷錄爲太僕寺少卿。調雲南臨安府土官沙定洲兵馬。從建昌入川剿賊。庚戌。以原軍都督府左都督許定國充總兵官。挂鎮北將軍印。鎮守開封。辛亥。士英請于金山圖山築城。從之。壬子。復逃官御史蘇京官。駐廟灣聯絡海上。先是徐州土賊程繼孔擒至京。聞變逃歸。高傑擒斬之。加傑太子少傅。可法太傅。士英太保。鐸太傅。自五月不雨。至于是月。十二月乙卯朔。命荆王于九江府居住。丁巳。進封劉孔昭爲誠意侯。劉澤清爲東平侯。孔昭辭。許之。禁巡按御史不許拿訪。庚申。賜建文死節諸臣贈諡。辛酉。以何騰蛟總督四川湖廣雲南

貴州廣西等處軍務兼督糧餉專理恢剿召楊鶚回部癸亥續封徐洪爵爲永康侯甲子命程世昌兼督上江漕務丙寅改上孝宗后張氏曰孝成靖肅莊慈哲懿扶天贊聖敬皇后大閱京軍命士英代先是李自成遣兵攻鄖陽撫治都察院右僉都御史徐起元分守監軍原闕四字高斗樞原闕四字王光恩等出戰敗之固守數月不下命左良玉率兵救之戊辰以斗樞爲都察院右僉都御史巡撫湖廣己巳陳洪範還奏於十月十二日至北京夷官剛林等語甚諄慢懋第抗詞不屈二十九日至河西務遙祭先帝十一月四日至滄州清遣騎追執懋第等去國書未投因言閣議主于抗節使臣將命不敢委曲上曰國家艱難之際費十餘萬金錢遣使外庭亦欲得當并力滅賊如何閣議止以抗節爲不辱命我當自強清之款否原不足恃爾文武臣工當益切痛恥秣馬厲兵乘時恢復以申大仇洪範又密奏聞黃得功劉良佐皆陰與清通二人疏辯上曰此清中反間不足信命洪範往督師軍前尋給假去楊維垣上疏追論三朝黨局上曰宵人躁競不難矯誣君父以逞其私安知忠孝之道王之案等已經大赦姑不追究三朝要典民間尙有存者禮部訪求一部送入史館以存列聖慈孝之實又奏逆案多枉命吏部察明分別復職起用有狂僧大悲至京自稱齊王又稱潞王下錦衣衛訊壬申加士英少師改命王永吉總督防河鎮將癸酉復逃官前左春坊左諭德韓四維官工科右給事中戴英劾之改別衙門用甲戌遣士英視牲乙亥復逃官兵科給事中時敏官開屯浙江大瞿等山丁丑諭吏部自天啓以前詞臣有勞績者察明贈官不得與廕刑部尙書解學龍等奏從賊諸臣獄宋企郊等十一人凌遲光時亨等四人斬秋後處決陳名夏等七人絞王孫蕙等十五人充軍宋學顯等十人徒潘同春等八人杖自絞以下皆聽贖其在原闕何瑞徵等二十人俟二

三年後定罪翁元益等二十七人存疑及已用張縉彥等七人奉旨未用姜荃林等三人已故吳家周等二人俱不在六等之列。上以諸臣擬罪太輕命三法司再議。開納文武職官誥命分防河汛地。王之綱自永城至寧陵許定國自寧陵以西至蘭陽劉洪起自祥符至汜水李際遇專防河南一府曹友義防邳州以西張士儀防邳州以東時清豫王兵自孟津縣渡河李際遇迎降縉彥等並走沈邱命高傑率兵進屯歸德以備之。戊寅上御興定宮是日傑自徐州進兵己卯加徐起元兵部右侍郎高斗樞都察院右副都御史辛巳罷南郊改於明年冬至御史沈宸荃諫不聽壬午以應天府丞瞿式耜爲都察院右僉都御史巡撫廣西。原闕六字馬乾爲都察院右僉都御史巡撫四川命張縉彥以總督兼巡撫歸德開封河南三府督諸將防河恢剿河北潼關等處地方越其杰巡撫汝寧南陽貴州三府恢剿河南湖廣等處地方士英奏請權酌從之癸未以參將署川東鎮守事務賈登聯爲中軍都督府都督僉事充總兵官前往四川

明季稗史初編卷十

顧炎武譏

聖安本紀

宏光元年春正月乙酉朔大雪。免百官朝賀。以殿工成。加應熊太子太保。可法太保。兼太子太師。進建極殿大學士。士英少師。兼太子太師。進中極殿大學士。鐸少保。兼太子太保。進武英殿大學士。各賜蟒衣一襲。廕一子。尙寶寺丞。以士英掌文淵閣印。充首輔辦事。可法辭太保。許之。以吏部左侍郎蔡奕琛爲禮部尙書。兼文淵閣大學士。入閣辦事。癸巳。命得功良佐率兵進屯潁亳。二人受命不行。許定國陰送款于清。傑至睢州。乙未。定國伏兵享傑於城中。殺之。明日。傑部將攻睢州。定國引兵走考城。圍之。定國走降於清。壬寅。命在京諸臣自陳。保國公朱國弼及御史張孫振劾刑部尙書解學龍賣法庇賊。丙午。奪學龍職。丁未。召前都察院左都御史唐世濟復官。壬子。加衛允文兵部右侍郎。總督興平標下鎮將兵馬。經略開歸防剿軍務。是月清入西安府。李自成走襄陽。二月甲寅朔。命于嘉興紹興二府選淑女。左良玉薦太僕寺卿王驥可任巡撫。丙辰。以驥爲都察院右副都御史。巡撫湖廣。提督軍務。兼理糧儲。命高斗樞回京另用。己未。以阮大鍼爲兵部尙書。兼都察院左副都御史。協理部事。仍管巡閱江防事務。以工部左侍郎高倬爲刑部尙書。人有上書言廣信建寧衢州之間。有雲霧山。爲先朝封禁。開之可以助國。命太監李國輔往視之。甲子。謚皇太子曰獻愍。定王曰哀。永王曰悼。乙丑。命于蘇州製造大婚冠服。丁卯。禮部尙書顧錫疇

免官。廕方孝孺裔孫樹節爲翰林院五經博士。高傑妻邢氏有子元爵尙幼。在揚州。可法請以標下原闕四字李本深提督軍馬。與諸裨將分屯梁宋間。上曰。興平創立軍府。以忠死事。身肉未寒。兼有嗣子。朕豈忍以其兵馬信地。遽授他人。可令其妻邢氏同元爵。照舊統轄。元爵年幼。督師輔臣代爲料理。示朕不忘忠臣至意。李本深仍領前鋒。俟有功優敘。良佐上書追論傑罪。請別委一人統其衆。不許。又言本深庸弁。恥與爲伍。朝廷亦以提督體統尊難之。已而邢氏上書。請以本深爲提督。允文亦具疏如邢氏言。從之。命未下。先是四鎮之南來也。以揚州富實。各思據之。傑兵先至。揚州人不納。遂圍之。得功引兵至天長。欲爭揚州。朝廷遣萬元吉諭之。得功奉詔。可法至揚州。爲傑所要。奏許其家屬居揚州。而功在廬州。山瘠又新破。嘗怏怏不平。聞傑死。又引兵向揚州。士英以聞。上曰。大臣當先國事。而後私仇。黃得功若向揚州。使高營兵將棄信東顧。狡闕躡之而南。誰執其咎。朕於諸藩鎮恩禮有加。諸藩亦當恪守臣節。無得輕舉。以誤國家。可法在徐州。安插高兵。聞之。馳還。會上遣太監盧九德高起潛。李應昇。諭得功。得功奉詔。李本深等聞得功向揚州。棄信引兵還。上命起潛駐揚州。安撫將士。乙亥。追封皇弟由槩爲潁王。諡曰沖。禮部請朝日。命待南郊禮成行之。丙子。更上先帝廟號曰毅宗。封慈煇爲崇王。命於福州府居住。時廷論多及先朝舊事。欲追罪當日建言三案之人。並及門戶諸人。上優容不許。而科道交章。引繩批根。日益深切。羣臣多不自安。袁繼成以總督在九江。疏言三朝要典爲先帝所焚之書。不宜存。已而左良玉亦上疏論之。上曰。此朕家事。列聖父子兄弟之間。數十年無纖毫間言。當日諸臣妄興誣搆。卿一細閱。亦當倍增悲憤。但造禍之臣。物故幾盡。與見在廷臣功罪無關。朕已悉從寬宥。不必疑猜。黃澍之被收也。倚良玉不至。繼成爲之請。

許回籍聽勘。御史左光先被收。亦奔良玉與呂大器。皆不至。御史袁弘勳劾繼成庇護三案。繼成疏辨。上曰。袁繼成身任封疆。自有本等職業。賊信方急。當一心料理軍務。不得借題尋釁。然自是失職之臣。駸駸有挾藩鎮以抗朝廷之意矣。兵部職方司主事彭遇颺召對中旨。改御史。巡按浙江。以家丁數百人行。至杭州不戢。杭人踢署門逐之。改巡按淮揚。己卯。續封張承志。惠安伯。禮部右侍郎管紹寧署部印。失之士英爲之請。盡易南京各衙門印。去南京二字。癸未。大悲棄市。鴻臚寺少卿高夢箕奏。先帝皇太子自北來。今往杭州。上遣內臣蹤跡。至錢塘江上得之。三月甲申朔。至京都。人傳言太子至。人人色喜。又言上未有子。且以爲子。京城內外。一日中告語幾徧。太子在興善寺中。發勇衛營兵五百人守之。夜五鼓。傳上旨。移太子至錦衣衛。掌衛事後軍都督府都督同知馮可宗邸舍。乙酉。上御武英殿。命府部九卿科道官及左春坊左中允劉正宗。右春坊右中允李景廉。前詹事府少詹事方拱乾等審視。正宗等皆前東宮講官。於是百官公服。獨拱乾有罪。便服趨上。太子曰。方先生。及問正宗等。皆不識。又問講書何地。講何書。習何字。答多不符。兵科給事中戴英進曰。先帝十六年冬。御中左門。親鞫吳昌時。太子侍旁。憶之乎。不對。羣臣環詰之。遂供出姓名。王之明。爲故駙馬都尉王昺之姪孫。曾侍衛東宮。家破南奔。遇夢箕家。丁穆虎聲。乃詐稱太子。拱乾則於侍衛日識之也。奏上。丙戌。下之明中城兵馬司獄。以禮部尙書兼翰林院學士錢謙益掌部事。丁亥。復故少師兼中極殿大學士溫體仁諡。戊子。命司禮監隨堂內官監太監喬尙總監兩淮鹽課。嚴察兵馬糧餉。命督師大學士應熊兼制雲南貴州湖廣廣西鄖陽偏沅各督撫。應熊劾馬乾淫掠不法。奪官下督撫逮訊。壬辰。命百官會審王之明於午門外。河南有婦人童氏。自稱上藩邸時元妃。巡按御

史陳潛夫信之。具儀從送至京。上大怒。下童氏錦衣衛獄。并逮潛夫至京訊之。以耿廷錄爲都察院右僉都御史。巡撫四川。提督軍務。兼理糧餉。癸巳。遙祭諸陵。戊戌。以黃斌卿充總兵官。挂征蠻將軍印。鎮守廣西。三法司以王之明獄上。上曰。此必姦人密謀授意。圖爲不軌。非高夢箕一人可辦。法司其嚴行究訊。兩月以來。往來踪跡及主使之入。於是人情益懼。民間流言。指馬士英王鐸共謀戕害太子。黃得功上疏言。先帝之子。卽皇上之子。真僞未辨。乞多方保留。若驟處死。卽果詐僞。天下必以爲真東宮矣。上乃命養之獄中。勿遽加刑。俟布告天下。愚夫愚婦皆已明白。然後申法。而劉良佐上疏。並言太子童氏二事。謂上爲羣臣所欺。將使天倫絕滅。上曰。朕元妃黃氏。先朝册封。不幸天逝。繼妃李氏。又已殉難。登極之初。卽追封后號。詔示海內。卿爲大臣。豈不聞知。童氏不知何處妖婦。詐冒朕妃。朕初爲郡王。有何東西二宮。據供是邵陵王宮人。尙未悉真僞。王之明是駙馬王昺之姪孫。避難南來。高夢箕家丁穆虎聲。令冒認東宮。正在嚴究。若果真實。朕於夫妻伯姪之間。豈無天性。況宮媵相從。患難者頗多。朕於先帝無纖介之嫌。因宗社無主。不得已從羣臣之請。勉承重寄。豈有利天下之心。忍加毒害於其血脈。至於舉朝文武。無非先帝舊臣。寧不如卿肯昧本心。害其元子。朕夫妻之情。又豈羣臣所能欺蔽。但太祖之天潢。先帝之遺體。不可以異姓頑童淆亂宗祏。宮闈風化所關。豈容妖婦闖入。國有大綱。法有常刑。卿不得妄聽妖訛。猥生疑議。因命法司先將二案審明情節。傳示中外。以釋羣疑。然而流言日甚。己亥。上懿安皇后諡曰孝哀。慈靖恭惠。溫貞偕天協聖。慈皇后更上皇考諡曰孝皇帝。壬寅。先帝忌日。上於宮中舉哀。百官於太平門外設壇。遙祭。甲辰。封原闕黃九鼎爲雜中伯。己巳。以殿工成。加可法太師。士英太保。鐸少保。宏圖曰。廣各太子太傅。

李際遇許定國既降於清。清盡得河南開封之地。引兵南下。王之綱走宿州。是日清陷歸德府。巡按御史凌駟死之。丙午。罷安慶巡撫。以兵部右侍郎朱大典爲兵部尙書。兼都察院右副都御史。提督廣昌靖南池皖等鎮軍務。巡撫應天安慶等處地方。總理糧儲。兼督上江漕糧。丁未。命後軍都督府右都督總兵官方國安挂鎮南將軍印。駐防池口。己酉。以光祿寺少卿錢繼登爲都察院右僉都御史。總理兩淮鹽法。兼理江防軍務。贈高傑太子太保。廕一子。錦衣衛百戶世襲。左良玉在先帝時。已擁兵跋扈。及上卽位。數上書侵撓朝政。聞有太子事。具疏言大臣蔽主。危害皇儲。時良玉且病。其子挂平賊將軍印。總兵官中軍都督府右都督夢庚性凶狡。一時失職。諸臣在軍中者。又爲春秋與趙鞅之說。以贊成之。遂舉兵反。以奉太子密旨。誅姦臣馬士英爲名。壬子。加李本深太子少保。闕軍都督府左都督提督。興平標下兵馬。夏四月丙辰。良玉陷九江府。丁巳。追卹三案諸臣。劉廷元等二十人。並復原官。仍各贈廕有差。良玉兵自九江而下。所至焚掠。乙未。陷東流。京師戒嚴。以公侯分守長安等門。及都城十三門。徵靖南廣昌東平三鎮兵入衛。命可法至江北調度。命阮大鍼率兵巡防上江。上諭三法司。附逆一案。日久不結。殊非法紀。朕新政之初。姑從寬貸。光時亨力阻南遷。致先帝蒙難。周鍾以詞臣降賊。乘馬不下梓宮。武愨爲賊僞官任事。三人卽便會官處決。其於擬斬者。發雲南金齒等衛。永遠充軍。擬絞者。發廣西地面充軍。終身責令地方撫按官拘解軍罪以下。並宥爲民。永不敘用。周鑣雷縝祚結黨亂政。招引外兵。圖爲不軌。於獄中勒令自盡。此外當日有挾持異議者。都與大赦。朕爲天子。豈計匹夫夙嫌。並案內曾得罪皇祖妣皇考者。俱勿問。文武諸臣不許再提往事。屢汗奏章。違者治罪。是日戮時亨鍾愨於市。鑣縝祚自盡。以光祿寺卿祁逢吉爲兵

部右侍郎兼都察院右僉都御史。總督倉場。續封劉允柱爲寧晉伯。庚申。續封張國材爲安鄉伯。是日良玉陷安慶府。初興平所將皆秦人。於四鎮中最彊。朝廷以衝地委之。自李本深等引兵還。闕自大梁以南。如入無人之境。而提督之命久不下。將士無固志。因留揚州不進。於是清自歸德分兩道。一趨亳州。一趨碭山。徐州李成棟奔揚州。壬戌。封常澄爲襄王。命于汀州府居住。是日都督黃斌卿等與良玉兵戰于銅陵之灰河。敗之。明日復戰。沉其船三十艘。上命齎銀幣至軍中勞諸將。是時勤王之兵四集。軍勢稍振。良玉尋死于九江。然淮南單弱。清自此益進而南。事不可爲矣。己丑。清陷泗州。丙寅。渡淮。丁卯。選淑女於元輝殿。潞王在杭州上書請移僻靜一郡。戊辰。命移于湖州府。賜勅獎諭。且命移周魯二王於江西廣東。時河南盡入于清。獨劉洪起尙在光黃之間。己巳。以洪起爲提督汝寧開封等處援剿總兵官。庚午。命王永吉總督防河。兼巡撫鳳淮廬三府。錢繼登兼巡撫揚州一府。召田仰回部。繼登辭。命永吉并撫揚州。時上流梗塞。王驥未行。而言者以湖南多警。命楊鶚仍爲巡撫。駐常德澧州。於是興平兵盡棄信還。挈其家眷至瓜洲。掠民舟欲渡江。有旨令鄭鴻逵扼守京口。敢有一兵渡江者。以大礮擊之。日有斬獲報捷。而清遂長驅南下。辛未。清圍揚州。甲戌。加得功左柱國。廕一子錦衣衛指揮僉事世襲。丙子。以御史霍達爲都察院右僉都御史。巡撫蘇松常鎮四府。提督軍務。兼理糧儲。丁丑。清陷揚州。屠之。督師太傅兼太子太師兵部尙書兼建極殿大學士史可法不知所在。戊寅。追封于謙爲臨安伯。五月壬午朔。以山東布政使司右參議李彬爲都察院右僉都御史。巡撫河南。癸未。命移惠王于嘉興府。得功率兵進擊。夢庚敗之。丙戌。進封得功靖國公世襲。加大鍼大典太子太保。廕一子錦衣衛千戶。諸將各陞。廕有差。遣司禮監太監王肇

基齋銀幣往勞。丁亥，封鄭鴻逵靖國伯。分蘇松常鎮爲二巡撫，以兵部職方司郎中楊文驄爲都察院右僉都御史，巡撫常鎮二府，兼轄沿海揚州等處地方，提督軍務，兼理糧儲。己丑夜，清以小舟自七里江渡，庚寅旦，抵南岸，鴻逵以水師奔福建，清陷鎮江府。辛卯夜二鼓，上出通濟門，幸太平。壬辰未明，士英奉皇太后如杭州，日加已有百姓數百人破中城兵馬司獄，出王之明，稱皇太子，奉之入宮，宮中金帛器玩，搶奪一空。吏部尙書張捷、刑部尙書高倬、戶部江西司郎中劉成治、山西司主事吳嘉允、中書科中書舍人龔廷祥、欽天監博士陳于階、國子監監生吳可基，皆死之。癸巳，上至蕪湖，命大典大鍼兼東閣大學士督師，以揚州府同知李繼晟爲都察院右僉都御史，巡撫安慶。時無紙，亦不及用寶，各以一幅紙書其官銜姓名。京城百姓相聚搜殺士英故所部黔兵，及其姻黨，破人家，劫財物。總督京營戎政少保兼太子太保忻城伯趙之龍捕斬數十人，閉城門，遣人具啓於清。清兵自丹陽趨句容。乙未夜，前隊至郊壇門。丙申，豫王至，營于郊壇北。之龍及諸勳戚文武大臣皆迎降。清執之，明廣昌伯劉良佐率兵入援，次上新河，降於清。己亥，豫王入南京，上將幸杭州，命大典國安以所部兵先發，都督杜弘域扈從，得功率兵斷後，未行。癸卯，良佐率清兵犯駕，左柱國太師靖國公黃得功死之。其將田雄等奉上如營。丙午，上至南京。九月甲寅，上北狩。

明季稗史初編卷十一

行在陽秋

隆武內戊二年冬十月十四日。丙永明王監國肇慶。以明年爲永歷元年。

御諱由榔。神宗孫也。皇考桂瑞王生四子。長由□。次由□。俱爲獻賊所害。三由□。封安仁王。以病薨。四永明王。卽上也。天資聰明仁厚。皇考自衡徙梧。以病薨。上居苦次。會隆武蒙塵報至。兩廣總督丁魁楚。廣西巡撫瞿式耜等。謂天下不可一日無君。乃迎桂嗣王至肇慶立之。以府署爲行在。頒詔楚滇黔蜀。閣輔蘇觀生自南雄撤兵還廣州。閣臣何吾驕自閩遁歸青山。加丁魁楚東閣大學士。兵部尙書。瞿式耜東閣大學士。吏部尙書。

魁楚原任兩廣總督。兵部尙書。右副都御史兼吏部右侍郎。賜券劍。進平粵侯。今以吏部右侍郎入閣。攝尙書事。兼戎政。式耜原任廣西巡撫。兵部右侍郎。今以禮部尙書入閣。兼兵部尙書。掌銓事。

封李明忠武靖伯。鎮南詔。

以許德生爲潯州推官。監明忠軍。明忠。江西人。狼兵帥也。初奉隆武詔。協剿江西。八月。率潯州兵六千至肇慶。九月。至三水。聞隆武汀州之變。返肇慶。預推戴。

原任兵部尙書。東閣大學士。呂大器自閩赴行在。仍用原官辦事。旋以病致仕。

原任兵部尙書守制李永茂赴行在。

上隆武帝尊號曰思文皇帝后曰思文皇后。

擢原任福建布政吳炳爲戶部尙書。

督師兵部尙書右副都御史何騰蛟等公疏勸進。

隆武朝。騰蛟進定興侯。賜劍。駐軍長沙。楚撫兵部右侍郎右副都御史堵胤錫受隆武命。督雲貴師。會

聞汀變。騰蛟胤錫公疏達行在。

補馬吉翔郭承吳嚴雲從吳繼嗣等爲錦衣衛使。

吉翔北真人。繼嗣涿鹿人。崇禎十六年。獻賊陷衡州。皇考皇兄及上偕宮嬪自永州奔粵西。行李蕭然。

過道州。州人不納。且羈縻行。駕以索賂。及賊入城。賴繼嗣夫婦以肩輿衛上及國母於難。上失金冊。繼

嗣亦失所佩州印。賊踞城四十餘日。無兵衛。繼嗣密約粵西鎮楊國威引兵復城。國威過道州。覓得州

印。繼嗣亦獲金冊獻之。

進武崗伯劉承胤武定侯鎮寶慶。

以王坤爲司禮監秉筆太監。

坤故北閩。自閩來奔。

十一月癸卯朔。日有食之。

進何騰蛟武英殿大學士。加太子太保。

得贛州敗報。司禮太監王坤請駕移蹕梧州。大學士瞿式耜諫止之。

唐王自立於廣東。改元紹武。以蘇觀生爲大學士。

觀生過三水。不赴肇慶。而行在諸臣。以觀生無推戴意。拒之。適唐王與淮王航海而至。觀生遂奉唐王監國。

遣兵科給事中彭燿入廣州。諭唐王去帝號。不從。燿遇害。

故大學士陳子壯。廣州人。移書瞿式耜。請興師東向。以靖唐藩。式耜以聞。上曰。先遣官諭之。俟其拒命。討之。未晚也。蘇觀生旣殺燿。日集兵向肇慶。而清兵因得乘間窺潮惠矣。兵科給事中陳邦彥同燿受命入廣州。聞燿死。乃還。

以林佳鼎爲總督。兵部侍郎。剿唐藩。

十八日庚申。上卽皇帝位於肇慶。追尊皇考桂瑞王爲興宗皇帝。追母王太妃爲皇太后。立妃王氏爲皇后。大赦天下。進瞿式耜文淵閣大學士。

以朱容藩掌宗人府事。

遣錦衣衛嚴雲從護送三宮居桂林。敕靖江王防守。

授陳子壯中極殿大學士。兵部尙書。節制兩廣江西福建湖廣軍務。賜尙方劍。便宜行事。

二十日壬戌。清李成棟入潮州。遂入惠州。

進蕭琦兵部尙書。晏日曙工部尙書。周光夏都御史。李用楫等爲各道御史。

補原任少詹兼侍讀朱天麟翰林院學士。

二十九日總督林佳鼎捷於三水。

唐王遣督師陳泰歐陽闕等軍於三水城西。將犯行在。武靖伯李明忠自韶州入援。戰於三水。大捷。俘斬八百餘級。陳泰遁去。

十二月初三日總督林佳鼎兵潰於海口。

監軍夏四敷赴水死。佳鼎不知所在。或曰與四敷同赴水死。三水之捷。佳鼎有驕色。督兵晝夜兼行。唐王兵僞降。誘其水師至海口。適東南風大作。唐王兵以火攻之。佳鼎等盡登岸列營。泥淖深三尺餘。人馬盡陷。兵大潰。李明忠二三十騎奪路去。許德生被獲。至廣州繫獄。明忠尋降於清。後復返正。

特授王化澄兵部右侍郎兼都御史。總督粵師。周鼎瀚兵科給事中。

化澄原任以御史巡粵。加大理卿。鼎瀚原任戶部郎中。上以林佳鼎失事也。化澄鼎瀚皆以內批用。瞿式耜奏內批用人。非與朝舉動。上不允。

進原任兵部尚書李永茂東閣大學士。知經筵。

永茂以守制不入直。專知經筵。永茂疏薦鄉望十五人。御史劉湘客與焉。太監王坤啓視。不悅。於十四人悉塗抹其名。湘客被黜。永茂怫以去。爭之。瞿式耜奏。大臣論薦。固其職。司禮輒去。取其閒。何以服御史。何以安大臣。坤復疏薦海內名卿數十人。式耜曰。司禮抑人固不可。薦人更不可。後湘客改官編修。充經筵講官。

加王化澄兵部尙書。

旨杖御史童琳奪科臣劉蕪等職。大學士瞿式耜疏寢之。

琳劾都御史周光夏私亂臺規。旨下廷杖。式耜曰：新政未布，何可杖言官！上從之。蕪等以劾司監王坤落職，賴式耜疏救得賜環。

中允方以智棄官去。

王坤疑劉蕪疏出以智手，故以智力求去。

十五日清陷廣州。

清將佟養甲、李成棟遣遊擊龐起龍僞爲援兵求入城。城內信之，遂蜂擁而入。內兵登城戰一晝夜，擒斬清遊擊王士選。清兵欲退，會有內應，遂陷。唐王被獲自盡。周益諸王俱遇害。蘇觀生自縊死。許德生降於北。紹武守臣忠惠伯王之臣、大學士何吾騶及顧元鏡、洪天擢、潘曾瑋、李綺、曹燁、耿獻忠、毛毓祥等俱降。其在籍剃髮降者爲李覺斯、王應華、梁應材、伍瑞隆等。又葉延祚、曾道唯、陳世傑、關捷先等俱降。

清徇東莞新會等縣。

二十五日行在得廣州陷報，上乘輿出城，駕小舟如西峽，傳幸梧州。大學士瞿式耜從駕而西，丁魁楚走岑溪，王化澄走潯州。

清兵薄廣城且急，式耜方典選，請視師督戰，駐峽口。王坤復趣上西避之。式耜夜乘小舟留駕曰：我兵

水陸鳧至三水。可上下搯也。爭之不得。請身留肇慶。宗人府朱容藩奏曰。左右所恃。惟式耜一人。式耜留守。則上行益孤。上舟西。式耜部署五日。疾趨梧。上西行又五日矣。魁楚惑於姦弁。蘇聘從梧入岑溪。化澄攜中樞印走潯州。西上護蹕者。惟式耜一人。兵部尙書李永茂。工部尙書晏日曙。太僕卿田芳走博白。

清以降撫曹燁仍巡撫廣西。燁歙縣人。口口進士。

改廉州知州陸世廉於梧州。

授熊兆璧兵部主事。兆璧廷弼子也。原任容縣知縣。旋棄官去。

授孫順則辰州分守道。

清兵犯湖湘。命督師何騰蛟率楚師禦之。命大學士瞿式耜轉粵西餉濟師。

駕至梧州。封王國璽武靖侯。王維恭華亭侯。以國戚故也。

元年丁春正月癸卯朔。駕在梧州。時戶部尙書吳炳。翰林學士方以智。朱天麟。文選司郎中吳貞毓。給事

中唐誠。張起。御史程源。中書舍人吳其雷。洪士彰。錦衣衛馬吉翔等俱從。

命魯王總理南北直省錢糧軍馬恢復事。文武爵賞俱聽便宜行事。封陳邦傅思恩侯。焦璉新興伯。

駕發梧州。上自梧州北幸桂林。閣部瞿式耜從行。上欲府江達桂林。兵衛寥寥。梧州知府陸世廉惟募舟

夫以進。式耜扈駕西行。夜昭平口板灘。

原任右都御史兼巡撫廣信張家玉起兵。東莞兵部職方司主事陳邦彥起兵。復順德縣。

丁未日食。

山東鄉兵攻莒州。

十六日李成棟陷肇慶。

駕幸桂林。兵部主事陳邦彥招降甘竹灘余龍等水師。焚清艘百餘於東莞。直抵廣州境。李成棟返救。故乘輿得達桂林。劉湘客曰。上於正月幸桂林。式耜肅堂陛。敕守禦。誕告楚蜀各路征鎮。粵西居山川上游。清不能仰面攻明矣。兵士雲屯湖南北。立需戰。粵南大通。滇柳慶出。黔左右兩江四十五洞土夷悍勇。讐國家惠威三百年。撫粵悉受銜。糜足支內侵。桂城爲明辟都。疏請道里之可達行在者。

加瞿式耜太子太保。駐梧江。

二十三日虜陷高雷廉三州。

東莞張家玉聚衆入海。

潮惠二州林舉賢陳耀起兵。衆至萬人。

二十九日虜陷梧州。

潯州守將李明忠。平禦守將李承忠。俱以兵降北。

承忠或作承志。

叛將杜永和犯岑溪。平粵公丁魁楚督戰。墮水死。

魁楚有兵千餘。屯岑溪。李成棟遣副將杜永和招之。

不至。永和水陸兼進。魁楚與戰於藤江。中矢走死。

二月壬申朔。潮州賴天肖起兵。叛將文貴陳虎余成隆來戰。擊敗斬之。

韶州陳順簡信起兵。惠州蘇來起兵。新會鄉紳黃奇策起兵。清遣沙遠勉撤奇聖來招撫。奇策斬之。

進吳炳方以智東閣大學士。同入直。以智旋罷去。

以原任吏部侍郎王錫袞、禮部尙書文安之、爲東閣大學士。以周堪、廣郭都賢、劉遠生等爲各部尙書。以毛壽登、吳德操等爲御史。丁時魁、禮科給事。金堡、禮科都給事中。兼職方員外。補萬六吉爲給事中。蔡之俊、翰林簡討。

初八日己卯。海師攻福州。叛將張應夢出戰。海師遁。鄭彩、周崔芝合兵攻漳平。不克。總兵陳國祚力戰死之。

十一日壬午。月掩歲星於東井。孫守法屯兵長安鰲谷。陳邦彥師次高平。邦彥遣馬應房以舟次攻

順德。鄭彩克漳浦。擒斬虜官計國男。海師攻興化。叛將張應元逆戰而走。晉劉承胤、安國公曹

志建、永國公焦璉、新興侯郝永忠、南安侯盧鼎、宜章伯。

十五日丙戌。駕幸全州。敕新興侯守桂林。上幸桂林。復謀移蹕。大學士瞿式耜力爭弗聽。竟出全陽。

二十二日癸巳。海師攻福清。不克。圍城三日。叛將陳心裕兵出北門。遂走。

二十四日乙未。林舉賢、陳耀攻廣州。不克。陣斬清將劉朝用。周一鳳而去。

丙申。清陷長沙。知縣王宸、縣丞楊日新降。

丁酉。清陷湘陰。王進才大掠湘陰而遁。清兵遂入城。縣丞扶雲鳳迎降。

督師何騰蛟師次衡上。騰蛟檄張光壁、黃朝宣等援長沙。俱不至。朝宣走衡州。

是月安國公劉承胤朝行在。

詔幸永州。駕至全州。楚將劉承胤欲擁入桂林。太后不允。遂幸永州。

三月壬寅朔。犁虜伯孫守法復甯州。大學士瞿式耜自梧州還桂林。時警報猝至。上念式耜元臣。諭趣治裝從行。式耜謝曰。君以仁。臣以義。臣奉命守此土。得與此地共存亡。於是從官皆行。式耜獨守。

甲辰。李成棟再陷順德。敗余龍於黃蓮。焚舟數百。馬應房戰死。

丁未。賴熊攻復建陽。清兵逼梧州。陳邦傳棄平樂走。敕大學士瞿式耜留守桂林。賜尙方劍。節制諸軍。王坤趣上幸楚。式耜泣諫不能挽。無已。請身留桂。故有是命。式耜仍疏請上暫蹕全州。以扼楚粵之中。內外兼顧。

戊申。瀏陽伯董英降於清。自瀏陽出降。

壬子。清以耿藩伯爲廣西巡撫。

乙卯。清兵薄桂林。攻文昌門。守將焦璉禦却之。初。平樂不守。清兵直上。至是乘虛數十騎衝入文昌門。

城中大驚。式耜急呼璉出。璉自全州歸。休息未定。從數人披弦挺刃。與清兵遇。清兵上城樓。式耜署在樓下。亟緘之。璉矢無虛發。應弦而斃者半。餘者走。璉短兵接追。殺數人。且盡。清隊遂不敢近城。城中始定。是時清兵自東上昭澤。省會逃奔。虛無人跡。上在全州念首輔。且馳驛召還。而留守堅誓與清兵角。拒尤急。清兵衝陣。而式耜出守文昌門。調度自如也。是時督師何騰蛟治兵衡湘。老將重兵。悉屯湖南。北。聲援弗及。式耜獨毅然誓衆嬰城而守。親帥大將焦璉。掩其不給。礮矢夾發。虜鋒大挫。

安國公劉承胤遣兵援桂林。虜陷陽朔。遍野薙髮。式耜與璉危城孤守。疏請徵承胤兵。承胤初從武崗入護。猶尊朝廷。遂司禮監王坤弄權。面叱周鼎瀚爲奉奄。寺鼻息。故推重式耜。發兵數千援桂。雜錄。

云北來高副將入桂林。掠瞿留守資裝。爲總兵陳邦傳焦璉所殺。邦傳遂出兵破貴縣。入潯州。明忠走。邦傳破興業。劉鴻烈圍鬱林。焦璉據桂林。破陽朔。

戊午。張家玉克東莞。

己未。周崔芝攻閩安。

兵部尙書詹兆恆攻開化。叛將李榮逆戰。兆恆兵敗。死之。

壬戌。張家玉克新安。家玉至新安西鄉。與陳邦策屯兵白石。

癸亥。督師何騰蛟破清兵於辰州。

一作庚申

甲子。林質破德化。

乙丑。林質破建陽。叛將蔡應科以兵逆戰。質戰敗。被執。死之。

監軍陳邦彥復清遠。不守。夏四月壬申朔。

清撫耿藩伯兵入梧州。耿至梧州。攻取陽朔。而西失藤縣。北敗於桂林。不敢進前。

江西大旱。詔進張家玉兵部尙書。提督嶺東軍務。聯絡漳湖。兼副都御史。

癸酉。清陷衡山。總兵陳四明降北。

乙亥。清陷衡山瓊州。叛將閔可義陷之。

封錦衣衛郭承昊馬吉翔嚴雲從爲伯。革御史毛壽登等職。劉承胤挾上如武崗。從劉承胤請也。御史毛

壽登駁之曰。金吾無矢石功。何得援邊鎮例。晉五等爵也。吉翔等疑疏出劉湘客之手。周鼎瀚遂造蜚

語。爲董卓樞汜之議。激承胤逼上立下廷杖。旨縛壽登湘客及御史吳德操。給事中萬六吉。於行在午

門外。會諸臣申救得免。壽登等俱落職。承胤自桂陽挾上遷武崗。式耜疏請留蹕全陽。曰。聞郊祀禮成。

卽圖移駕。不知將回桂林耶。抑幸武崗辰沅耶。夫皇上原以恢復兩粵爲心。則不徒西粵未恢。未可移駕。卽東粵未恢。亦當駐全爲得策。故承胤等嗾杖壽登等。四臣主還蹕桂林之議也。

乙卯。清兵入興安州。犁虜伯孫守法戰死。李明忠攻潯州。

辛巳。叛將孔有德。沈知祥。耿仲明。尙可喜。兵犯湖廣。孔耿尙俱降清。封王。是稱三王。

癸未。清兵入衡州。殺黃朝宣父子。

甲申。白虹貫日。清兵陷永州。守將盧鼎走道州。督師何騰蛟駐白牙市。兵部侍郎副都御史章曠駐東

安。

甲申。王允成馬進忠走辰沅。郝永忠走道州。曹志建走永明。

癸巳。加瞿式耜武英殿大學士。少師兼太子太師。臨桂伯。以守桂功也。式耜疏辭。

岑本高等敗沒於浦城。癸巳。岑本高王思春江中英江中元張文耀朱國貞劉國球等同攻浦城。有原

任監軍吳承昊徐元毛文俊張裔元約爲內應。至是本高等四人敗死。國貞被執叛降。遂供承昊等謀。

清皆殺之。

己亥。叛將徐勇破安化。遂入新化。王光泰克襄陽。擒斬虜官。劉承胤兵掠桂林。承胤兵至桂林。挾餉

不出。與焦璉兵主客不和。譁變擊鬪。掠市而去。

五月辛丑朔。清陷新安縣。高雷廉三州俱降於清。

壬辰。王光泰等克鄖陽。擒斬虜官。

庚戌。揚州地震。

甲戌。改武崗爲奉天府。以周鼎瀚爲東閣大學士。同劉承胤入直。

壬午。福建江西大水。

壬戌。鄭彩破長樂縣。

癸亥。清陷龍陽縣。總兵楊國棟戰死。全家被殺。

甲子。清陷常德。

乙丑。清兵攻桂林。焦璉擊走之。翌日。又追敗之。

清偵兵變。積雨城壞。猝薄城環攻文昌門。式耜與璉分門嬰守。用西洋銃擊中胡騎。璉出城戰。擊殺數千人。自辰抵午不及餐。璉曰。枵腹奈何。式耜括署中米

蒸飯分哺。士益樂用命。向晡雨未息。收兵。明日復出戰。清衆棄甲仗而奔。式耜先令路將馬之驥伏於

隔江。清衆從栗木嶺遁。之驥疾馳渡江。運槩提鞭。連斃三人。復追殺二十里而還。璉久駐桂。得桂人心。

式耜國士遇璉。故得其死力。

戊辰。清陷和平縣。知縣李信死之。

晉瞿式耜少師兼太子太師。臨桂世伯爵。上賜璽書褒嘉。式耜疏辭。新命復請苦自劾。

是月。副將周金湯率壯士二百人。夜復永州城。

金湯莆田人。武進士。原任永州都司。復均州。六月。督師何騰蛟朝行在。上慰勞之。命滇將趙印選胡一清統兵數千人。從騰蛟歸守白牙。敕諸鎮扼守

寶慶辰永。晉何騰蛟世侯爵。駐衡州。堵胤錫世伯爵。駐長沙。章曠駐常德。

十七日。李成棟攻陷斯安西鄉。陳御策戰死於白石。是月福建張興龍謝志良擁衆入海。廣東英六吉劉良機擁衆入海。海師攻破興國州。擒程文袞。

秋七月初五日。督輔陳子壯率舟師攻廣州。不克。

初十日。兵部尙書張家玉克復博羅龍州等縣。駐博羅。督輔瞿式耜率宣國公焦璉攻復陽朔平樂。

遣司禮監龐天壽催廣西兵援梧州。兵部侍郎兼僉都御史章曠卒於永州。松江人。崇禎丁丑進士。陳邦傅復梧州。興陵在梧州。督輔式耜奏梧州旣復。宜昭告陵寢。請駕還桂林。言甚切至。

八月。給督輔瞿式耜新銜誥命。

以嚴起恆爲東閣大學士。起恆浙人。面闊。身高有異相。原官戶部管銀法。試侍郎。

二十日。清陷高明。督輔陳子壯監軍麥而炫。被執不屈死之。

二十三日。駕發奉天。傳幸廣西。督輔瞿式耜請繇古泥道。雜容。蹕桂林。

二十四日。清陷奉天。劉承胤以兵降清。奉天之陷也。守兵先敗。遂斫北關棄壺殮而遁。駕三宮無不徒

行者。中宮嫡妹與王皇親母肩輿出城。閣臣吳炳不及出。幾被獲。踉蹌走慶遠。嚴起恆王化澄吳貞毓

馬吉翔出重賞僱三小舟。奉上宮眷西行。時乘輿聞出。不知所之。榮王在辰州。督師大學士堵胤錫巡

撫御史熊關鱗等。共議擁戴。時隆武閣臣熊開元在保靖司。因檄保靖奉開元書。以中興元輔相期。開

元答書略曰。今日所急在討賊。不在立君。乘輿所向未卜。萬一或有參差。魯唐近轍。何可再尋。

二十六日。清陷博羅。

九月李成棟破清遠。陳邦彥被獲。殺之。

二十五日清陷鄖陽。王光泰走竹房。

清陷沅州。巡撫傅上瑞降於清。後清攜上瑞至江西。會金聲恆起事。疑有變。殺之。

駕幸沙泥潭。

庚申海師破羅源縣。又破連江。是月海師掠得山鴛龍門高公島。

冬十月戊辰朔。駕幸柳州。督師何騰蛟來朝。駕在沙泥潭。督師何騰蛟率滇兵來會。遂從駕至柳州。大學

士嚴起恆亦從萬屯來會。

督輔瞿式耜三疏請駕還桂林。時督師何騰蛟、嚴起恆、及劉湘客、咸在桂林。南安侯郝永忠兵驟至。疑

主客不相安。式耜加禮撫慰。永忠信服爲之用。宜章伯盧鼎亦至。自楚。式耜因疏請蹕。極言柳州獠獍

雜處。地瘠民貧。不可久駐。慶遠壤鄰黔粵。南甯地逼交夷。不可遠幸。又言桂林可都云。騰蛟與永忠

鼎璉等俱分防汛會。武崗之變。乘輿南粵。紆道入苗變。朝官星散。不復存上下綱紀。式耜西望而泣。

散布金錢。多遣壯士。閒道迎求。乘輿適報。駕抵柳城。乃益增發將吏。裹餼糧。備車馬。表請上幸桂林。臣

躬掃行宮以待。於是上敦諭相國。西陲朕根本地。先生竭力守此。待朕駐車。使朕不至顛沛。異日國家

再造。先生功實多。

庚午。王光泰奔蜀。

辛未。太白經天。

丁丑。兵部尚書張家玉兵敗死。

癸未。清陷永州。攻全州。清帥耿仲明修代陷永州。遂遣將王燦董英等攻全州。王蔣二鎮失其名禦戰黃

沙河。失利。清兵遂渡西河浦。督師何騰蛟遣總兵何有奇援之。

清陷全州。岳陽伯王允成、總兵唐文耀、全州道馬鳴鸞俱降於清。清攻辰州。榮王遇害。清遣降鎮田起

鳳率兵千人守沅州。

甲午。清兵入興安白土關。

十一月戊戌朔。駕幸象州。

官軍捷於全州。土司覃裕春子鳴珂與龍文明搆兵。驚移聖駕。次象州。式耜再疏迎。請與騰蛟起恆籌

畫。調和主客。集永思璉誓於神。刻期出師。宜章伯盧鼎與滇鎮趙印選各分路駐全。式耜輸餉轉運不

絕。全州復大捷。獲名馬駱駝而還。諸帥連營而軍。互三百里。清衆退出楚。

詔幸南甯。駕自象州欲往南甯。忽爲焦璉亂兵阻道。文武諸臣皆微服而行。馬吉翔左右御舟。力攬淺水

閒。上見之揮淚。乃命閣臣王化澄、吏部尚書吳貞毓、閒道護三宮往南甯。馬吉翔嚴起恆翼上。仍遡十

八灘還桂林。

十二月丁卯朔。日有食之。

己巳。駕幸桂林。靖江王亨甄留守。輔臣瞿式耜郊迎。上念式耜功高賞薄。慰勞備至。進見。上殿賜坐。給贊

元經體。不治細務。以比諸葛武侯。裴晉公。先是七月。司禮監龐天壽奉敕催兵。不謂久在桂林。舊司禮

王坤被承胤逐復入自武崗至柳州。至象。票擬皆金吾吉翔手也。式耜勸上攬大權。明賞罰。威德並行。以服遠近。

授原任禮部右侍郎郭之奇東閣大學士。在庚寅年駕幸梧州時。

督師何騰蛟出師全州。各營兵不和。焦璉走平樂。郝永忠駐興安。

清帥孔有德等攻銅仁。思恩有德沈知祥耿仲明尙可喜合兵而攻。

以劉遠生爲刑部右侍郎。丁時魁萬六吉等爲給事中。是歲錦江伯楊展據嘉定。

二年^{戊子}春正月丁酉朔。駕在桂林。遣大理寺評事朱宿垣。賈詔。宣諭粵西左右兩江。及雲南土司。令各

發兵勤王。宿垣所至諭以大義。土司無不感激願効。復命。遷江西道御史。

封趙榮貴定隨侯。駐白水。榮貴以保甯來歸。故

以詹天顏巡撫順慶潼綿。以總兵皮勛守平溪。屬辰州。

乙丑。清江西提督金聲桓。以南昌內附。聲桓與總兵王得仁。以南昌等九郡之地來歸。詔封聲桓豫國

公。加太子太傅。兼吏兵二部尙書。左都御史。得仁建武侯。其餘大小文武進秩有差。聲桓志存匡復。每

就故閣臣姜曰廣。進士萬翔。私相深計。二人極力贊成。各欲以身殉國。聲桓志遂決。會清撫章于天。貪

虐。上下咨怨。且與聲桓有卻。時以會宴演劇。聲桓曰。畢竟衣冠文物好看。于天曰。如此便當代爲疏請。

聲桓自知失言。深自引謝。翌日。于天遂上疏劾聲桓有反狀。而撫吏與督吏兄弟也。潛以其事告之聲

桓。發飛騎追獲其疏。遂與得仁合謀殺于天。傳檄江省州縣。共圖反正。

督師堵胤錫駐申家渡。袁宗第駐松滋金家場。

二月鳳陽地震。

清廣東提督李成棟以肇慶內附。成棟遣洪天擢潘曾緯李綺等賈奏請駕幸端州。

清蠶章京線國安遣降將田起鳳攻平溪。總兵吳尙慮率副將三人迎戰。三人俱敗死。清攻永甯縣。

線國安遣徐爾先等攻永甯寨。貴溪王嘗澎總兵項登章被獲。苗兵萬人俱死。

初八日崇陽王攻黎平。敗於清鎮陳友龍。崇陽王率苗兵十二營攻黎平。爲清制津鎮陳友龍所敗。諸

營俱潰降。獨興化土司迎奉國將軍暉奎入寨。以兵千人守之。友龍復破寨。暉奎死。

十五日鎮江地震。

十七日金聲桓率兵攻贛州。

十九日清孔有德入全州。

二十一日永成伯郝永忠擁入兵桂林。

二十二日駕發桂林。留守大學士瞿式耜次樟木港。檄各鎮援桂林。清兵薄嚴關。駕復南幸。鎮將敗逃。

過省。撞塘呼號。屠燒邑屋。殺賊不辜。欲以無禮犯式耜。式耜端坐廳事。不可動。清乘間來窺。突騎薄城。

門。式耜率典兵宿將。歃血定盟。申約束。晝則閉門固守。夜則銜枚襲殺。視丁亥春。尤加奮勇。西省賴以

復全。永忠營被襲。疾至關。欲撤兵。時左右近臣卽勸上移桂林。式耜以爲不可。若以走爲上策。桂可

危。柳益可危。彼今日可到桂。明日可到南太。及反復千言。淚下且沾衣。嚴起恆曰。遲至厥明。式耜備御。

用銀三百兩將進。而乘輿已發。式耜疾出送駕。數千兵遮之不得行。式耜署中冠服束帶箱篋圖書咸被掠。聞其主將以令箭護式耜署者。反擄其署。式耜裸坐署中。持令箭逼登舟。或曰無以復主將。令乘主將先行而亂之耳。滇營亦自靈川撤城內。煙火高樓櫓城外不可停泊。式耜寢一小舟。家人啓舟三里樟木港。黎明司寇遠生給事中時魁六吉。湘客至。先以兵與閩民被殺掠聞。上命湘客安撫亂亡。及勸餉糈出。遠生時魁以召將入。遇式耜於樟木港。遠生僉謂兵潰倉卒。不及瞬息。難下手。請下朔平間。催焦璉入援。檄遠近無內恐。式耜然之。舟下三十里至豆豉井。式耜入民舍。集遠生等。立草檄分路四發。明日仍返桂城下。俾知留守在也。旋輕陽朔璉兵續上援。楚鎮周金湯。熊兆佐亦入桂城。式耜命簡討蔡之俊。大理寺評事朱盛濂。先入桂宣式耜令。檄按察司僉事邵之燁部璉兵。見劉湘客紀事

孫可望請駕幸南甯。許之。

詔封李成棟惠國公。遣吏部侍郎兼副都御史吳貞毓。賫敕入廣東。勞成棟。封成棟惠國公。并封佟養

甲襄平伯。

詔督師何騰蛟入守桂林。清破興安。時騰蛟自守嚴關。遣將守興安。及奉詔守桂林。清遂破興安。破嚴

關。傷軍官萬人。興安總兵三人及副將參游以下四百人俱死。

是月辛卯。白虹貫日。

三月丙辰朔。督輔瞿式耜入守桂林。時太常卿黃太玄斃於兵。式耜棺斂之。

乙巳。駕幸南甯。大學士嚴起恆。王化澄。同入閣辦事。起恆攝吏部尚書。以龐天壽掌司禮監。西粵新書

云。隨駕止嚴起恆。馬吉翔。科臣吳其靈。洪士鵬。許兆進。尹三聘。大司馬蕭琦。七人。

贈陳子壯東閣大學士。忠烈侯。諡文忠。予祭葬。廕一子中書舍人。錦衣衛世襲。贈張家玉少保。太子太師。武英殿大學士。吏部尚書。增城侯。諡文烈。予祭葬。追封三代。廕其弟家珍。錦衣衛僉事。

十三日。清兵攻順慶。安南入貢。報李成楫之聘也。

十五日。大學士嚴起恆。請開選邕城。受二十四土州貢賦。從之。邕城屬南甯。時陳邦傳守潯柳二州。

不能供億。故有是請。

二十二日。清攻桂林。薄北門。督師何騰蛟擊走之。騰蛟師攻榕江。初。騰蛟自永甯至桂。滇鎮胡一清亦

統兵至桂。清人尙疑城虛。直抵桂北門。騰蛟督兵三面出。追殺三十里。清人北渡。甘崇去。督師列營榕

江。瞿式耜輸餉百石。督師出關。與留守相慰勞。

二十三日。甘州蘭州兵起。晉荆江伯張先璧爲侯。督輔瞿式耜檄諸鎮。攻取金州。督輔瞿式耜檄

廣西巡撫魯可藻。下梧州。可藻銜自署兩廣。舊例東撫稱制。兼粵西。西撫稱撫。式耜曰。方今武人多

自署撫軍。輒自命貽遠人笑。因代疏請改銜。

大學士周鼎瀚罷。當武崗之亂。言官彈鼎瀚以附承胤入直。式耜司票擬。獨不可。謂鼎瀚既係大臣。應

聽自謝免。賜督輔瞿式耜銀幣金圖書。篆曰精忠貫日。

清攻潼州綿州。

以朱天麟爲大學士。晏清爲吏部尚書。張起爲戶科給事中。張鳳翼以兵科掌翰林院。張佐辰掌文選司。

童雲驤爲行人。潘駿觀爲職方郎中。守制御史顧之俊亦隨駕。

陳邦傳自請世守粵西。督輔瞿式耜奏止之。

閏月丙戌朔。皇子生。册爲太子。頒萬喜詔。大赦天下。

督輔瞿式耜進八箴。式耜以經筵無講官。無由聞得失。書八箴於扇進之。

十八日。荆江侯張先璧克靖州。遂克沅州。津沅州道戴國士以沅州來歸。先璧題授都御史。巡撫偏沅。

召四川巡撫毛芝瑞爲吏部左侍郎。芝瑞旋卒。初瑞芝留。劉承胤謀立武崗。芝瑞力折之。幾被害。走廣

東。病踰年漸劇。而所善黃嘉卿知養利州。以書迎之。遂移居萬年城。至是行在。以吏部右侍郎召之。既

拜命。遽卒。

五月乙丑朔。日有食之。

二十日。清陷潼州。

二十二日。清陷綿州。

二十七日。督師何騰蛟復全陽。騰蛟奏捷疏。歸之留守。曰爲皇上以信臣用臣者。式耜一人也。

陳友龍以奉天來歸。

清援江西。五月七日。清譚泰兵至石頭。分其兵。一路從饒州。一路從九江。一路從進賢。並入。圍進寶順

化二門。十七日。聲桓等兵自贛州下。越二日入城。先是聲桓命大廳宋弘宇以兵三萬守南昌。十三日。

戰敗。譚泰兵於鐵綿巷七里街。在德勝門外泰兵於二十三日接戰。聲桓敗守德勝章江廣順。王得仁守進

賢順化澹臺。七月。清築長圍。二十以後。以浮橋柵斷章江。

六月甲子朔。有流星入于箕尾。督輔瞿式耜勞師全陽。

遣刑部侍郎劉遠生入粵東勞師。初。成棟表至。舉朝歡呼。科臣張起請先遣方正大臣觀其虛實。吏部侍郎吳貞毓拜命行。使還。力言成棟忠誠迎駕。初無虛僞。因請幸廣。遠生奏人久節鉞。有威名。爲成棟所重信。式耜請充此選。

督輔堵胤錫兵入常德辰沅。清官程時登余必躍逃。

清副將馬進忠以兵來歸。屯守蘆溪。進忠故流賊。號混十萬。

官軍復均州。清官李鳴謙走脫。清官之守衡永寶慶柳鄖者多遁。

是月。駕發南甯。幸潯州。

秋七月。晉陳邦傳慶國公。留守潯州。兼守南甯等郡。駕至潯州。適宮眷有疾。留數日。邦傳以扈從新功。

擅劄授官。始於慶國有劄。繼而部劄。後則御劄。亦曰欽劄。欽劄與吏兵部不相涉。其銀則分散兵需。及

沿途賞賚。取足於此。邦傳浙人。原任廣西總兵。隆武二年。挂征蠻將軍印。永歷改元。封思恩侯。

慶國公陳邦傳請世守粵西。如黔國故事。閣臣朱天麟票擬不允其請。邦傳恚甚。令武康伯胡執恭至天

麟舟中。傳語云。勳公欲將劍印擲公舟。令各營兵聽公發付等語。詞甚厲。天麟不爲動。

修養甲伏誅。成棟遺養甲代祭興陵。密令李元胤殺之。元胤成棟養子。本姓孫。

八月朔。駕幸端州。即肇慶賜惠國公李成棟建元勳府第。以元胤爲左都督。式耜面奏。駕勿東。興陵兩載。

風塵。成棟令地方官修葺陵殿。巍然天壽。展謁畢。龍舟宜卽返。灘灘而上。成棟備法駕。進御用。嚴護衛。甚威。具移山超海之力。非有所宜。但事權宜專。號令宜一。茲軍功爵賞。文武署置。決于成棟。若歸之朝廷。徒虛拱。且楚黔雄師百萬。騰蛟翹首威靈。駕旣東。軍中將帥謂皇上樂新復之地。成棟亦有邀駕之嫌。號令旣遠。則人心渙散。請上一幸粵東。俾瞻仰天子音容。面爲慰勞。指屬然後責其盡意于東。刻期出師。一切決於外。不中擾也。式耜先後遣簡討蔡之俊。給事中蒙正發迎駕。上竟由梧入肇。式耜再疏言。前日粵東未復。上宜住桂以視楚。今日江廣反正。則宜住桂以出楚。事機所在。毫釐千里。吏部侍郎吳貞毓請上幸廣城。式耜乃促遠生入朝。遠生見朝後。成棟適自欲還師。修行營。迓乘輿。上命遠生詣廣勞成棟。遠生謂成棟曰。今乘輿駐北。爵賞征伐。人疑有私。不可不嫌。成棟然之。遂罷修行宮。止遣官迎駕。蓋遠生承式耜意。欲駕返桂林也。

召大學士瞿式耜赴行在。式耜疏辭。

戊戌。督輔何騰蛟復衡州永州。師次湘潭。

庚子。復寶慶。張先璧唐姚陳友龍等所復。

以袁彭年爲都察院左都御史。洪天擢爲吏部侍郎。潘曾緯爲大理寺正卿。李綺爲提學副使。從李元胤薦也。

補陳世傑翰林學士。吳以連驗封司。李貞給事中。高賚明御史。王應華光祿卿。楊邦翰太僕卿。唐元楫職方司。從元胤薦也。世傑等皆廣人。

陸曹燁兵部尙書。耿獻忠毛毓祥通政使。從洪天擢薦也。

大學士嚴起恆、王化澄、朱天麟、吏部尙書晏清、吏部侍郎吳貞毓、科臣吳其靈、洪士彭、雷得復、尹三聘、許兆進、張起等俱赴行在所。

副都御史劉湘客、禮部侍郎吳璟、即吳文瀛吏科給事中丁時魁、戶科都給事中蒙正發、兵科都給事中金堡、

禮科都給事中李用楫、文選司郎中施召徵、光祿卿陸世廉、太僕卿馬光、儀制司徐世儀等皆赴行在所。以上八則見兩粵新書。事多未核處。劉湘客撰瞿留守傳實未嘗赴行在。

九月癸丑朔有火星自東隕有聲。

清陷寶慶。陳友龍復降。

冬十月壬午朔惠國公李成棟入朝。成棟五日一朝。時政無巨細上悉委之。成棟亦必請旨後行。

督輔何騰蛟檄馬進忠李赤心會師取長沙。南雄知府凌犀渠遇害潮州。

二十二日清再陷常德。

左都督李元胤署吏部尙書。元胤既殺佟養甲于德慶道上。威權愈赫。會其誕日饋送稱觴。達于冬杪。

通政司疏陳乞官日以千計。閣臣票擬只有著議具奏四字。文選雖掌銓衡之權。空名而已。廣省非從

元胤轉奉成棟劄咨。不得擅爲除授。桂林平樂則瞿守爲政。廣遠柳州則焦新興爲政。潯南思泰則陳

慶國爲政。慶國先有降表至廣。爲成棟所鄙。承成棟旨。咸思擊之。

洪雅兵亂。是冬洪雅鎮湯國聘與團練花漢將熊振生治兵相攻。洪雅之境無寧宇。

十一月朔，李成棟請出師南雄，與金聲桓合攻贛州。督輔何騰蛟遣兵復安化醴陵益陽湘鄉攸縣。

初二日，馬進忠、李赤心兵至長沙。清大同鎮姜瓖以大同內附。

二十六日，清吳三桂兵至保寧。永國公曹志建駐永州。

十二月朔，李成棟師次南雄。清援長沙，李赤心大掠湘潭而遁。

三年^丑己春正月朔，駕在端州，罷大學士朱天麟，召舊輔黃士俊、何吾驥入直。科臣金堡等疏劾陳邦傳。

邦傳疏請即用堡為監軍，以觀臣十萬鐵騎。十一日，大學士朱天麟票擬有金堡從來朕亦未悉之語。

十二日早朝，科臣丁時魁等率科道十六人進丹墀，挂冠而出，上不得已，賜諭帖於李元胤，收回原旨。

天麟即日放還田里，金堡、丁時魁等仍舊供職。時魁等又劾天麟結太監王坤，求陳邦傳特薦，得以入

閣，又令其長子為御史掌河南道，次子為中書，弟為行人，得旨一門盡黜。

十九日，清再陷南昌，金聲桓敗沒。一作二南昌有湯副總守進賢門，獻城。王得仁被執，死之。姜曰廣自經。

二十一日，清再陷湘潭，督師定興侯何騰蛟被獲，不屈，死之。馬進忠走靖州。諸帥望風奔潰，却地數百

里，省會震撼，老幼竄走，內外數十萬，不復舉煙火。

清陷衡州。

二十八日，大學士黃士俊、何吾驥乞罷，許之。

嚴起恆、王化澄同入閣辦事。詔敕中書張立光、崑山張魯傳之子、陳邦傳致金珠，祈改敕中一字，因去

秋，駕過潯州，邦傳留守潯州，如瞿相例，中書寫敕，遂以世字易居字。科道疏論立光擬罪。

袁彭年求入相不得。上疏云：儻臣向者以三千鐵騎西來，今日君臣安在上，持其章示羣臣，舉朝大駭。時肇慶有假山五虎圖，謂元胤以賈冒李也。元胤本姓孫，又姓賈。五虎者，爲總憲袁彭年爲虎頭，丁時魁爲虎尾，戶科蒙正發爲虎脚，兵科金堡，浙人。隆武初爲延平知府，疏激上殺問卿尹文燁、施璉二人，人畏之，號爲虎爪。副都劉湘客，陝西布衣，來自瞿相，又爲成棟同鄉，號爲虎皮。見兩粵新書

二十八日，定隨侯趙榮貴戰沒龍安柏峪口。隨一作遠

二月朔，張先璧率水陸兵數萬攻辰州，不克。

初五日，清入撫州，次日破建昌。

初九日，樂安縣殺姚大使。

二十五日，破蠡縣，陷長沙，破嶺縣。

是月，清陷信豐。惠國公李成棟歿于陣。正月，成棟踰嶺攻贛州，適金聲桓戰不利，全師退去。成棟勢單。

清將高進庫乘機拒戰，成棟復不利，退至信豐，兵潰不可制。成棟親爲斷後，乘馬渡河，負鐵甲，馬不勝水溺，成棟遂卒。時中軍杜永和代領其衆，清兵復追敗之。兵部侍郎張調鼎、監軍道姚生文爲亂兵所殺。

三月初七日，行在得督師何騰蛟、惠國公李成棟敗報，方中湘之報陷也。羽檄達行在，公卿震駭，會集政事堂，議所以代定興侯者。僉曰：惟留守公望尊德鉅，足以節制諸將，議欲舉大事，招討湖南北，莫留守公宜。奏上，上曰：俞惟留守式耜，作朕柱石，朕悉其才，是必能爲朕任闕外，釋北顧憂者。於是賜式耜彤

弓鐵鉞。特遣郎官一員捧詔。詔式耜。從此沅湘永寶。鄂岳上下三軍之在行間者。皆得生殺予奪。惟命式耜辭不獲。乃戒期誓衆。建元帥旗鼓。申號令。親出入行間。令且環師。全永跳盪捷擊。刻日可獻俘馘。初八日。兵至湘潭。

夏四月初三日。清再陷寶慶。

初五日。太白入月。

初八日。犂虜伯孫守法敗沒于興安。

沒于藥箭寨。

十四日。故科臣沈迅自焚于萊陽。

二十六日。清破長山。孫可望據雲南。自疏求封秦王。不允。以安東封之。可望不受。可望遣龔彝之弟

鼎獻南金三千兩。名馬四匹。求封親王名號。金堡以祖制無有阻之。廣西南寧府與滇之廣南府接壤。

龔彝乘書有不允卽殺出等語。陳邦傅大懼。卽具疏爲可望請封秦王。大學士嚴起恆以爲不可。止封

安東王。可望因拒命。未幾可望密遣人擊起恆于鄧州之濱。幾殆。

五月朔。以兵部侍郎張同儼總督湖廣軍務。授瞿昌文中書舍人。昌文。式耜孫也。自海至。

督師堵胤錫辭朝。旋病卒于潯州。胤錫將滇南。過宜章。圖入粵東。因割據者強觸相凌。乃不果行。遂以

偏師會曹志建于永明。孤軍無援。遂爲所制。兵將瓦解。胤錫單騎夜遁走。閒道覲闕。至潯陽卒。劉湘

客曰。胤錫移瞿公書云。上有密敕云。東人握君子掌。一朝不戒。生刳入舟。朕不復有中土之望。惟卿與

瞿先生圖之。瞿公得書大驚。知斯語非上意。鹵簿諸臣欲外鎮與東諸侯釁。則從中可攬權。故詭爲上

敕使胤錫聞於諸鎮。上方蹕東。鼓厲征討。詎意內外生釁。書四年朝事始末。致胤錫。我輩不力。視封疆。聽人臯牢而啓釁。非社稷之福也。忠貞營助國公高必正。諸勳咸偉其議。

六月朔。左都御史袁彭年以憂去。自五月乙亥雨。至于六月乙丑。大水寒。

秋七月朔。遣內侍持敕獎南雄守將閔可義。杜永和。副將楊大甫。與李元胤不協。先燒營東下。南雄單

弱。可義斷指自誓。軍心始固。

十四日。楊展破遂寧。旋潰回嘉州。永州再陷。興寧侯何一青退守榕江。督輔瞿式耜檄一青出兵。屯全

州。召廷臣集議於慈寧宮。發東餉萬兩。

八月初八日。督輔瞿式耜生日。遣官賜金幣。

十八日。姜壤敗沒於大同。袁韜武大定等誘殺楊展。遂據嘉眉。明年春。葛佐明倚九溪之險。糾衆與

袁武相拒。期年始定。

是秋。清帥尙可喜攻陷潮州。大學士郭之奇、禮科都給事中郭朝薦、相傳殉節。

冬十月。贈何騰蛟中湘王。李成棟寧夏王。金聲桓南昌伯。設壇祭之。

大學士王化澄致仕。嚴起恆入直。自黃士俊何吾騶去位。有疏未拜而先商票擬。落旨不符。則與化澄

相仇。故化澄罷去。惟起恆耐之。故得獨相。

十一月朔。德化王被獲。遇害。鄭芝鵬踞石榴城。清兵至。隨遁去。劉中藻在福寧。勢窮自縊。福建盡失。惟

延漳汀三郡。界連江西。而延平所屬。皆處萬山中。清兵既去。德化王慈燁踞將軍寨。先陷大田。繼破龍

溪攻順昌將樂十一月清兵復陷之王被獲兵部尙書羅茂生等降。

十六日清入原州巡撫鄭愛陣沒于燕子窩副將陳勝彭昌高勝談玉等戰于白虎關俱被獲死。

十一月十二日興寧侯何一青率粵兵數萬攻永州不克退入山曹志建復永州并復桂陽擒清官

李亨。

潮州守備郝尙文降清孫可望大掠貴州殺富順王平鼎是歲封李建捷安肅伯建捷北直真定

人成棟養子從信豐歸守廣州。

四年庚寅春正月駕在端州清陷南雄屠之閔可義力戰而死杜永和以餘兵守清遠峽。

初六日清陷韶州寶豐伯羅成耀預遁賜李元胤復姓爲孫上以成棟死難晉元胤車騎將軍封南陽

伯元胤力辭詔固不許乃勉受車騎印而章疏多不改元銜冬去清以精騎破南雄韶鎮羅成耀棄城

走元胤聲其罪與蒼梧棄督師鎮楊大用咸伏誅人咸服其紀律時督廣州杜永和退走海外保瓊州。

初七日復以王化澄爲大學士。

初九日駕發端州。

十三日命李元胤留守上聞韶鎮羅成耀遁去遂戒舟西上駕至德慶。

二月朔駕至梧州戎政劉遠生奏自請行守清遠峽給事中金堡奏留駕爭之不得適大學士瞿式耜

疏至言粵東難得易失且韶去肇數百里強弩乘城堅營固守亦可待勤王兵至何乃朝聞警而夕登

舟疏再上而蹕移德慶向梧州矣。

下給事中丁時魁、金堡、蒙正發、詹事侍郎劉湘客詔獄。從御史程源奏也。大學士瞿式耜七疏救金堡等。時上至梧州，百官請修行臺，上欲以舟爲家，有旨命陳邦傳統兵護駕，馬吉翔護三宮舟先行。五虎失勢，報仇者羣起，獨袁彭年以憂去得免。時魁等奉旨逮問于梧州，照廠衛故事，榜掠招賂，以數十萬計，盡以充餉。拷訊時，惟堡大呼二祖列宗，餘則乞哀殊甚。

十五日，清攻奉天，總督劉祿、監軍御史毛養登戰死，馬進忠走靖州。

二十六日，清攻廣州，清陷惠州，惠州總兵黃應杰、道臣李士璉、知府林宗京等以惠州降清，并執趙

王由棖以獻。

三月二十四日，清破永州鐵柱關，次日破龍虎關，總兵向明、高姚得仁陣沒，永國公曹志建奔灌陽。

二十八日，硃敕發內閣榜袁彭年、金堡、丁時魁、劉湘客、蒙正發等罪於朝堂，追賊遣戍，以昭法紀。

夏四月朔，再行考選，朱士焜考選第一。常州靖江縣人補吏科給事中，以代丁時魁。補童雲驥御史，潘駿觀職

方主事，雲驥謝恩時，伏地不能起，殞於御舟。

初八日，清兵至黔陽。

二十日，王光恩駐巫夔間，行屯政。清兵至郴州興甯縣，迎撫黃順祖，總兵林國瑞戰死，其衆二千人被

屠。

二十四日，興國侯李赤心擒永州清官李茂祖、余世忠，送行在誅之。茂祖陝西布政，署巡撫事，世忠乃

鎮將也。

六月朔。清入清遠峽。清遠參將鄺文龍、東莞總兵張道瀛、參將張善、南雄副將覃養志等俱降。

秋七月朔。湖南巡撫闕原總兵白文明自郴桂出降于孔有德。

八月十五日。御舟泊繫龍洲。在梧州之東。自春至秋。王嚴二相隨駕。逍遙河上。有民謠云。漢宮秋也。昭陽愁也。起恆字秋冶。化澄字昭陽。上與太后三宮置酒。樓船簫鼓于梧州繫龍洲之上下。起恆手書水殿二字。挂小牌於御舟前。上飲至中宵。不樂而罷。以清遠峽及惠莞閒有敗報也。

九月。清破灌陽。知縣李遇昇被獲死。曹志建奔恭城。

冬十月朔。日有食之。上不怡。嚴起恆疏請修省。大學士瞿式耜遣其孫昌文入覲於梧州。授昌文翰林

院簡討。

十一月。駕幸藤縣。陳邦傅自潯江迎駕。上與太后三宮移駕西上。至藤縣。遂分爲兩。陳邦傅自潯州來

迎駕。諸臣與之合者皆往石江。不入者則入容縣。溝赴北流陸州高化境。兵多散敗。肆行劫掠。戶部尙書吳貞毓失一妾。刑部尙書毛毓祥子身遁。聞上往南寧。向交趾及二十四土州爲援。相隨有王化澄嚴起恆馬吉翔龐天壽等。陳邦傅尙據潯江爲殿後。其兵尙萬餘。

初二日。清陷廣州。屠之。李元胤攜重貲入廣州。城中人亦嬰城自守。男子上城。婦女饋餉。清兵環圍城外。自八月至十一月初二日。五鼓。北門觀音山紫雲梯。遂入城。城中驚惶相蹂踐。礮銃相擊。城門築塞難開。百萬人民。盡死于內。杜永和自清遠敗後。追還端州。尙有兵萬人。知不能守。遂奔恩平。高雷廉。

初三日。清孔有德入全州。衛國公胡一清撤守榕江兵。

初四日。孔有德犯興安。四日。有德兵至興安。次日辰刻。大舉入嚴關。開國公趙印選、衛國公胡一清、寧遠伯王永祚、俱以分餉入桂。榕江空壁。武陵侯楊國棟、寧武伯馬養麟、方馳出小路軍。榕江兵未戰而回。清發使趣印選、印選已出城。城中大亂。沿道驅掠。式耜令戢之不得。城中潰兵各鳥獸散。一清、永祚從城外去。式耜衣冠危坐署中。適總督張同敞自靈州回。過東江不入。從泗水過江入桂林。願與式耜同殉國。

初六日。孔有德破桂林。劉湘客作初正日。用歷異也。

清江王及其世子長史李_國被獲。不屈死。留守大學士瞿式耜、兵部侍郎張同敞、被執不屈。羈于別室。大學士王化澄、戶部尙書董天閱、廣西布政朱_國、俱降于清。桂林平樂、全州_原東安、永寧、臨桂、

靈川、興安、義昭、平甯、灌陽、永福、恭城、陽朔、荔浦、修仁、富川、平樂等十七州縣俱陷。

閏十一月十七日。留守大學士瞿式耜、兵部尙書張同敞死之。劉湘客曰。瞿公執去。見有德。公云。事已至此。一死足矣。夫復何言。有德雅重公。安于別所。防衛嚴而不失禮焉。公賦詩與張公。賡和。邏卒得公與胡一清書。知公死心社稷而志未灰也。十七日辰刻。請公出。公笑謂張公曰。我二人多活了四十日。今日事畢矣。張公亦謂曰。今日得死所矣。遂南面被害。十六日之夕。十七日之辰。雷霆冬發。遠近皆曰。徵在公也。瞿公從容賦絕命詩云。從容待死與城亡。千古忠臣自主恩。澤久。頭絲猶帶滿天香。其詩原闕。時給事中金堡已爲僧。有德請葬二公。遂瘞北門園。

十二月。駕幸南甯。入土州。朱天麟嚴起恆。王化澄馬吉翔龐天壽等俱從行。擢兵科給事中張起爲副都御史。巡撫南甯。

南陽伯孫元胤被獲于欽州。赴廣州。五日之內。兩廣陷。駕離梧州。爲陳邦傳所劫。百官星散。元胤身率散卒。護蹕憩南甯。身至南海檄舊旅。至欽州。爲土兵王勝常所劫。械送廣州。見有德不屈膝。有德不遽殺。留之以招杜永和。

是冬高李二將率衆數千渡瀘。自黎州掠嘉眉。

五年^{辛卯}春正月朔。駕在南甯。尋幸安隆州。

二月十五日。清陷梧州及蒼梧藤縣。

二十五日。清陷柳州及象平馬平。

三月。端州羅定州降于清。

清陷高州。高州提督李明忠兵潰。圩口。清兵追至電白縣。明忠預遁。清遂陷高州。道臣郭光祖、吳人龍、知縣文振義、副將王邦友等俱降清。

新泰伯鎮守潮州。總兵郝尙文、潮州道沈時、知府王朝鼎俱降于清。尙文尋內附。

夏五月。秦王孫可望遣將賀九儀、總兵常榮將兵至南甯護駕。并請移蹕雲南。上亟召隨從諸臣議之。時閣臣吳貞毓、御史王光廷、徐極等勸駕幸欽州。依李元胤。閣臣朱天麟力請幸滇。言元胤屢敗之餘。衆不滿千。棲依海濱。其不足恃明矣。雲南山川險阻。雄師百萬。北通川陝。南控荆楚。亟宜移蹕。以堅可望。

推戴之心。以慰中外臣民之望。吳貞毓、魏光廷等堅執不可。遂寢其議。
秋八月，慶國公陳邦傅與其子文水、伯陳曾禹遣將至梧州降于孔有德。潯州總兵李時方有聲、副總
兵鄧景、監軍道楊兆文、潯州知府何允中俱降于清。陳邦傅殺宣國公焦璉。璉與邦傅有兒女戚。
邦傅說降不屈。遂爲所誘殺。又甯端伯茅守憲爲邦傅所脇。繳印降。守憲尋悔恨。遂卒。
冬十月，撫南王劉文秀率兵五萬攻保甯。不克。文秀自滇入蜀。與文韜武大定等相拒數月。
十四日，靖南侯于大海率兵于荊州降于清。大海初據夔州之巫陽。爲孫可望所敗。故降。
定川侯李占春被執。占春僞降。卽爲僧遁去。尋復被執。
是歲，永州諸生鄧光遠不屈死之。
孫可望殺大學士楊畏知。畏知故衡滄道也。永歷改元。擢部院。是年入覲安隆。晉大學士。還滇。可望忌
而殺之。

國家圖書館



004638130

